

11. 2. 171

11 2 171
A N T O N I I
A R R I G H I I
J U R I S P O N T I F I C I I
H I S T O R I A

Quattuor Disputationibus comprehensa.

A C C E S S E R U N T
E J U S D E M O R A T I O N E S T R E S
I. P R O
J U R I S D I C T I O N E P O N T I F I C U M .
II. D E
E C C L E S I I S S U B U R B I C A R I I S .
III. D E
A G R O L I M I T A T O .



P A T A V I I . C I O I O C C X X X I .
E X C U D E B A T J O S E P H U S C O M I N U S
Superiorum Permissu. .

— (III)
ANTONIUS ARRIGHIUS
DOMINICO RUZZINO
SENATORI AMPLISSIMO,

S. P. D.



UM Juris Canonici seculo-
rum sexdecim historiam, su-
perioribus diebus, quattuor
enarrationibus essem persecutus ; eaque attulisse,
ab optimis quibusque collecta monumentis, plu-
ribus viderer , quæ ad lucem aliquam ac lau-
dem ejusdem disciplinæ, & commodum adole-
scen-

(IV)

ſcientium pertinerent ; hortati ſunt non pauci , ut fit plerumque , ut illa ipſa ederem , ac publici juris facerem . His ipſe reſtiti , eorumque vocibus , quoad mihi licuit ; cujus mei conſilii iidem teſtes eſſe poſſunt , qui , ut emitterem , poſtularunt ; quique hoc norunt , quam lucem reformidem , & hominum judicia . ſed tandem conviciis propemodum , juffuque illorum , & auctoritate victus , eodem flexi animum , quod ea via , Ampliſſime Senator , potiſſimum judicarem , mei erga te ſtudii & obſervantiæ teſtimonium aliquod exſtare poſſe . Quæ enim in me merita contuleris , boni hic omnes ſciunt ; & ipſe ego ſic intelligo , a me tibi ſic deberi , ut vitam debeam . Habe tibi igitur hoc munuſculum ; quod ſi non eſt ejusmodi , ut gratiæ par ſit ulli referendæ ; id certe ſit , unde plane cultum erga te meum , memorisq[ue] animi , & grati officium omnino intelligas . Eo autem magis meam rationem probaturum te confido , quod illa afferam , quibus optima Religio , vitæque ſanctioris , ac morum elegantia continentur . Is nempe es , qui nihil fere præter pietatem ac virtutem probes . Vel una tua de hac re Prætura
Pata-

(V)

Patavina exemplo sit, quam superiore anno sanctissime gessisti; quamque hæc Civitas quasi formam quamdam, regendique artem, ac virtutis imitationem memorare solet. Qua in re, ne quis jam sit, qui hoc me auribus dare putet, civium ipsorum voluntates testatas habes. Sed de me ipso ut hoc jam habeas, in tanto eorum numero, qui Juris Pontificii historiam reliquerunt; cur quasi succenturiatus ego accesserim, paucis exponam. Ecce autem una hæc ipsa causa est, ut, quæ dispersa, ac propemodum infinita in pluribus commentariis esse videntur, dilucide ac perspicue, quantum facultas nostra tulit, ac paucis pagellis comprehenderem, studiosorum commodo. Deinde ut Jus Pontificum, clarissimis initiis, ac nobilitate illius objecta rursus oculis, amare illi inciperent, qui nullam fere eodem contineri doctrinam reconditiorem arbitrantur, aut libero homine dignam. Postremo, ut ad pacem aliquam, si fieri id tamen potest, rem adducerem. sunt enim aliquot jam ex nostris, qui fortasse acerbius quam par est, ac nimia quadam credulitatis abundantia, amorisque ducti, res enarraverunt. sunt autem ἐτερόδοξοι, qui odio,
livo-

(VI)

livore, immanique quadam rabie, cum Jus arripuere, omnia fere miscunt, perstrepunt, maledicunt, conviciantur; relictaque veritate, modestia, & causa publica, Pontifices, aut Pontificios, ut ipsi appellant, insectantur. Quod facere hos minime oportuit. Recte igitur hoc nomine olim Augustinus Petilianum Donatistam, ut est Lib. III. Cap. I. reprehendit. *Relicto, inquit, negotio publico, privata quadam similitudine, hominis unius vitam maledicis opprobriis insectatus es, quasi homo sit causa, que inquiritur.* Morum istiusmodi itaque pertæsus; justitiæ, ac veritatis tantum cupidus, fontes ipsos adii. Ac ne singula confecer; qua potui diligentia, viros purpuratos, Baronium, Bonam, Bellarminum evolvi; præterea Petavium, Sirmundum, Labbæum, Doviacium, Petrum a Marca, Antonium Augustinum, ac Stephanum Balluzium. Jam cum intelligerem Justellos duos in Juris Pontificii historia versatos diligenter; & si hos quidem Marca aliquando litteris ad Alexandrum VII. & Lucam Holstenium fraudis coarguerit; quæ ipsi tradiderunt, legi summo studio; nec neglexi ea, quæ olim Voëllus, Blondellus, Du Pin, Fleury, Dal-

(VII)

Dallæus, Mornæus; quæ nuper item viri summi, Gerardus, Van Espen, Fontaninus docuerunt. Ex hisce igitur meas lucubrationes quattuor expressi; ac sive ex nostris essent, sive essent *ἑτεροδόξοι*, studium hoc fuit unum meum, ut, nugis & conviciis omnino excussis, ea modo arriperem, quæ ad veritatem pertinere existimarem. Ceterum quæ in illorum libris inveni, ipse trado. Nil ex me gignere, narrare, comminisci, aut volui, aut debui. Quod utinam ante me aliqui fecissent, nec in re tanta augurari, divinare, quodque turpissimum est, mentiri voluissent. Id nunc est reliqui, Amplissime Senator, ut hæc, qualiacumque sint, iudicio tuo ornes; suffragioque, & auctoritate tueare. Hac fretus, adversa nulla unquam pertimescam. Quid enim verear, quandiu vos mihi aderitis Patruus, ac Fratres quinque, eximia Urbis Veneratæ decora, & ornamenta? quandiu Ruzzinum nomen ad R. P. Immortalis, bonorumque laudem, & tuitionem natum? Vos ego intueor, in quos hæc Civitas, atque Academia; in quos Collegæ mei, Viri optimi doctissimique, facile intuentes, felices beatique esse in vestra
clien-

(VIII)

clientela ac fide judicantur. Teque ipse ego unum maxime, qui famæ, quæ hominibus honestis vita ipsa carior est; qui honori meo, & commodis consulisti. Vale.

Patavio Prid. Cal. Dec. MDCCXXVII.

AN-

ANTONIUS ARRIGHIUS

Viro Doctissimo, Clarissimoque Hyacintho Serry
Doctori Sorbonico, & in Gymnasio Patavino
Theologiæ Professori S. P. D.



ULTIS de causis, eisdemque gravissimis, quas, datis litteris ad Virum ornatissimum, Dominicum Ruzzinum, commemoravi, adductus sum, ut, postquam oratione populari Juris Pontificii fontes indicavi, ejus brevem nunc ederem historiam, & origines latentiores pertentarem; quo omnes hoc intelligant, verum esse id, quod Viri eruditissimi sapius prædicarunt, Jus Pontificum disciplinam esse a recta prorsus ratione ductam, & artibus præstantioribus excultam; eosque, qui ad hanc accedant, a maximis prædiis imparatos, operam & otium miserrime consumere. Sed hæc elucubrationes, rebus difficillimis, & gravissimis implicitas, ut perlegas, ac pervolvās ipse diligenter, ad te mitto; quidque omnino sentias, vere sincereque, ut tuum est, ad me scribas; ut, si forte probes, sperare jam incipiam, id fore, ut docti probent omnes, honestaque suffragatione mihi assentiantur. Te unum ego ex omnibus delegi, cui tantam rem committerem; quem monere posse, & edocere judicarem. Qui in totius Europa luce positus, generi mortalium admirationi es. In quem Galli tui, nostri item Itali, nunc respiciunt; quemque unum maxime Patavina Academia se habere gloriatur, quem Anglis, Germanis, & ceteris

(X)

teris Nationibus excultissimis opponat. Collegæ, amici-
que tui periculum hac in re vides. Nam si quid offen-
dero, probe nosti, quam graves, acerbique delatores
affuturi sint. Res opesque meæ igitur, in doctrina et
bonitate tua sita sunt: Vale.

Pat. Prid. Cal. Decemb. MDCCXXVII.

Viro

ANTONIO ARRIGHIO

In Gymnasio Patavino Sacrorum Canonum Pro-
fessori Celeberrimo Fr. Hyacinthus Serry
Theologorum minimus S. P. D.

QUOD a te adornatam, scholisque dicta-
tam nuper Pontificii Juris Historiam,
non antea velis praelo committere, quam
ab optimo cognitore perlegatur, et ap-
probetur, modestia tua deputo, recteque
prudencia. Scis enim, Vir Clarissime, morosiorum oculo-
rum censuram esse, quam aurium; aliudque longe es-
se, rudi, atque otiosa Juvventuti verba facere, aliud
morosam eruditorum Lectorum censuram subire; hoc
praesertim seculo erudito, ingeniiisque ad ferendum tota
libertate judicium, plus aequo intentis, ac pronis. Ve-
rum quod, relictis tot illis, quibus Ordo vester efflo-
rescit, doctissimis Viris, in me unum conjeceris oculo-
los, a quo id officii postulares; vereor ut satis con-
sulueris famae tuae, atque tutela, satis etiam pudori
meo pepercis. Ecquid enim praesidii, atque tutela
accidere tibi potest, contra ingeniorum venena, se-
culique livorem, ex viri umbratilis, aliisque studiis de-
diti commendatione, atque suffragatione? Aut quid ego
in Jurium scholis valeo, ut de tuis lucubrationibus,
salva fronte, judicium faciam? Has tamen, quando-
quidem mandas, et legi, et evolvi diligenter, ma-
luique jussis tuis obsequi, quam pudori meo: statimque

(XII)

in ipso gustu, primaque promulside, reconditas litteras, profundam eruditionem, antiqua memoria cognitionem uberrimam deprehendi: sed acre in primis iudicium, & critica scientia peritiam singularem demiratus sum, qua Jus Pontificium repurgasti, ac subegisti, rejeētis, & ad quisquilias amandatis Canonibus longe multis, Constitutionibus Apostolicis, Epistolis decretalibus, aliisque prisca, ut jaētabatur, atatis Statutis, Legibus, atque Dictatis; quae minus cautis Jurium interpretibus succum fecerant. Simulque Academia Patavina sum gratulatus, quod ope tua, littera illa postliminium repetant, quae ad exterarum gentes, sublatis olim sarcinis, commigraverant. Quominus in erudite lucubrationis tuae commendationem addam alia, vetant illa ipsa laudes immodicae, quibus me cultissimis epistolis commendasti; ne laudem pro laude rependere videar; neve, quod iniquius sit, malignus forte tuae mentis interpretes, veras te laudes falsis fœnerare voluisse putet. Utcunque sit, Vir Clarissime, has ego laudes, quas tuus in me nimius amor inter scribendum effudit, si meas agnoscam, pereat mihi frons; si meas noverint alii, pereat de genere humano fides omnis. Quare hoc tu scito, persuasumque habeto, malle me a te, tuisque similibus, diligere, quam laudibus ferri: ne quis mihi illud Ovidianum occentet: Qui legit has laudes, an mereare rogat. Vale, ac vive diu litteris redeuntibus, vive & Academia tuo adventu reslorescenti.

Pata-vii Postrid. Cal. Decembris MDCCXXVII.

NOI

(XIII)

NOI RIFORMATORI
DELLO STUDIO DI PADOVA.

AVENDO veduto per la Fede di Revisione, e d' Approvazione del P. F. *Tommaso Maria Gennari Inquisitore*, nel Libro intitolato: *Antonii Arrighii Publici Juris Pontificii Professoris Aetnae 1111. de Jure Pontificum universo*. ec. non esser cosa alcuna contro alla Santa Fede Cattolica; e parimente, per Attestato del Segretario Nostro, niente contra Principi, e buoni costumi, concediamo Licenza a *Giuseppe Comino Stampatore in Padova*, che possa essere stampato; osservando gli Ordini in materia di Stampe, e presentando le solite Copie alle Pubbliche Librerie di Venezia, e di Padova.

Data li 4. Dicembre 1727.

(Carlo Ruzzini Cav. Proc. Rif.

(Alvise Pisani Cav. Proc. Rif.

(

Agostino Gadaldini Segretario.



DE JURE PONTIFICUM UNIVERSO AC ROASIS I.



E Legibus Pontificum, Illv-
rum Amplissimorum jussu ,
verba hoc anno facturum , e
re fore existimavi , ac loci
hujus dignitate , si , quem-
admodum ab summo inde
initio ad hæc usque tempo-
ra gesta omnis , contracta-

que res sit Juris Pontificii , paucis ostendero ; ut
facie proposita ante oculos studiosorum negotii
universi , & ego filum quoddam quasi ducam
rerum tradendarum , & illi ipsi in tam variis
judiciis , quæ de hoc apud Auctores inveniuntur ,
minus hæreant , vel labantur . Namque his annis
homines existere , doctrina illi quidem & eru-
ditione summa præditi , non ita fortasse mode-
stia , ac pietate , qui ad rem adgressi , omnia per-
turbarunt ; easque syrtes & scopulos de indu-
stria

ſua ædificarunt, ut vel peritiſſimi facile offendant. Id quod in artibus ac diſciplinis ſæpiſſime contingit, cum ducta ingenia non ſtudio veritatis perquirendæ, ſed partium amore, odio, ac lubidine quadam, ut eximia ſacundia ac divitiæ orationis oculis objiciantur, rem ita perſequentur, ut potius involvant, quam expediant. Utinam hæc calamitas Juri Pontificio minime obtigiffet; nec homines acuti moroſique orti eſſent, qui rabie quadam in Pontifices, vel nimia benevolentia acti, omnia permifcerent; motuſque atque ambages eas ſcientiæ tranquillæ, ac tenebras, obtenderent, quæ per hæc tempora operam navantibus laboris tantum ac moleſtiæ afferre ſolent. Scilicet jampridem artem hanc abſolutam perfectamque prorsus haberemus; nec libri ii in manibus verſarentur, quos probris, & injuriis, infamique contumelia plures referferunt; cum dedecore & ignominia Chriſtianæ pietatis, quam tueri ſeſe, ac profiteri, palam gloriantur, eo ipſo tempore, quo oppugnant. Neminem hic ego eſſe arbitror, qui ſic exiſtimet, hæc me conſingere, aut temere pronuntiare. Res ſunt in medio, hominumque facta, quorum opera & Leges, & Pontifices, ſacrorumque ritus ab ipsis confirmati, receptæ cærimonix, fundatæ ac ſtabilitæ conſuetudines in odium plurimorum, voclæſque devenere. Eaque tum maxime hominibus contigerunt, cum illi prædicarent, ſe ſumma ope id unum age-

agere, ut veritas, & religio, abditæque res in apertum proferrentur; cum tanto illo attritu, ac sævitia opinionum, id tantum egerint, ut flamma veritatis, cum vellent elucere, propemodum extingueretur. Id manasse inde boni omnes arbitrantur, quod animis iratis, caninaque rabie acta ab his res, gesta que omnis est; non pie, non christiane; justitiæ studio nullo, jurisque retinendi. Igitur, cum se acres, elatos, ferocesque in scribendo præbuerunt, apparere, non quæsitam veritatem, sed quemadmodum hominibus verbis phaleratis inferri injuriæ, referrique possint. Religioni Christianæ, eique disciplinæ, quæ de illa est, turbæ, tumultus, prælia, sævæ tempestates plurimæ obtrigere. Sic enim Christo visum est, ut gravissimis contentionibus sæpius jactaretur. Sed tamen, cum hostibus abundaret, defensoribus non caruit. Porro postulo, an ne hi in illos in negotiis gravioribus convicio & contumelia unquam decertarint? An neglecta humanitate, eaque moderatione, quæ decet viros probos, præsertim Christianos, manus conferuerint? An potius depugnarint lenitate, caritate, illustrium doctrinarum atque argumentorum vi vel cum impuris & inimicissimis? Hi hominum sanctissimorum aculei fuere, hæ hæstæ, hi enses, hæc arma denique in præliis adhibita. Possem ego plurima hujusce rei afferre testimonia, sed modum adhibebo. Scribit Gregorius in Apollinarem, Eunomium, Manichæum;

C

Cyril-

Cyrillus in Nestorium; Eusebius in Porphyrium; Cyprianus in Demetrianum; Nazianzenus in Julianum; Augustinus in Pelagianos, Manichæos, Donatistas; alii in alios. Arguunt illi quidem furorem & insaniam; & acie rationum ac firmamentorum apposita undequaque, veluti quibusdam catenis injectis, compescere conantur; ea tamen laude adhibita modestiæ & humanitatis, ut non agere cum hostibus, quemadmodum revera illi erant, sed cum fratribus quibusdam, errore alienatis, videantur. Quid? nonne Basilius, scribens in Eunomium, tantum ab injuria abest, atque contumelia, ut eum festive etiam, quæ formicæ natura sit, interroget? & tamen hi omnes cum iis conflixere, qui furiis feralibus veluti exagitati, aris, templis, divinis sacrificiis, universæ R. P. Christianæ atrox bellum, ac nefarium indixerant. Paulo fortasse vehementior Nazianzenus adversus Julianum aliquibus videbitur. At in hoste tam impio, tamque scelerato quid erat, quod dici mitius posset, qui non vi tantum ac tormentis, sed dolis, insidiis, & fraude quadam incredibili in homines innocentissimos, & optimam Religionem ferebatur? Nunc, moribus mutatis, hi homines ab hominibus plurimum adamantur, qui plurimis maledictis uti solent; hi præsertim, qui conviciis & calumniis, de trivio arreptis, occulant Pontificibus, eorumque Legibus, in rebus vel levissimis; qui omnia illorum miscant,

exsi-

exsibilant , explodunt . Meas ergo partes arbitratus sum , quando , Principis Serenissimi beneficentia , locum hunc teneo , pro virili Jus tueri ; nullaque acerbitate orationis rem omnem illustrare ; atque , ut dixi jam , quo magis omnia , magisque studiosis in aperto sint , speciem initio rei totius ante oculos proponere ; quod quatuor Enarrationibus expediam . Utinam in re hac , ceterisque partibus ad Jus Pontificum pertinentibus , eorum , qui ante me sedem hanc obtinuerunt , vim exprimere , ac doctrinam aliqua ratione possim ; Petri præsertim de Amatis , qui nuper ex hoc loco , ingenti omnium plausu , ad principem translatus , ob morum probitatem , artiumque commendationem , qua in legibus consenuit , carus omnibus , acceptusque est . sed certe , quod in me erit , id omnino agam , ut ; si minus copia litterarum , atque sapientiæ ; studio tamen , labore , diligentia possim utcunque comparari .

Christus igitur initio , ut inde a capite arcessam disputationem , novo iusto fœdere , Ecclesiam fundavit ; vitæque exemplis , ac Legibus sanctissimis munivit . Apostoli deinde , doctrina illius ac præceptionibus imbuti , eidem præfuerunt ; honore pares , potestate impares ; scilicet in Petrum collato principatu ; eamque rectis institutionibus , ac disciplina dilatarunt . In qua tamen diu humanæ gentes nequaquam permanferunt ; aliis mobilitate ingenii novis rebus stu-

20 DE JURE PONTIFICUM

dentibus; bella autem aliis, ac turbas conferentibus de moribus ac fide, de cultu & cærimoniis adhibitis in Ecclesia; omnibus turpissime a vetere instituto ac simplicitate deflecentibus. Quo factum est, ut, qui ceteris præessent, cum per sese opinionum pestem erumpentium comprimere non possent, majores minoresve, ut monere res ipsæ viderentur, indicerent conventus. Hic mos inductus ab Apostolis, qui primi Hierosolymæ conventus habuere, ad ceteros manavit. Eaque initia, & causæ conventuum fuere; qui tribus primis seculis raro habiti; sequentibus duobus frequentius indici; deinceps autem inde negligi propemodum cœpere. Porro quæ de Concilii sententia, communique Patrum omnium suffragio, constituerentur, Canones sunt appellati; quasi regulæ, ac præscriptiones quædam credendi, vivendique, ex Sanctarum Scripturarum libris, qui Canonici dicebantur, expressæ ac derivatæ. Eaque appellatio apud Græcos, artifices præsertim, in usu fuit, qui canone scrutari, num recte ne, an perperam aliquid ageretur, dicti sunt, ut legimus apud Aeschinem, & Porphyrium in Harmonicis; cujus hæc sunt verba, ex Græco versa, quæ is ex Ptolemaide Cyrenaica, foemina clarissima, de scientia Canonica, quæ deinde Harmonica dicta est, refert: *Canonicum vero studium, inquit, juxta quos est generalius? Juxta Pythagoricos. Quam enim nos nunc vocamus Harmonicam, illi appellabant Canonicam.*
Sed

Sed cur illam Canonicam vocamus? Non, ut censent quidam, a canone instrumento, sed a rectitudine; quoniam recta ratio invenit id, quod rectum est, quando utitur regulis, seu canonibus Harmonicis. Hi autem Canones, qui eo consensu, quem dixi, a Patribus constituebantur, duplicis generis fuere. Alii enim de rebus ad fidem pertinentibus scripti sunt; iique proprie δόγματα appellantur; alii de moribus, externaque disciplina, ac ritibus Ecclesiæ, qui voce sua Canones dicuntur, hoc est, regulæ, sive constitutiones. Cujus est rei exemplum in Novella Græca CXXXI. quæ De regulis Ecclesiasticis & privilegiis inscribitur. Afferam ego verba Imperatoris, quæ Burguntio, sive alius quispiam, sic latine vertit: Sancimus, inquit, igitur, vicem legum obtinere sanctas Ecclesiasticas regulas, quæ a sanctis quattuor Conciliis expositæ sunt, aut firmatæ; hoc est, in Nicæna CCCXVIII. & in Constantinopolitana Sanctorum CL. Patrum; & in Ephesina I. in qua Nestorius est damnatus; & in Chalcedonica, in qua Eutyches cum Nestorio anathematizatus est. Prædictarum enim quattuor Synodorum dogmata, sicut Sanctas Scripturas, accipimus, & regulas, sicut leges, observamus. Apparet, Imperatorem Canones pro legibus haberi velle, quorum alios δόγματα, quæ pertinent ad fidem; alios autem regulas, quæ ad mores referuntur, nuncupat. Quæ tamen differentia temporibus posterioribus & Conciliis non ita forte retenta semper est, ut quispiam cum fide possit affirmare alterum

22 DE JURE PONTIFICUM

rum pro altero a Patribus usurpatum nequaquam inveniri. sed id quidem non est hic locus, ut persequar diligentius. Ad Canonum originem, & progressionem veniamus. Tribus igitur primis Religionis Christianæ seculis Sanctorum Scripturarum libri dumtaxat in manibus versabantur. Nulli fere erant Canones, cum conventus nulli, aut certe paucissimi, habiti fuissent. Primum autem Concilium esse dicitur, quod Hierosolymis ab Apostolis coactum est; quod deinde Actibus Apostolorum adjectum fuit; quaesitumque est in eo, de Moysis legibus ad caerimonias pertinentibus, an iis Christiani obligarentur? Libertas Christiana asserta; editique Canones, ut intra fines Syriæ, Ciliciæ, Antiochiæ, ne genti Judæorum essent offendiculo, ab idolothytis, sanguine, suffocato, & scortatione omnes abstinerent. Seculo secundo adversus Catharyges, & Montanum, ac de Paschali controversia, in Syria, Palestina, Asia, Romæ item, atque in Gallia habiti conventus, plurimique Canones constituti. Tertio deinde fere medio in Novatum Romæ, eosque qui illius partes sequerentur, habitum Concilium est, in quo nulli Canones memorantur editi, sed *λόγος* ejus recitat Eusebius lib. VI. Hist. Eccles. cap. XXXV. cujus hæc sunt verba, reddita latine: *Ob quam rem, inquit, Concilium maximum Romæ cogitur, in quo LX. Episcopi & Presbyteri totidem, & amplius, una cum Diaconis in unum conveniunt. A Pastoribus etiam*
sepa-

separatim per singulas cujusque regionis provincias, quid ea de re agendum esset deliberantibus, colloquia fiunt. Ab omnibus δόγμα constituitur: Norvatum, ejusque fautores, tanta superbia inflatos, & quotquot illius inhumanissima, & a fraterna caritate alienissima opinioni assentirentur, in eorum numero, qui erant ab Ecclesia exclusi, haberi. Fratres autem, qui casu infelici prolapsi fuissent, pœnitentia medicamentis curari, & ad sanitatem restitui. Aliæ item Synodi hoc seculo habitæ dicuntur in Africa, Asia, Occidente: sed nulli fere Canones in diptycha Ecclesiastica, ex iisque in codicem Canonum relati memorantur. Primi autem Canones, qui in hoc exstant, scripti sunt in Synodo Ancyrana Provinciali, quæ sub Silvestro Pontifice, & Constantino Imperatore Ancyrae in Galatia habita est initio IV. seculi, ut Baronius auctor est. Hanc deinde Neocæsariensis, itidem Provincialis, consecuta est, cui Vitalis Episcopus præfuit, non Salonitanus, ut legitur apud Gratianum, sed Antiochenus, hoc est, ille ipse, qui una cum XVIII. Episcopis præfuerat Ancyranæ. Ejus autem Canones XIV. fuere, non XXIV. ut legitur in quibusdam codicibus non emendatis Gratiani. His Synodis duabus commoda non exigua Ecclesiæ parata sunt. Plurimi enim, sæviente Maximino, Religionem deseruerant, aut certe gravius aliquid in illam, ac sese admiserant. Cautum Ancyrana, si in fidem rediissent, qua lege excipiendi. Itaque formulæ non paucae, eæque modera-

derationis plenæ, ac sanctitatis prodire. Porro altera, scilicet Neocæsariensi, præscriptionibus sanctissimis Ecclesiæ disciplina, ac mores constituti. Mox Laodicensa, ut Baronius putat, in qua Canones LIX. tum Synodus Gangrensis, in qua editi XX. celebratæ; quas Nicæna I. Œcumenica CCCXVIII. Episcoporum excepit, in qua Canones XX. scripti sunt. Verisimile est, ex hoc tempore, Canonum collectionem cœptam esse, hoc est, codicem illum Canonum, qui deinceps dictus est Ecclesiæ Universæ; in quem codicem Canones Nicæni, Ancyрани, Neocæsarienses, Gangrenses & Laodicensi sunt relati; Antiocheni item, & Constantinopolitani, denique Ephesini, & Chalcedonenses; ejusque codicis exemplar unusquisque Episcopus habuisse fertur; ipsumque in diptycha Ecclesiæ suæ retulisse. Igitur post tempora Synodi Nicænæ Ecclesia Jure duplici uti cœpit; scilicet Divino, quod Sacris Litteris, & Canonico, quod codice Canonum continebatur. Iique codices, cum conventus haberentur, in medium afferebantur, ut peti inde δόγματα ad fidem pertinentia, deque disciplina obortæ controversiæ possent definiri. De Scripturarum codice, illustre est testimonium, quod legimus in actis Concilii Chalcedonensis, ubi crebro hæc inveniuntur verba, ex græco sic latine versa: *Anteposito in medio Sacrosancto & Venerabili Evangelio.* & in Apologia Cyrilli Alexandrini de Concilio Ephesino ad Theodosium. *Sancta*, inquit, *Synodus*

us Christum confessorum, & velut caput, constituit; Venerandum enim Evangelium in sancto throno collocatum erat, sacerdotibus insonans: Justum iudicium iudicate. Denique, ut loca plura alia omittam, in Epistola Synodica Concilii Aquilejensis; tomo I. Conciliorum; cui præfuit Ambrosius, Episcopus Mediolanensis, cujus hæc sunt verba: *Proposita in medio Divina Scriptura.* De codice autem Canonum in ipsa quoque sermo est Synodo Chalcedonenſi, quæ ex eo Canones commemorat LXXIII. LXXXIV. XCV. XCVI. & ex Canonibus commemoratis definit controversias. & in Epistola Synodica Episcoporum provinciæ Pisidiæ Asianæ dioeceseos ad Leonem Imperatorem, quo loco Canon LXXXIII. citatur, qui quartus est Antiocheni Concilii. Dionysius item Exiguus in Epistola Paschali I. ad Petronium Episcopum Canonis meminit LXXIX. qui primus est Synodi Antiochenæ; & in Epistola ad Stephanum, Salonitanum Episcopum, quam veteris illius codicis Canonum Latinæ interpretationi præposuit, Canones a Nicæno Concilio I. ad Constantinopolitanum I. nempe a I. capite ad CLXV. enumerat, sicut in Græca, ut ipse inquit, *auctoritate*, Conciliorum ordine ac numerorum serie dispositi erant. Huc Leonem I. respexisse apparet, & Synodum Romanam in ea Epistola, quam ad Theodosium Imperatorem misit, ut in Italia Synodum juberet cogi generalem; quod Canonum Nicænorum decreta peteren-

terentur, quæque *subterannexa* erant; qua voce Canones Conciliorum intelliguntur, qui a Nicæno ad Constantinopolitanum, numerorum serie una comprehensi, in veteri codice Canonum perleguntur. Hanc collectionem ex Synodo Chalcedonensi Cæsarem Baronium olfecisse putant homines doctissimi, cum illius meminit Tomo III. anno CCCXXXI. num. XXXIV. Ac Synodi ejusdem Chalcedonensis ope, veteris codicis restituendi rationem conatus est afferre nobilis ille Anonymus (quod Gerardus tradit) auctor consultationis de celebri controversia inter Paullum V. hujus nominis, & Venetos; quem doctissimi quique existimant fuisse Jacobum Leschafferium. eoque Synodi Chalcedonensis testimonio Antonius Augustinus lib. I. Dialogo XI. usus, contendit, Canones Antiochenos esse authenticos & probatos. *Receptos*, inquit, *esse constat, et in Corpore Canonum positos ante Concilium Chalcedonense, ut in ejus Concilii actione XII. Græcis, Latinis XI. apparet: ex libro etiam Latino, quem eodem nomine, Corpus Canonum dicimus, quem aperte Leo IV. in Epistola ad Episcopos Britanniae approbat. Appellat Augustinus Corpus Canonum, librum illum, quem alii appellant Codicem Canonum; quique Græcis dicitur βιβλὴ καόνων. Ejusdem est mentio in Synodo Bracharensi I. Can. XVIII. & Toletana IV. Can. III. apud Nicolaum & Leonem, Pontifices Maximos, quos citat Gratianus in Can. Si Romanorum, Dist. XIX. Romani e-*
men-

mendatores Gratiani, codicis hujusce tribus exemplaribus MSS., cum Decretum emendarent, se usos profitentur; eumque non codicem Ecclesiæ universæ esse, sed Romanæ, qui tamen sit ex illo expressus. Hoc etiam video a doctis viris animadversum, codicem hunc Canonum pluribus nominibus aliis appellari. Nam & Corpus Canonum, ut de Antonio Augustino diximus; & liber Canonum, & liber Constitutionum Apostolicarum dictus est. Postrema hæc appellatio legitur in Synodo Nicæna II. act. II. *Tharasius sanctissimus Patriarcha inquit: Legatur Canoniarum Constitutionum liber.* Porro in hunc librum, tanquam in locum certum, Canones a veteribus sunt collati, editi in Conciliis, ne mentes hominum incerto ullo jure unquam jactarentur; causasque affert Lefchassierius in ea, quam supra memoravi, consultatione. *Voluerunt, inquit, Patres, Ecclesiam habere corpus certum regularum sui Juris, quas ex certis Conciliis collegerunt, & Concilia certo ordine disposuerunt, certoque, & immutabili numero Canones illorum complexi sunt; cui neque addi, neque detrahi a quoquam posset; ut, hoc quasi vallo & muro septum, Juris corpus adversus falsi crimen undique tutum esset. Neque tantum, ut falsum prævenirent, solebant veteres jura sua in certa corpora colligere, sed etiam, ut cum omnem juribus, extra collectiones, publica auctoritate factas, vagantibus & dispersis adimerent.* Eademque causæ Theodosio & Justiniano Imperatoribus fuere, cur codices quisque suos

28 DE JURE PONTIFICUM

conficerent, & in eos, Imperatorias Constitutiones, in plurima volumina dispersas, inferrent; ne aliter quam ex ipsis codicibus eæ in judiciis proferrentur. Ceterum hi Canones, de quibus adhuc dictum est, quamquam codice memorato comprehensi, in diptycha præterea Ecclesiastica inferi consuevere. Testis ejus rei est locuples Justinianus in L. VII. C. de summa Trinitate; cujus hæc sunt verba ex Græco versa: *Nullus itaque, inquit, frustra nos turbet, spe vana innixus, quasi nos contrarium a supradictis quattuor Conciliis fecerimus, aut faciamus, aut fieri a quibusdam permitamus, aut aboleri eorundem sanctorum quattuor Conciliorum piam memoriam ex dictis Ecclesia diptychis sustineamus*. Id ipsum comprobatur sexta Synodo collat. II. Nam sanctas, inquit, quattuor Synodos majestas ipsius (nempe Justiniani) sacris diptychis inferi & publicari fecit; quod ante imperium ei divinitus concessum non procedebat. Porro codex ille Concilio deinde Chalcedonensi confirmatus est, cui DCXXX. Episcopi interfuere, seculo quinto fere medio; deinde etiam Novella CXXXI. Imperatoris, cujus jam supra meminimus. Idque ansum dedit doctissimo viro Eichelio, in præfatione ad Procopii ἀνέκδοτα, ut diceret, eum codicem esse partem quamdam Juris Justiniani. Et certe apparet, Justinianum ex eo codice Constitutiones suas Ecclesiasticas derivasse, quæ in libris Codicis atque Novellarum exstant. Græci deinde Codicem, seu Corpus Canonum adauxere;

re; scilicet Canonibus LXXXV. Apostolorum , de quibus suo loco postea disceptabimus; Canonibus quibusdam Concilii Sardicensis; Africæ Conciliis; Canonicis Epistolis Theophili , Dionysii, Petri , Athanasii , Timothei , Alexandrinorum Episcoporum ; Gregorii præterea Neocæsariensis , Basilii , Nysseni , Gregorii Theologi , Amphiloerii , Iconii & Gennadii , Patriarchæ Constantinopolitani. Eundemque eo modo auctum deinde confirmavit Synodus Nicæna II. quæ habita est anno DCCLXXXVII. Ac Christophorus Justellus , aliique docti viri , ex hoc codice Jus Canonicum , quod nunc vocamus , originem suam duxisse omnino existimant; eademque Canonum collectione utramque Ecclesiam cum Orientis , tum Occidentis diu usam esse; atque ex Oriente in Occidentem , & Africam Canones , eorumque collectiones pervenisse. Hoc præterea viri judicio summo , ac sapientia præditi animadverterunt , Ecclesiam Occidentalem ante Concilii Nicæni tempora nullos fere Canones habuisse , sed Sacrarum Scripturarum libris , ac non scripto jure uti consuevisse; post Concilium vero Nicænum ejus solos Canones recepisse usque ad Innocentium I. qui seculo V. ineunte Pontificatum Maximum adeptus est . Id ostendit ipsius Epistola ad Clerum Constantinopolitanum , quæ legitur apud Sozomenum libro VIII. cap. XXVI. Cujus hæc sunt verba , sic latine reddita : *Nos enim , inquit , quantum ad Canonum obser-*

observantiam attinet, illis obsequendum esse scribimus, qui Nicææ determinati sunt; quibus solis obtemperare, & suum suffragium addere Ecclesia Catholica debet. Si qui vero & alii quibusdam proferuntur, qui a Canonibus Nicænis discrepant, & ab Hæreticis compositi deprehenduntur, hi vero ab Episcopis Catholicis rejiciuntur. Hæreticorum enim commenta Catholicis Canonibus adsuere non licet; semper enim vel per contraria, vel per illicita labefactare student voluntatem Concilii Nicæani. Non solum igitur his non obtemperandum esse dicimus, sed ipsa potius una cum Hæreticis, ac Schismaticis dogmatibus esse condemnanda; quomodo & antea in Sardicensi Synodo ab Episcopis prædecessoribus nostris factum est. Porro prima hæc Canonum collectio, de qua adhuc dictum est, causa quodammodo, & occasio fuit reliquarum, quæ deinceps adornatæ sunt. Novis enim editis Canonibus, industria plurimorum excitata est, ut illi ipsi in certa quædam corpora conjicerentur. Sic Stephanus, Episcopus Ephesus, qui Magni Theodosii ævo floruit, Concilii Constantinopolitani I. Canones collegit, addiditque Canonibus Nicænis, Ancyranis, Neocæsariensibus, Gangrensis, Antiochenis, ac Laodicensis; quodque nunquam antea contigerat in collectionibus Nicænis, operi præposuit nomen suum. Deinde Dionysius consecutus est, Exiguus cognomento; de quo cum tam multa a veteribus scripta esse videam, pauca quædam pro re ac tempore, ego addam, quæ vobis non ingrata fore arbitror. Fuit is Scythæ, Mona-

Monachus instituto, ac deinde Abbas. sub Theodorico Rege, ejusque successoribus inclaruit. Plurima scripsisse fertur; in his veteres numerant Paschalem Cyclum, Proteriana, & Codicem, nunc vulgo dictum Dionysianum. Quem Beda, Trithemius, Baronius, Bellarminus laudibus cumularunt. Ex omnibus Cassiodorus, cujus hæc sunt verba: *Fuit, inquit, nostris temporibus, Dionysius Monachus, Scythæ natione, sed moribus omnino Romanus; in utraque lingua valde doctissimus, reddens actionibus suis, quam in libris Domini legerat æquitatem; qui Scripturas Divinas tanta curiositate discusserat atque intellexerat, ut, undecunque interrogatus fuisset, paratum haberet competens sine aliqua dilatione responsum. qui mecum Dialecticam legit & in exemplo gloriosi magisterii plurimos annos vitam suam, Domino præstante, transégit. Pudet me de consorte dicere quod in me nequeo reperire. Fuit enim in illo cum sapientia, magna simplicitas; cum doctrina humilitas; cum facundia loquendi parcitas: ut in nullo se vel extremis famulis anteferebat, cum dignus esset Regum sine dubitatione colloquiis — qui petitus a Stephano Salonitano Episcopo, ex Græcis exemplaribus Canones Ecclesiasticos moribus suis, ut erat planus atque disertus, magna eloquentia luce composuit, quos hodie, usu celeberrimo, Ecclesia Romana complectitur — Qui tanta latinitatis & græcitatis peritia fungebatur, ut quoscunque libros Græcos in manibus acciperet, Latine sine offensione transcurreret; iterumque Latinos Attico sermone legeret, ut crederes, hoc esse conscriptum, quod os ejus inof-*

inoffensa velocitate fundebat. Vixit temporibus Justiniani Imperatoris. Cumque in Romana Ecclesia minus accurata versio Græci codicis versaretur, ad novam ipse & accuratiorem aggressus est; quam etiam auxit Canonibus aliorum Conciliorum, & aliquibus Pontificum Epistolis Decretalibus. Igitur Dionysianus codex in duas divisus est partes, quarum altera Canones Conciliorum, partim Græcos, partim Latinos continet; eaque pars, codex Canonum Ecclesiasticorum inscribitur. Altera vero pars Epistolas Decretales Pontificum Romanorum complectitur; eaque vocatur, collectio Decretorum, quam exorsus a Siricii Pontificatu, usque ad tempora Anastasii perduxit. Nam quæ Decreta ab Hilario ad Gregorium juniorem inveniuntur, ea ad collectionem hanc primam Dionysianam nequaquam pertinent, sed ab aliis Dionysio posterioribus adjecta sunt. Ceterum collectio hæc Decretalium missa a Dionysio est ad Julianum Presbyterum titulo sanctæ Anastasiæ, qui sub Felice Pontifice, Dinamio & Siphidio Cofs. Synodus subscripsit in Urbe celebratis. Eaque ipsa est collectio, quam Zacharias Pontifex in Epistola ad Pipinum, & Episcopos Galliæ librum Decretorum vocat, atque ex eo Siricii, Innocentii, Leonis, & Gelasii capita nonnulla memorat. Porro de auctoritate codicis hujusce Dionysiani sic est intelligendum, privato illum studio susceptum esse; Dionysiique propositum fuisse, non Ec-

cle-

clesiæ Romanæ usui ut illum conderet, sed hominum amicissimorum, qui pristini codicis lectione obscura ac perturbata plurimum offende-
bantur: ubi autem apparuit; tanti habitum, ut Romana Ecclesia receperit & approbarit; si quædam tamen, eaque non pauca, excipiantur, quæ Pontifices rejecere, utpote contraria Ecclesiæ Romanæ disciplinæ. Is codex, qui Corpus etiam Canonum a Romanis Gratiani Emendatoribus in præfatione Decreti, & in c. I. dist. XIX. appellatur, Carolo Magno Imperatori, cum in Urbe esset, ab Hadriano I. Pontifice Maximo traditus est, ut ex eo Ecclesiæ Occidentis regerentur. De qua re Sirmundus doctissime, hoc est more suo, tomo II. Conciliorum Galliæ disputat. Neque hoc reticebo, in plurimis exemplaribus codicis ejusdem præpositam inveniri Epistolam Hadriani ad Carolum versa oratione, cujus hoc est initium:

Divina fulgens doctrina sceptrâ præcellit Regni

Origo Regum felix, semper genitura beata &c.

quæ apparet esse indicia, ac monumenta seculi barbarie obruti. Sed quoniam is codex ad plurimas Ecclesias Occidentis post manavit, paucis ostendamus, quemadmodum ea res gesta sit. Ac primum quidem, ut ordiar a Gallis, postquam Hadrianus eum codicem Carolo Imperatori commendavit, Ecclesia Gallicana probavit ac recepit; nec verum esse arbitror, quod Petrus a Marca contendit, fuisse in usu apud Gal-

E

los

los statim ac fuit editus, hoc est, ante Imperatoris tempora. Jacobus Sirmundus, Justellus, Paschasius, Petitus tam magnas ac multas congestere rationes, ut mihi nugari videantur, qui contra sentiunt. Ad hæc Justellus de codice hoc disputans in Gallia recepto, animadvertit, duplicem fuisse; unum, quem cum Ecclesia universa, Gallia recepit; alterum, qui Gallicanos Canones habuit. Canonum Gallicanorum circa Dionysii tempora loca aliquot inveniuntur, in quibus aperta est mentio. Nam Gratianus Can. Si quis Diaconus, dist. L. testimonium Hormisdæ Pontificis Maximi affert in hæc verba: *Secundum titulos antiquorum Patrum, Sancto Spiritu suggerente, conscriptos, & secundum sententias CCCXVIII. Episcoporum, quas etiam Gallicani Canones continere videntur, clerici in adulterio deprehenso &c.* Deinde in Can. XI. Concilii Tarraconensis anno DXVII. habiti, hæc sunt: *Ut nullus Monachorum forensis negotii susceptor, vel exsecutor existat, nisi id quod Monasterii poscit utilitas, Abbate sibi nihilominus imperante; Canonum ante omnia Gallicanorum de eis constitutione servata.* Sed codex Gallicanus, temporis progressu, Canonibus Africanis, & aliorum Conciliorum auctus fuit; quod colligitur ex Can. VI. Concilii Matifconensis, quod anno DLXXXVIII. celebratum est, cujus hæc sunt verba: *Jam enim, inquit, de tali causa & in Conciliis Africanis definitum est, quam definitionem nostro quoque dignam duximus sociare decreto, & adlocare; ut Sa-*
cra-

cramenta Altaris nonnisi a jejunis celebrentur. Aliquot etiam adauctum Decretalibus Epistolis Pontificum Romanorum insignis probat Canon IX. Concilii Agathensis, quod anno DVI. habitum est; quo loco Siricii Decretalis assumitur, & Canonibus inseritur; eaque Siricii est Epistola ad Himerium Tarraconensem, quæ legitur in codice Canonum Ecclesiæ Romanæ. Codicem deinde Hispani recepere: isque, ut apud Gallos, itidem in Hispania duplex fuit; nempe alter fuit antiquus ille Ecclesiæ universæ, quem docti viri existimant, eos a Romanis accepisse. Alter autem est codex quidam Canonum proprius Hispanorum; in quem nimirum Canones collati Synodorum, quæ habitæ fuissent in Hispania; quorundam etiam, quæ in Gallia; additis nonnullis Pontificum Romanorum Epistolis Decretalibus. Et quidem, quod attinet ad codicem priorem, habere illum primo potuere ex antiqua Latina, postea etiam ex nova Dionysii Exigui versione, usque ad Martini Bracharensis Episcopi interpretationem. Solet is codex Hispanus Ecclesiæ universæ, nomine appellari Canonum Priscorum, item Antiquorum Canonum, & Codicis Canonum. Nam in subscriptione Concilii Toletani II. hæc leguntur: *Salva auctoritate priscorum Canonum*. Deinde in Concilii Bracharensis I. Can. XVIII. hæc sunt: *Lucretius Episcopus dixit: Necessarium arbitror, si vestra fraternitati videtur, ut instituta Sanctorum Patrum, recensitis antiquis Canonibus innotescant*. Po-

stremo in Concilii Toletani IV. Can. III. hæc verba habentur: *Diaconus codicem Canonum in medio proferens, capitula de Conciliis agendis pronuntiat.* Quod vero pertinet ad codicem posteriorem, conflatum illum esse ex Canonibus Conciliorum Hispaniæ & Galliæ; præterea Epistolis quibusdam Pontificum Decretalibus, apparet ex plurimis locis, quæ loca ample retulit Justellus, ut nihil hic a me necesse sit commemorari. Habuit eum codicem, Ecclesiæ nimirum universæ, etiam Britannia; sed duplex ne, an simplex fuerit; tum quo tempore huc delatus, vel receptus, non satis liquet. In Antiquitatibus Ecclesiæ Britannicæ hoc legitur, Theodorum Archiepiscopum librum protulisse, qui PATRUM CANONES vocabatur; quem etiam in Concilio Herefordiensi probatum fuisse, ex lib. IV. Historiæ Ecclesiasticæ Venerabilis Bedæ conjicere licet. De Germanis, quem codicem habuerint, & quam collectionem, in tanta temporum caligine, & silentio Historicorum, pæne latet. Id notum est, temporibus Riculphi, Episcopi Moguntini, Isidori Mercatoris collectionem, de qua postea, in has regiones delatam esse. De Africa postremo paucula dicamus. Omnino certum est, & peculiarem quemdam, & communem illum Ecclesiæ universæ ibidem codicem fuisse. De codice universæ fidem facit Fulgentius, Ferrandus, Ecclesiæ Carthaginiensis Diaconus, de cujus collectione deinceps verba faciemus. Peculiaris

liaris autem Afrorum codex ex Conciliis collectus est, habitis in Africa, cujusmodi Concilia Carthaginensia fuere, Hipponense, Milevitanum. Sed hæc hætenus. Sentio enim, me fortasse Scholæ modum excessisse. Reliquis tribus Enarrationibus cetera expediemus; in quibus de genuinis, ac suppositis Canonibus atque Decretalibus sermo erit. Non minus enim, meo judicio, juvabit excussisse falsa, quam extulisse vera. Oro, obtestorque, ut frequentia eadem ac benevolentia huc reveniatis, qua hodie convenistis.

D I X I.



DE



DE JURE PONTIFICUM UNIVERSO ACROASIS II.



US Canonicum, quod vocamus, a temporibus Nicænis originem duxisse, superiore Enarratione demonstratum est. Id quoniam plures sunt, qui pernegant; contenduntque a Canonum collectione, & Constitutionum Apostolicarum, quæ tribuitur Clementi, repeti oportere, de tota hac re paullo diligentius disceptemus. Fuit is Clemens Romanus, Faustini filius, familia senatoria. Pontificatum Maximum annos IX. & menses VI. totidemque dies obtinuit. Scripta plurima reliquisse fertur; in his Liturgiam; Petri, & Appionis disputationem; Recognitionum libros; ad Jacobum, & Corinthios Epistolas; Encyclicas; præterea libros octo Constitutionum Apostolicarum, quibus adjunguntur Canones Apostolorum. De reliqua scriptura alii vide-

viderint. Mihi de Canonibus, & Constitutionibus Apostolicis erit inquirendum, veri ne, germanique partus sint, an suppositi; tum recte ne, an perperam istiusmodi collectio Clementi tribuatur. Sunt qui affirmant, & Clementem collegisse, & collectioni huic nihil falsi inesse. In his Carolus est Bovius, Episcopus Ostunensis, Franciscus Turrianus, ac Thomas Stapletonus, qui in Def. Eccl. auct. lib. II. cap. II. contendit, earumdem Constitutionum librum *spiritu Apostolico plenissimum esse*. Et in princ. fid. doctr. contr. V. q. II. art. V. *nullam rationem ob stare quin, si præsens Ecclesia referret has Constitutiones Apostolicas, a Clemente editas, in Canonem Sacra Scripturæ; nos eas pro Canonicis admittere debeamus, æque atque Epistolam Jacobi*. Hæc eadem sensisse Alatum apparet, qui dial. III. cap. V. multis in hanc ipsam rem disputat. Summo, inquit, *Dei beneficio Clementis διατάξεις, & Cyrilli κατηχήσεις, multis seculis reconditæ, ad reprimendam Magdeburgensium, & Apologeticorum istam contra Sanctos insolentiam, in lucem prodierunt*. Quorum certe testimonia, etiamsi alia deessent, homini non nimis praefracto, ad hanc totam, qua de agitur, questionem sufficere possent. Sed viros istiusmodi, quamquam sint illi quidem copia doctrinarum excultissimi, insigniter deceptos esse, hominum doctissimorum auctoritatibus, ac firmissimis rationibus ostendam. Quod pertinet ad auctoritates, Baronius ad Ann. XXXII. §. XVIII. cum sibi ex libris hisce de Maria Ma-

gda-

gdalena quædam objecisset, tamquam alia a Maria Lazari sorore: *Uno verbo*, inquit, *his liberari possemus, si apocryphum esse librum exciperemus. sane quidem, si hac dicta sunt a Clemente, quomodo ea latere potuerunt tot antiquos Patres, qui de ea re scripserunt? Cum præsertim tanti Auctoris præcipua fuerit auctoritas in Ecclesia; ut, licet ejus Epistola ad Corinthios scripta, penitus exciderit, tamen, quod sapius citata reperiatur, pane reviviscat integra in fragmentis.* Gabriel Albaspinæus *Obser. Eccles. lib. I. cap. XIII. p. XXXVII.* non tantum apocryphos Clementis libros censet, sed hos præterea, qui aliter sentiunt, insimulat stultitiæ. Certe, inquit, *si quis esset, qui Canones Apostolorum, & Divi Clementis Constitutiones, Apostolorum auctoritate sanctitas, publicatasque certo affirmaret, imperitus censeretur. Nam qui antiquarum consuetudinum gnari, quo quidque tempore, aut loco observari desitum est, aut mutari ceptum norunt, de iis ne quidem dubitare possunt.* Quæ deinde ille pluribus confirmat; & nos etiam post paullo confirmabimus. Nec mihi deest auctoritas viri omnium doctissimi, Petavii; nec gravissima testimonia Bellarmini, Jacobique Davii Perronii, amborum Cardinalium, quorum loca fideliter excerpti. Ac Petavius quidem ad Epiphanium in expositione *Fid. pag. CCCXXXIX. & CCCLX.* aperte *Pseudo-diataxin* Clementis vocat. & in *Dogm. Theolog. tom. II. lib. I. de Trinit. cap. III. §. VII. pag. XV.* *Poterat*, inquit, *ante omnes alios, nempe Athenagoram, Ta-*
tia-

tianum, Theophilum, Irenæum, *vetustatis unius nomine, commemorari Clemens Romanus; siquidem germana essent, quæ illius inscripta nomine circumferuntur, sed non sunt. Hic igitur in Constitutionibus Apostolicis ridiculum nescio quid, et) hæreticum posuit. Perronii sententia lib. II. cap. I. de Eucharist. p. CLXXIV. legitur; cujus hæc sunt verba de Constitutionibus: Hoc opus, inquit, a multis gravibus auctoribus veteris ac recentioris memoriae in dubium vocatur. Epiphanius hæres. Audian. libri meminit id nomen præferentis; atque multos suo tempore in dubium revocare. Se vero eum nequaquam rejicere. Synodus Constantinopoli in Trullo, multis post Epiphanium temporibus sub Justiniano Rhinotmeto habita, opus condemnat. Photius in Bibl. cod. CXIII. ipsa illa Synodo recentior, vix Arianismo purgari posse ait. Quod suspicari cogit, librum hunc vel non eundem esse cum eo, qui Epiphanii tempore censebatur; vel certe ab Arianis postea corruptum, adulteratumque fuisse. Sane multa apud veteres inde descripta reperiuntur, quæ cum iis quæ nunc circumferuntur, exemplaribus non congruunt. Cardinalis Bessarion Marco Ephesio Sixt. Senen. in Biblioth. Sancta quemdam ex his Constitutionibus locum objectanti, respondet, Opus esse apocryphum. Idem etiam lib. I. Replic. cap. XXIV. scribit: Quæ Clementis nomine Apostolica Constitutiones circumferuntur, non sunt ejus fidei ut in rebus ad religionem pertinentibus, auctoritatem habeant decisivam; sive enim ab initio Clementis nomine suppositus, sive ab hæreticis postea interpolatus, atque adulteratus fuerit*

F

hic

hic liber, constat suspectam esse ejus auctoritatem. Ea autem quæ affert Bellarminus, ita perspicue ostendunt fictas, suppositasque istiusmodi Constitutiones esse, ut nullus dubitationi locus relinqui videatur. Afferam ego verba ejusdem Bellarmini, quæ si prolixius a me recitari aliquis opinetur, rei magnitudini idtribuendum putet. Is igitur in lib. de Script. Eccles. in Clemente, cum hujus Recognitiones inter apocrypha retulisset, de Constitutionibus hæc subjecit. De libris, inquit, Constitutionum Apostolicarum, quæ Clementi auctori tribuuntur, idem fere judicium fieri debet, ac de libris Recognitionum. Deinde addit: Multa in illis utilia sunt, & a Græcis veteribus magni fiunt; sed in Ecclesia Latina nullum fere nomen habere, ipsosque etiam posteriores Græcos in Concilio Trullano Can. II. improbare has Constitutiones, ut ab hæreticis depravatas. Audio, Aethiopes his Constitutionibus uti, ut vere Apostolicis, & ea de causa in erroribus versari circa cultum Sabbathi, & diei Dominica, & circa ministerium sacramenti Baptismi, & in aliis quibusdam dogmatibus. Nam lib. VII. cap. XXIV. jubent servari diem & Sabbathi, & Dominica; & lib. V. Constit. cap. X. prohibetur absolute, ne Laici baptizent; & lib. VI. Cap. XV. jubent rebaptizari eos, qui baptizantur ab hæreticis, ea de causa, quia hæretici non sunt Sacerdotes. Ac ne forte objiceretur, quod Philippus Diaconus baptizabat, ut dicitur Act. VIII. in iisdem Constitutionibus lib. VI. cap. VII. dicitur, Philippum, qui baptizavit Simonem Magum, fuisse Apostolum

*stolum; quod manifeste falsum est . Habentur in iisdem Constitutionibus alia non pauca, quæ abhorrere videntur a veritate ; ut quod lib. III. cap. II. quartas nuptias appellent manifestam fornicationem; lib. V. cap. VI. distinguant Mariam Magdalenam a Maria sorore Lazari; lib. VIII. cap. XIV. Jacobum fratrem Domini, velint esse Apostolum ex duodecim; & lib. eodem cap. XXVI. XXVII. & XXVIII. velint imponi manum Subdiacono, & Lectori, & ipsi etiam Diaconisse, dum ordinantur; & lib. eodem, cap. XXXII. dicant, Exorcistas non ordinari; & cap. XXXVIII. dicant, ancillam soli domino obsequentem recipi; si cum aliis intemperans fuerit, rejici. Hi igitur, quos hætenus commemoravi, si libros Constitutionum Apostolicarum, sub nomine Clementis, pro dubiis, incertis, apocryphis, falsis, corruptis, adulteratis, nec ullius fidei, vel auctoritatis in rebus ad religionem pertinentibus esse affirmant, bono etiam jure, e Canonum, & Constitutionum Apostolicarum numero ipsi deturbabimus, neque ex iis Juris Canonici originem repetemus. Neque hoc loco omittam Humberti Cardinalis testimonium, Sylvæ Candidæ Episcopi, qui in Disputatione de jejunio Sabbathi contra Nicetam anno M L. apud Gratianum dist. XVI. Can. III. hæc habet: *Et hoc asserere conaris ex apocryphis libris, & Canonibus pari sententia Sanctorum Patrum repudiatis. Nam Clementis librum, idest Petri Apostoli Itinerarium, & Apostolorum Canones numerant Patres inter apocrypha, exceptis L. Capitulis,**

44 DE JURE PONTIFICUM

*quæ decreverunt orthodoxæ fidei adjungenda. Unde nos quoque omne apocryphon abjicientes, dedignamur audire eorum fabulosas traditiones, quæ non sunt ut lex Domini. Ex quibus verbis id arbitror animadvertendum, Humbertum libros Constitutionum, & Itinerarium, quod vocant, Petri, pro iisdem habere, contra ac fecit Bellarminus; & a Gelasio inter apocrypha relatum putare. Id si verum est, apparet seculi V. anno XCIV. ab Ecclesia Romana inter apocrypha relatas hæc Constitutiones Humbertum existimasse. Hanc enim ejus sententiam verba illa, quæ supra recitavi, jam videntur indicare: *Pari sententia Sanctorum Patrum repudiatis*. Porro ante Gelasii tempora satis constat, nullam mentionem apud veteres harum Constitutionum Apostolicarum inveniri, sub nomine Clementis editarum; non apud Hieronymum in Catalogo; ex quo colligitur, illi notas non fuisse; non denique apud alium quempiam Latinorum; quod tamen fieri omnino debuisset, si Clemens edidisset. Video quidem, Epiphanium, qui floruit seculi IV. anno LXXV. illarum meminisse, librorum suorum multis locis; sed hunc eundem etiam video hæresi LXX. §. X. dubiæ fuisse fidei apud multos affirmare. Quinimo Petavius ac Dallæus, quod multa in Constitutionibus ab Epiphanio commemoratis, his contraria, quas Bovius ac Turrianus meminerunt, inveniantur, contendunt non easdem esse Epiphanii & Bovii Constitutiones. Quod perti-*

pertinet ad Cyrilli Hierosolymitani locum; qui in Catechesi XVIII. pag. CCXIII. fabulam Phœnicis ex libro Clementis V. Constitutionum Apostolicarum affert; quem locum late Bovius enarravit; facilis est responsio, si dicamus, eam fabulam in vera, germanaque Epistola priore Clementis ad Corinthios inveniri, unde illam sumfit auctor Catecheseos. Quamobrem Rigaltius in obs. ad lib. Tertull. de Resurrectione inde colligit, alium Epistolæ a Constitutionum auctore omnino esse: *Etsi*, inquit, *ejusdem Phœnicis historia exemplum reperiatur etiam in Constitutionibus supra citatis, tamen ex earum cum Epistola Clementis comparatione hoc videmur assequi, vix esse, ut ejusdem auctoris utrumque opus censeatur debeat.* Testimonium alterum, quod ex Athanasio, & Eusebio affertur de libro excerptum, qui διδαχὴ τῶν ἀποστόλων olim appellatus, apud aliquos in usu fuit, communiter tamen pro spurio habitus est, nihil quicquam facit ad Constitutiones. Facile enim est, ex Athanasio ipso intelligere, hæc διδαχὰς ἀποστόλων esse alias ab Operibus Clementis. Nec Eusebius lib. III. cap. XXV. has tribuit Clementi. Nam in aliis locis, quibus de spurii Clementis, & scriptis genuinis agit, hæc διδαχὰς ἀποστόλων non tribuit Clementi. Quatuor igitur primis seculis verum est, apud Græcorum neminem mentionem ullam Constitutionum Apostolicarum factam inveniri. Mitto alia testimonia & auctoritates hominum gravissimorum; in
his

his Antonii Augustini, qui pluribus in hanc ipsam rem acute & solide, nempe ut solet semper, disputat Dialogo I. lib. I. Venio nunc ad rationes; in quibus afferendis (sunt enim plurimæ) modum adhibebo; ne & vobis molestus sim; & ut cetera citius expediam bene multa, quæ supersunt. Primum igitur hoc quæro, si istiusmodi Constitutiones Apostolorum sunt, cur neque Græci, neque Latini, cum aliis una Apostolorum scriptis, inter Canonicas non receperint Scripturas? quod fieri omnino oportuisset, si revera essent Apostolicæ. Aliquid enim Apostolorum esse, & non relatum esse in Canonem Scripturæ, Theologi hoc ajunt, in numero contradicentium oportere collocari. Hoc eodem argumento usum esse video Bellarminum de Scriptor. Eccles. in Petro, in rejicienda Christi quæ scripta esse dicitur ad Abgarum Epistola. *Ea, inquit, numquam fuit admissa ab Ecclesia inter Scripturas Canonicas; inter quas sine dubio admissa fuisset, si ab ipso Domino scriptam fuisse constaret.* Deinde in libris hisce mentio facta est controversiæ Paschalis; quæ tamen controversia orta in Ecclesia est seculo secundo, ut superiore Enarratione demonstravimus; ob quam causam Concilium coactum est. Itaque consequitur, post seculum saltem secundum, auctorem Constitutionum existisse; neque omnino esse Apostolorum. Porro cujus amentię esse dicam, quod lib. VII. cap. XXXXVII. legitur? *De Episcopis*, inquiunt,
qui

qui a nobis, dum viximus, ordinati sunt, certiores vos facimus. Etiam si diem supremum suum Apostoli obiissent, fari tamen, ac loqui poterant; Canonesque condere, & Constitutiones. Hæc omnia ostendunt & inscitiam auctoris, & hunc ipsum, post obitum Apostolorum, jam vixisse. Præterea qui unquam fieri potuit, ut Apostoli, si Constitutiones hæc condidissent, in his negarent, Christum Dei filium, Deum esse, quem tota vita, sanguine etiam talem prædicassent? Atqui lib. VI. cap. VI. hæc leguntur: *Alii ex iis (nempe hæreticis) suspicantur, ipsum Jesum esse Deum super omnia*. Quæ non Apostolorum voces sunt, sed eorum, qui vel Ariani, vel Photiniani, vel Ebionæi essent. Quibus rebus Petavius adductus tom. II. Theol. Dogm. pag. XV. pronuntiavit, *Clementem ridiculum nescio quid & hæreticum de Trinitate posuisse, lib. II. cap. XXVI. Nam Episcopum in Ecclesia instar Dei Patris esse ait; Diaconum itidem ut Christum, qui Patri adstipit, & in omnibus ministrat; quæ, si Christus ut homo est, considerentur, non improbe dicta videri possunt. sed pestilens est quod addit, Diaconissam, figuram Spiritus Sancti habere; quæ nihil sine Diacono facere debeat, aut loqui; quemadmodum neque Paracletus a seipso aliquid loquitur, aut facit, sed Christum glorificans, voluntatem illius expectat. Quod quidem Macedonianum pus, ac venenum sapit. Photius de Clementis Operibus agens cod. CXIII. in Constitutionibus asserit, quædam inesse Christianæ impietatis vestigia, quæ nonnisi*
violenter

violenter excusari possint; cujusmodi iste locus fuerit, quem adduximus, neque alius modo ad similem labem implicatus occurrit. Illa ridicula, ac vana omnino, quæ præcipiuntur in celebratione Eucharistiæ lib. VIII. cap. XII. Duo Diaconi ex utraque parte altaris teneant flabella ex tenuibus membranis, aut ex pennis parvionis, aut ex linteo, ut parva animalia volitantia abigant, ne in pocula incidunt. Quid deinde hæc, quæ lib. II. cap. LVII. inveniuntur? quo loco de libris suis legendis sic præcipiunt Apostoli: Deinde, inquit, *Acta nostra legantur; item Epistola Pauli cooperarii nostri; et postea Diaconus, aut Presbyter legat, quæ ego Matthæus et Johannes tradidimus vobis, et quæ Pauli cooperarii nostri. Marcus et Lucas acceperunt, et reliquerunt vobis.* Numnam hæc vobis videntur esse Apostolorum, an potius hominum otiosorum turpissime mentientium? Johannis Evangelium tum demum scriptum est, postquam is Pathmo revocatus est, nempe a Christo nato anno LXX-XXVII. quo tempore plerique omnes Apostolorum diem obierant. sed alia quædam afferamus. Lib. VI. cap. VI. Ebionæorum commemoratio fit; qui tamen ex Epiphanio & Baronio, everfis Hierosolymis, tum demum exstiterunt; quo tempore omnino constat, Petrum, Jacobum, Paullum, & alios ex Apostolis vita functos; qui tamen in libris hisce, tamquam Constitutionum conditores inducuntur. Versus Sibyllini de Resurrectione lib. V. cap. VI. reci-
tan-

tantur, cum Opera Sibyllina sub Antonino Pio, & Marco Aurelio, hoc est, XXX. aut XL. annis post omnium Apostolorum obitum, conficta demum sint. Postremo lib. VI. cap. XXIV. traditur, *Romanos in Deum credidisse, & a Deorum multitudine atque injustitia discessisse*; quod tantum contigit seculo IV. Constantino imperante. Arbitror ex his satis constare, non esse has Constitutiones Apostolorum, nec collectas a Clemente; ac de hoc quidem, quod eas non a Clemente, sed ab ipsis Apostolis patroni Constitutionum scriptas dicunt; Clementis vero, tamquam ministri, ejusque qui ad Episcopos, & Ecclesias detulerit, meminerunt; quemadmodum traditur lib. VI. cap. XIV. & lib. VIII. cap. IV. Deinde quod nec Epiphanius, nec Athanasius, aut Eusebius unquam Clementi tribuunt; postremo quod ne ipsi quidem Clementi in ejus Epistola priore ad Corinthios vera, germanaque cognitæ Constitutiones illæ fuerint; non postea Irenæo, Athenagoræ, Justino, Clementi Alexandrino, Tertulliano, Origeni, Cypriano, Dionysio, aliisque, quos longum esset commemorare. Sed jam de Canonibus, qui dicuntur Apostolorum, videamus. Eos Franciscus Turrianus, doctus vir, ac pius, adversus Magdeburgenses Centuriatores, singulari edito opere, defendit; Lambertusque hunc secutus; alii. Sed, quod Græco est in proverbio, posteriores cogitationes esse meliores; sic posterior ætas certiora de

G

his

his Canonibus, illorumque numero constituit; ut feliciores nos omnino simus, temporibus his nati, quam multi ex majoribus nostris. Igitur in re satis disputata paucis me expediam. Ac primum convenit inter eruditos, hos Canones nec Apostolis, nec Clementi, ut illorum amanuensi, posse adscribi. Si enim Apostolos auctores habent, cur Canonicis Sanctarum Scripturarum libris non censentur? Cur ætatis illius Patres prorsus ignorarunt? vel si noti illis cognitique jam fuere; eosque crediderunt ab Apostolis constitutos; quare usi non sunt illorum auctoritate in difficultatibus gravissimis; easque ipsorum vi ac pondere non compressere? Deinde si quis sit, qui Canones hos perlustret, ita clara omnia & explicata inveniet, ut de illorum sensu atque potestate nulla dubitatio oboriatur; cum tamen tertio, & quarto seculo maxima contentione disputata sint. Postremo, ut plurima alia omittam, ea nunc in his Canonibus leguntur, quæ plane temporibus Apostolorum fuere ignota; neque cum ætatis illius moribus ac disciplina convenire possunt. At Damascenus Divinis Libris censuit. Verum: sed Baronius nimis inconsulte fecisse ait. At Synodus Trullana, Apostolorum esse pronuntiavit, Justinianus, Scholasticus, alii. Certe: sed Synodus Romana Episcoporum LXX. sub Gelasio I. Pontifice, Romæ habita, retulit inter apocrypha; quod tradit Gratianus Can. III. dist. XV. cujus auctoritas anti-

antiquissima, & Synodi, & Pontificis sapientissimi ceterorum omnium auctoritatem superat, de-
teritque. Vim, roburque addit Isidorus Hispa-
lensis, qui seculi VII. anno XXXIX. extremum
diem clausit; cujus Gratianus meminit in Can.
Canones, dist. XVI. *Canones*, inquit, *qui dicun-
tur Apostolorum*, seu quia eosdem nec Sedes Apostoli-
ca recepit, nec Sancti Patres illis assensum præbuerunt,
pro eo quod ab hæreticis sub nomine Apostolorum com-
positi dignoscuntur; quamvis in eis utilia invenian-
tur: tamen ab auctoritate Canonica, atque Apostolica
eorum gesta placet esse remota, atque inter apocrypha
deputata. Sed hæc fortasse temporibus hisce eru-
ditis nimia sunt, quibus admotæ faces ab ho-
minibus doctissimis tenebras diffilarunt plurium
seculorum. Sequitur de numero. Ut paucis rem
absolvam, hoc video, Ecclesiam Orientalem Ca-
nones LXXXV. dumtaxat numerasse, ac reli-
giosissime coluisse. Id facile intelligitur e Scho-
lastici collectione, & Synodo Trullana. Et omnino
quicumque ex Græcis Jus Canonicum tracta-
runt, nec plures, nec pauciores censuerunt.
Quod pertinet ad Latinos, constat, sententiam
Humberti Cardinalis, Sylvæ Candidæ Episcopi,
Leonis IX. Legati, cujus supra meminimus, ab
doctissimis quibusque accipi ac probari; quæ
etiam a Gratiano commemoratur. *Clementis*, in-
quit, *librum*, idest, *Petri Apostoli Itinerarium*, &
Apostolorum Canones numerant Patres inter apocrypha,
exceptis capitulis L. quæ decreverunt orthodoxæ fidei

tractatores adjungenda. Hanc etiam Ivo refert, sed pro, *Orthodoxæ fidei tractatores*, habet, *Orthodoxis regulis*; aptius. Sic in corpore Canonum ex Dionysii Exigui interpretatione, & in Isidori Mercatoris collectione L. hi Canones dumtaxat inveniuntur. Idque Gratianus ac veteres collectores referunt; item Romanus in libro Pœnitentium, & Ansegisus lib. I. Capitularium Caroli. Ceterum de antiquitate Canonum istorum, cum tam multa ab aliis dicta sint, nil ego dicam. Verba Albaspinæi tamen afferam, hominis gravissimi prudentissimique, quæ pluribus non satisfecerunt. Ea autem leguntur lib. I. Observ. XIII. *Sunt tamen, inquit, illi Canones, Constitutionesque antiquissimæ; multaque in illis excellentissima, et magni ponderis continentur. Nec dubito, quin olim Græcæ Ecclesiæ pro legibus, Manuali, Pontificali, Rituali, ut vocant, ac codice fuerint. Satis enim constat, nil quicquam in iis reperiri, quod Ecclesiastica quatuor primorum seculorum disciplina consentaneum non sit. Quod attinet ad Canones, existimo eos ita appellatos esse ab antiquitate; nam cum eorum aliquot ab Apostolorum successoribus, qui teste Tertulliano de præscriptione Apostolici viri nominabantur, facti essent; Apostolicorum primum Canones; deinde nonnullorum Latinorum ignorantia, aliquot litterarum detractiōne, Apostolorum dicti sunt. Pernegant initio, Canones hosce, & Constitutiones a Græcis habitas pro legum codice, ac rerum Manuali; idque inde intelligi, quod his doctrinæ capita contineantur,*

tur, quæ prorsus sint contraria doctrinæ illorum & institutis. Aperte hoc demonstrari vel Canone illo Sacræ Scripturæ, qui in ultimo Canone commemoratur. Deinde hoc postulant, si ante Synodum Nicænam exstitit is legum codex, cur Patres Ancyрани, Neocæsarienses, Nicæni, vel Antiocheni aut codici Canonum Ecclesiæ universæ non attexuerunt, aut saltem mentionem aliquam hujusce illustri antiquitatis monumendi non fecere? Postremo si codex ille legum a viris Apostolicis editus fuit, & ab Episcopis sancitus ante Concilium Nicænum, cur a Gelasio, & ab Episcopis LXX. inter apocrypha fuit relatus? Quod pertinet ad partem hanc, eos Canones non uno tempore conditos fuisse a viris Apostolicis, sed alios primo seculo, secundo autem alios, ac deinceps; somnium appellant. Canonum eorumdem implorant fidem, ex quorum lectione facile cognoscatur, non plures sibi succedentes auctores eos Canones habuisse, sed unum, eundemque; scilicet Apostolorum nomen, ut voluit, qui consarcinavit. Canon est XXVIII. contra Simoniacum; is habet Petrum auctorem. Verba hæc sunt: *Dejiciatur & ipse & ordinator ejus, & a communione modis omnibus exscindatur, ut Simon Magus a me Petro.* Est item alius, nempe XXXIX. his verbis: *Non enim dixit nobis (nempe Apostolis) Dominus, In morte mea baptizate, sed Euntes docete omnes Gentes, baptizantes &c.* Postremo, ut alii omittantur, est Canon LXXI.

in

54 DE JURE PONTIFICUM

in quo de sermo sermo est, cujus hæc sunt verba: *Qualis noster quoque Onesimus visus est*. Ex quibus intelligitur, id consilium fuisse ejus, qui conscripsit, ut vendicaret nomine Apostolorum, non Apostolicorum virorum, quemadmodum Albaspinæus existimavit. Hæc pluribus persecuti sunt Dallæus, Usserius, Rivetus, Melchior Canus, ut mihi nil necesse sit in hac re diutius immorari. Ut Juris igitur Pontificii historiam persequamur, reliquæ collectiones sunt expediendæ, quæ & variæ, & multæ sunt. sed, ut facilius eæ intelligantur, de multiplici, utilique ratione colligendi, pauca quædam prius dicam. Quinque autem modis Jus potissimum posse colligi, & revera adhuc collectum esse ab optimis quibusque, omnino video. Primum genus est, cum unius, aut plurium Conciliorum Canones colliguntur & enumerantur, eo ordine, quo in Conciliis editi sunt, temporis retenta ratione, ac serie numerorum. eaque collectio vel Corpus, vel Codex Canonum appellatur; de qua supra demonstratum est. Græci βίβλον κανόνων, vel ἀκολουθίαν κανόνων, hoc est, seriem, codicem, consequentiam, solent nominare. Secundus modus colligendi is est, cum una cum Canonibus acta colliguntur atque recitantur. Ejus Socrates lib. I. Hist. Eccles. cap. V. meminit. Tertius porro, cum Canones plurium Conciliorum, quæ ad unam eandemque rem pertinent, sub uno eodemque titulo, & inscriptione collo-

can-

cantur. Idque duplici ratione fieri consuevit. aliquando enim multorum Conciliorum Canones, qui ejusdem potestatis sint, & in eodem versentur argumento, titulo uno comprehenduntur, iique citantur tantum, verba non recitantur; & istiusmodi collectio Breviarium nuncupatur, quale Cresconii est; de quo suo loco. Aliquando & citantur Canones, & verba recitantur Canonum illorum, quibuscum convenit, & id appellant Canonum Concordiam; cujus rei exempla deinceps proferentur. Quarto autem modo hoc fit, ut & citentur Canones, & verba recitentur, deinde etiam Leges Imperatoriæ adjiciantur, quæ consentiunt cum Canonibus; & hanc collectionem appellant Nomocanone; qua in re Photius & Scholasticus excelluerunt. Quintus tandem modus hic est, cum, veluti acervo quodam, & Canones, & Leges, & Epistolæ Pontificum Decretales, Patrum denique sententiæ certis quibusdam titulis concluduntur; cujus rei exempla ac testimonia abunde suppetunt. His itaque expositis de modis colligendi, ad hos qui collegerunt, nunc deveniamus. Collectionem itaque Nicænam, ac Dionysianam Fulgentii Ferrandi collectio excepit; qui Justinianæ ætate, ac Justiniani floruit, & in Ecclesia Carthaginensi Diaconus fuit, ut ex Chronicis apparet Victoris Tununensis. Cum Fulgentio Episcopo Ruspensi vixisse diu fertur, eumque præceptorem habuisse. Ejus plures eximii viri
me-

meminerunt. In his Facundus Episcopus Her-
mianensis, & Cresconius in præfatione Brevia-
rii, quo loco, Reverendissimum Carthaginis Ec-
clesiæ Diaconum, Fulgentium appellat, ac de-
inde, virum sapientissimum. Plura hujus scripta
veteres commemorarunt; Paræneticum ad Re-
ginum; Epistolam ad Anatolium, duas ad Ru-
spensem, unam item ad Eugypium Abbatem,
alia. sed ex omnibus maxime celebratur Cano-
num collectio, de qua nunc sermo nobis est.
Hanc collectionem, cum Cresconii Breviario,
primus Pithœus edidit. Edita deinde cum Co-
dice Canonum Ecclesiæ Romanæ. Porro Ful-
gentius hoc opere Canonum consequentiam,
quam appellant, non persequitur, quemadmo-
dum Dionysius, sed, habita ratione rerum, Ca-
nonicam disciplinam capitibus CCXXXII. con-
cludit, ac singulis capitibus Canones subjecit,
ac Decreta nihil dissidentia. Excipit Ferrandum
Johannes Antiochenus, Presbyter; Scholaasticus
nuncupatus, ob eam rem scilicet, quod in Fo-
ro, litium patronus, causas oraret. Id intelli-
gitur ex Agathia, quem Suidas Scholaasticum vo-
cat; quique de se lib. I. Historiarum hæc habet
verba, sic latine versa: *Agathias mihi nomen est;
Merrina patria; Memmonius pater. Ars, quam pro-
ficor, Jura Romana, & Judiciorum certamina.* Fuit
is Presbyter initio, & Apocrisiarius ex eorum
numero, qui in Novella VI. cap. II. commemo-
rantur; deinde Justiniani Imperatoris favore
crea-

creatus Patriarcha Constantinopolitanus . Hujus Opera duo circumferuntur , Canonum Collectio , & Nomocanon ; quorum alterum cum Presbyter , alterum cum Patriarcha esset , edidit . In Collectione , Conciliorum omnium Canones , qui codice Ecclesiæ universæ continerentur , collocavit , & in L. titulos digessit ; eosque , qui ad idem argumentum pertinerent , capitibus iisdem complexus est . Isque Græcorum omnium princeps Canones Apostolicos LXXXV. Collectioni suæ inseruit . Hanc indicare , & Canonum Concordiam appellare creditur Nicolaus I. cum ad Photium , Patriarcham Constantinopolitanum hæc scripsit : *Quomodo non sunt penes vos Canones Sardicenses , quando inter L. titulos , quibus Concordia Canonum apud vos textitur , ipsi quoque reperiuntur ?* Ceterum Collectionis hujus compendium quoddam est Nomocanon ; in quo integri Canones prætermittuntur , sententia tamen ac numero indicatis ; quibus concordēs Leges , καὶ συνάδικα νόμιμα , præcipue autem Novellas Justiniani , attexit Scholasticus . Atque hæc Opera magni apud Græcos usus , & auctoritatis initio fuere ; sed postquam Photii prodiit Nomocanon & plenior , & uberior , memoria illorum propemodum interiit . Res nunc ipsa postulat , ut de Martino Bracharensi , antequam Enarrationi huic finem imponamus , ordine disceptemus , sed paucis . Fuit is autem Pannonius natione , non Græcus , ut Garfias Loaysa existimavit ; ac primum Du-

H

mien-

mienſis Monafterii Abbas , deinde Epiſcopus Bracharenſis . Domo in Orientem profeſtus , adeo bonis litteris , ac diſciplinis operam navavit , ut brevi doctiſſimis quibuſque vel par eſſet , vel anteferretur . Porro ex Oriente in Galliciam cum trajeciſſet , Suevos ab Ariano errore ad Catholicæ religionis veritatem traduxit . Plurima ſcripſiſſe Iſidorus Hiſpalenſis , ac Miræus prodiderunt ; at libros de Virtutibus , & Episto-
larum , laudibus potiſſimum cumularunt , & Canonum Collectionem , quam ex Græcis Synodis adornavit . Hanc autem Collectionem temporibus fere iſdem prodiſſe , quibus Dionyſiana in Urbe prodiit , eaque Carthagine , quæ Ferrandi eſt , non pauci meminerunt ; ſed hæc ita accipienda ſunt , ut utroque illorum poſterior Martinus habeatur . Ferrandus enim anno DLI. vita exceſſit , ut Facundus Hermianenſis memoriæ tradidit : Dionyſius autem per ipſa initia Imperii Juſtiniani , ſeculique ſexti anno fere XXX. verſionem ſuam curavit , aut citius fortaſſe ; at Martinus , ſi XXX. annos exegit in Hiſpania , & anno DLXXIII. ut Baronius auctor eſt , vel DLXXX. ut Dallæus , diem obiit , anno XXXXIII. vel L. venit in Hiſpaniam . Iiſdem autem cauſſis permotum Bracharenſem , quibus Dionyſius , collegiſſe apparet , nempe multis , magniſque incommodis antiquæ verſionis ; quod is in præſatione pluribus oſtendit , quam operi præmiſit . Ceterum Collectionis partes

tes duæ sunt. Altera eos Canones complexus est, qui ad personas, res, ritusque Ecclesiæ referuntur: altera autem eos, qui ad Laicos, quos vocant, pertinentes res continent; quod ipse in præfatione item indicat, cujus hæc sunt verba. *Id primum, inquit, observans, ut illa, quæ ad Episcopos, vel univcrsum Clerum pertinent, una in parte conscripta sint; similiter et quæ ad Laicos pertinent, simul sunt adunata; ut de quo capitulum scire aliquis voluerit, possit Clericus invenire.* Duæ memorantur Collectionis hujus editiones, vetus una, quam omnes Conciliorum Collectiones exhibent; nova altera, quam se Garfias ait in Conciliorum Hispaniæ Collectione ex antiquis MSS. edidisse. Neque id postremo arbitror negligendum, ante Antonii Democharis editionem Decreti Gratiani, Collectionem hanc Martini Bracharensis citari ita consuevisse, quasi Martini Pontificis Romani, qui multis post annis floruit, illa esset. De qua re & Contius, & Demochares meminerunt; & late Antonius Augustinus Dialogorum lib. I. Dialogo X. XI. & XII. sed hæc hætenus. Cetera, quæ ad rem pertinent, deinceps expendemus.

D I X I.



DE JURE PONTIFICUM

UNIVERSO ACROASIS III.

SEQUITUR nunc, ut ad Cresconium veniamus, deque Collectione illius paucis disputemus. Episcopus Africanus fuit, ac Leontii Imperatoris floruit temporibus. Res in Africa a Johanne Patricio, duce strenuo, atque eximio, gestas, carminibus descripsit; quamobrem viris ætatis suæ eruditissimis annumerari meruit. Ejus in Jure Canonico Opera duo memorantur; alterum quod Canonum Breviarium appellatur; quo opere, Fulgentii Ferrandi morem secutus, titulis trecentis, Canonibus Conciliorum citatis, & Pontificum Decretis, verbis non recitatis, Ecclesiasticam disciplinam complexus est. Alterum, quod vel Liber Canonum, vel Canonum Concordia nuncupatur, qua parte, titulis iisdem & ordine retento, Canones ac Decreta non modo citantur, sed

sed διὰ πλατέων etiam recitantur. Et quoniam magna similitudo est inter Cresconii Breviarium, & Fulgentii Ferrandi, fieri consuevit, ut huic illud adjiciatur in pluribus editionibus; ex quibus illa maxime commendatur, quæ Divione anno a Christo nato MDCXLIX. Petri Francisci Chiffletii studio ac labore adornata est. Illud etiam de Collectione hac arbitror animadvertendum, principem Cresconium, Pontificum Romanorum Epistolas Decretales inter Canones retulisse; quem morem alii deinceps non pauci tenuere. Hanc Collectionem Ecclesiæ Orientalis codex mox excepit; qui in Concilio Sexto Oecumenico Trullano anno DCLXXXI. confirmatus esse dicitur. Conflatus autem est ex codice Canonum Ecclesiæ universæ, iisque additionibus, quæ Canone secundo quini sextæ Synodi commemorantur. Isque est codex ille, quem Johannes Tilius ex Bibliotheca Canonicorum Divi Hilarii Pictaviensis Græce edidit; deinde etiam Elias Ehingerus, ad quem Zonaras & Balsamo interpretationes suas attexuerunt. Id factum est in hoc Codice, ut in eum primum Patrum sententiæ conjectæ sint, quemadmodum in Cresconii libro de Epistolis Pontificum contigisse diximus; nisi quod antea Canones Basilii suo Nomocanoni Scholasticus adjecerat. Porro sub idem fere tempus, quo codex Orientalis confirmatus est in Synodo Nicæna secunda, Jus Canonicum in Occidente incrementa non
exi-

62 DE JURE PONTIFICUM

exigua, progressusque cepit. Etenim Hadrianus Pontifex Carolo Magno Imperatori Canonum Collectionem, & Epistolarum misit, quam confecerat Exiguus, de quo dictum est, ut Ecclesiæ Occidentales ex illa regerentur; quo tempore probabile est, hanc Collectionem in Germaniam transiisse. Aliam deinde Hadrianus adornavit, ex Canonibus Græcis, Latinisque, ac Synodis Romanis, & Epistolis compluribus, quam anno a Christo nato DCCLXXXV. Cal. Octobr. tradidit Ingelramno. Hanc Ludovicus Jacob a S. Carolo in Bibliothecæ Pontificiæ lib. I. in Hadriani Vita, Conciliorum volumen appellat, ac maxime commendat. Et quoniam per hæc tempora Leges latæ plures ad Ecclesiam pertinentes, a Carolo Magno Imperatore, iisque, qui post hunc imperium tenuerunt, quas Ansegisus, Abbas Lobienfis, & Benedictus Levita collegerunt, de iis ordine etiam videamus. Victis Longobardis, Imperium Carolus adeptus est, sub sæculi noni initium. Armorum, ac Litterarum laude floruit; quodque hanc gloriam superat, rei Ecclesiasticæ curam magnam gessit; quemadmodum de eo scriptores plures prodiderunt; in his Rhegino, Abbas Prumiensis, in Chronico. Maxime celebratur Synodus Francofurtensis, quæ, Carolo adnitente, per Pontificem indicta est, in qua summus Latriæ cultus, sacris Imaginibus exhibendus, qui a Græcis in secunda Nicæna Synodo statutus, decretusque putabatur, pro-

proscriptus, damnatusque est a Germanis, & Gallis Episcopis. Leges deinde multæ conditæ ab eodem de rebus Ecclesiasticis, deinde a Ludovico Pio, ejus filio, ac Lothario nepote, quæ Capitula, vel Capitularia appellari solent. Ea Ansegisus libris quattuor collegisse dicitur. Sigebertus, Monachus Gemblacensis, hujus meminit in Chronico ad annum DCCCXXVII. his verbis: *Ansegisus, Abbas Lobiensis, Ediçta Imperatorum Caroli Magni, & Ludovici filii ejus, ad Ecclesiasticam legem pertinentia, duobus libellis digessit. Idem eorum etiam Ediçta ad mundanam legem pertinentia in duobus aequè libellis digessit.* Hos deinde libros tribus aliis Benedictus Levita auxit, in quos & superiorum Imperatorum, quos memoravimus, Ediçta contulit, & alia præterea attexuit; de qua re is meminit in præfatione Collectionis suæ. Virum doctum, & optimæ religionis studiosissimum, & Pontificum Romanorum fuisse, multi tradiderunt. Capita non pauca Collectionis hujus commemorantur in pluribus Conciliis, cujusmodi Troslejanum est, Ticinense, Colonienſe. De hac item Antonius Augustinus verba facit, de Emendatione Gratiani lib. II. Dialogo X. & seq. quibus locis de ordine hæc habet: *Ordinem, inquit, noli ab eo exposcere; contenti simus ipso Collectionis opere, & ut ajunt, quod dat, accipiamus. Omnia fere sine ulla inscriptione proponuntur, etiamsi ex aliis libris intelligamus, cujus sint.* Magnæ auctoritatis Capitularia hæc in Gallia fuisse, omnino con-

constat : eaque obscura & corrupta locis pluribus primus Johannes Tilius restituere conatus est, & mox Petrus Pithœus; cujus rei Miræus, Sirmundus, ac Justellus meminerunt. Qui Justellus de libro etiam memorat Ludovici Pii, cujus hæc est inscriptio: *De Reformatione abusuum Cleri Formula, per Ludovicum cognomento Pium, Romanorum Imperii Imperatorem Optimum, Caroli Magni filium.* Capitulis istiusmodi, de quibus adhuc dictum est, Capitula deinceps accessere, a Carolo Calvo, Rege primum Galliæ, deinde Imperatore, edita; qui patris, avique exemplum secutus, Ecclesiæ rationes tueri & amplificare nequaquam dubitavit; eorumque Capitularia in conventu apud Carisiacum anno DCCCLXXVII. confirmavit. Sed quæ Calvus edidit, recensuit deinde, digessitque vir eruditissimus, Jacobus Sirmundus, quibus etiam addidit aliorum Capitularia, qui deinceps imperarunt; Ludovici nimirum II. Carolomanni, Caroli Simplicis, alia; quæ omnia animadversionibus illustravit. Ceterum id arbitror monendum de Capitularibus, ea a capitibus appellata esse, qua voce ævo illo Leges Regiæ significabantur; quod Sirmundus docuit in præfatione. *In Ansegisi, inquit, Abbatis, et Benedicti Levitæ Collectionibus, nuda Regum, ac mere leges sunt, quæ Capitula vocabant.* Capitula autem, seu Capita ob eam rem appellabantur, quod breviter, & capitulatim rem proponerent. Ac barbara ne vox, an Latina

tina illa sit, nil ego quæram ; cum præsertim de hac re Antonius Augustinus multis disputarit. Certe antiquam esse constat, & ante Caroli, Ansegisi, ac Theodulphi tempora in usu positam ; id quod Gregorii II. Pontificis Maximi, qui anno DCCXIV. obtinuit Pontificatum, Capitulare indicat ; cujus rei Ludovicus Jacob a Sancto Carolo in Bibliothecæ Pontificiæ lib. I. meminit. Nunc ordo ipse fert, ut de Isidori Mercatoris Collectione, quæ turbas tot concivit in Ecclesia, disceptemus. Ea porro prodiit initio noni seculi, hominis otiosi, subdoli que opera, cujus Christi Ecclesia non indiguit, utpote cui rerum maximarum copia aliunde suppetat ; nec fuco ullo egeat, vel mendacio, quæ veris, quæ sinceris, quæ germanis præsidiiis abundet. Sed de Isidoro hoc, quis tandem fuerit, vel potius quis non fuerit videamus. Initio certum est, Hispalensem non fuisse, Divum scilicet, etsi id probare videantur Decreti Gratiani Romani emendatores in admonitione Decreto præfixa. Antonii Augustini vera atque aperta sententia est, neminique eruditorum nunc ignota. *Hæc collectio, inquit, Isidoro Hispalensi tribui non potest, in qua permulta sunt post ejus mortem conscripta, ut est VI. Synodus generalis, & Concilia Toletana VI. & VII. & cetera ad XIII. in editis, XVII. in veteribus, & Emeritense & Bracharense II.* Hæc Augustinus, & recte, ut semper solet. Isidorus enim diem suum obiit anno DCXXXVI. quemadmodum Redemptus

66 DE JURE PONTIFICUM

Diaconus, alique prodiderunt; ideoque nec Concilii Toletani XI. quod anno DCLXXV. habitum est, nec Concilii VI. quod anno DCLXXI. meminisse potuit. Præterea satis constat, auctorem hunc post annum DCC. vixisse, cum ex Epistola ad Ethibaldum Regem, Bonifacii, Moguntini Archiepiscopi, quæ scripta est post annum DCCXLIV. non pauca corrasisse appareat. Nonnulli existimarunt, ex Juliani Toletani Chronico, Isidorum Mercatorem, Episcopum Setubensem, Collectionem Epistolarum Decretalium Veterum Pontificum edidisse. Sed Chronicon istiusmodi rejiciunt eruditi viri; affectumque Juliano prorsus arbitrantur. Quidam tandem putant, Monachum fuisse, qui se veteri sanctorum Episcoporum more, Peccatorem appellavit, cum Mercator esset; eumque e solo Iberico, ut Blondellus ait, hebeti ingenio hominem, rabulam, nebulonem emerxisse. Quis revera ille fuerit, nullus scit. sed tamen hæc duo certa sunt, Collectionem hanc Isidori Mercatoris, seu Peccatoris, nomine nunc appellari, eamque ut vanam, fictam, falsam ab eruditis omnibus hodie repudiari. Rem ita esse, paucis ostendam, hominum gravissimorum auctoritatibus, & argumentationibus nonnullis commemoratis. Et quod pertinet ad auctoritates, ut Bovii, Salmasii, Usserii, Turrecrematæ Cardinalis, Didaci Covarruvias, Christiani Lupi, & aliorum mittam testimonia; quæ recitat Labbæus tomo I. Collectionis Concilio-

ciliorum non præteribo. *Mirum est, inquit, viris doctissimis Turriano, Binio, & quibusdam aliis, in tanta eruditionis Ecclesiastica luce probari potuisse Decretales illas Epistolas, a quocumque seu Mercatore, seu Peccatore, fabricatas, & antiquis Romanæ Urbis Pontificibus circiter annum Christianæ Epochæ octingentesimum suppositas. Adeo enim perspicacibus viris deformes videntur hoc saltem tempore, ut nulla arte, nulla cerussa, aut purpurisso fucari possint. Eas omnes, saltem plerasque earum, repudiarunt viri eruditissimi quique, tractatores Catholici, Baronius, Bellarminus, Perronius, Contius, Antonius Augustinus, Lorinus, Sirmundus, Petavius, Ducaus, Marca, Bosquetus. ut alios modo, siue antiquiores, siue recentiores, silentio obvolvam. Addit, se probare non posse novelli cujusdam studium, qui mala arte ex zelo quidem, sed minus prudenti & considerato, certe non secundum scientiam, easdem abjectas, ac penitus repudiatas defendere aggressus est. Non tali auxilio, nec defensoribus istis indiget, aut unquam indignuit Romana Ecclesia. Eadem fere Papenbrochius, ac viri summi duo, iidemque Cardinales, Johannes Bona, & Nicolaus Cusanus recitarunt. Venio ad rationes; quæ cum plurimæ afferantur, paucis ego contentus ero. Porro si veræ illæ, germanæque sunt Epistolæ Decretales, ab Isidoro commemoratæ, cur antiquis Patribus, ac Romanis Pontificibus ad nomen usque Ecclesiæ seculum fuere ignotæ? Cur Hieronymo, Eusebio? cur Dionysio Exiguo? qui cum summam diligentiam adhibuisset in*

68 DE JURE PONTIFICUM

perquirendis veterum Pontificum Epistolis , ut codicem conflaret , eorum nullas attulit , qui ante Siricium Pontificatum Maximum tenuere? Verba hujus recitabo. *Præteritorum*, inquit, *Apostolicæ Sedis Præfulum constituta*, qua *valui cura & diligentia collegi*, & *in quemdam redigens ordinem*, *titulis distinxi compositis*; ita dumtaxat ut singulorum Pontificum, quotquot a me præcepta reperta sunt, sub una numerorum serie terminarem. Deinde qui fieri unquam potuit, ut ii Pontifices, qui duobus, & tribus seculis Codicis Theodosiani editionem præcessere, quibus Isidorus Decretales tribuit, verba Legum Imperatoriarum, & scholia illa, quæ exstant nunc ad illum Codicem sub nomine Aniani, tanto ante perspicerent, præciperent, usurparent in suis Epistolis? qui item, ut Pontificum recentiorum, Patrum, & Conciliorum sententias præcerperent, ac verba ipsa, quibus hi usi sunt posterioribus temporibus? Eodem pertinet, quod in his Epistolis Sanctarum Scripturarum recitatur. Sumta plura sunt ex Vulgata versione; multa etiam ex interpretatione Divi Hieronymi; quæ seculis integris posteriora sunt iis Pontificibus, quibus Decretales tribuuntur. Consules citantur in hac Collectione, quorum nulla mentio in Fastorum libris. sermo præterea est lutulentus, & inconditus, & una eruptione ex bucca eadem maleolente egrediens. Sed loca jam quædam attingamus, quibus id verum esse plane intelligatur, quod olim Pa-
pen-

penbrochius de Collectione hac pronuntiavit ; commentum illam esse, fictam, pudendam, supposititiam. In Epistola II. Clementis S. Jacobo inscripta, vestium fit mentio, quibus induti Sacerdotes rem divinam faciant, pallæ, vasorum sacrorum; præterea Ostiarii, Archidiaconi, & aliorum ministrorum, quæ temporibus Clementis plane ignota erant. Epistola tertia scripta est *Omnibus Episcopis, Presbyteris, Diaconis, aliisque Clericis, omnibus Principibus, magnis, et parvis, omnibusque fidelibus*, cum nomen Clerici Clementis ævo nequaquam notum esset; nec magnos ac parvos Principes sinu suo Ecclesia complecteretur. Primates, Metropolitani, Apocrysiarii in Epistola I. Anacleti commemorantur; quæ tamen omnia a moribus ætatis, qua vixit Anacletus, omnino abhorrent. Prior Evaristo quæ inscribitur Epistola, eorum plurima, quæ ad matrimonium clandestinum pertinent, ejusque Sacramenti cærimonias, continet, quæ a seculo Evaristi sunt prorsus aliena. Ac ne agam pluribus de re nunc satis illustrata aliorum opera, id unum tantum dicam de hisce Epistolis Isidorianis, quod ante me video, viros eruditos protulisse, eas, postquam hominibus diu illuserint, verendæque ac sanctæ visæ sint, viles, abjectasque nunc haberi. Sed quid jam contineat Collectio Isidori, videamus. De qua re sententias aliorum recitando, ne pluribus quam necesse sit, moremur, verba ipsa afferam Isidori, quibus

bus in præfatione, quam præposuit Collectioni, usus est. In principio, inquit, voluminis hujus, qualiter Concilium celebretur apud nos, posuimus, ut qui nostrum ordinem sequi voluerint, sciant, qualiter hoc agere debeant. Denique propter eorum auctoritatem, ceteris Conciliis præposuimus Canones qui dicuntur Apostolorum, licet a quibusdam apocryphi dicantur, quoniam plures eos recipiunt, & Sancti Patres eorum sententias Synodali auctoritate roboraverunt, & inter Canonicas posuerunt Constitutiones. Deinde quarundam Epistolarum Decreta virorum Apostolicorum interseuimus, idest Clementis, Anacleti, Evaristi, & ceterorum Apostolicorum, quas potuimus hætenus reperire Epistolas, usque ad Silvestrum Papam. Postmodum vero Nicenam Synodum constituimus, propter auctoritatem ejusdem magni Concilii, deinceps diversorum Conciliorum Græcorum ac Latinorum, siue quæ ante, seu quæ postmodum facta sunt, sub ordine numerorum ac temporum, capitulis suis distincte sub hujus voluminis adspectu locauimus; subjicientes etiam reliqua Decreta Præsulum Romanorum, usque ad Sanctum Gregorium. Hanc præfationis partem sub nomine Isidori refert Gratianus Can. IV. dist. XVI. cum paullo ante plane contraria sub nomine etiam Isidori retulisset, his verbis: *Canones qui dicuntur Apostolorum, seu quia eosdem nec Sedes Apostolica recipit, nec Sancti Patres illis assensum præbuerunt, pro eo quod ab hæreticis sub nomine Apostolorum compositi dignoscuntur; quamvis in eis utilia inueniantur, tamen ab auctoritate Canonica atque Apostolica, eorum gesta*
con-

constat esse remota, atque inter apocrypha deputata. Quæ cum animadverteret Antonius Augustinus, Gratianum ipsum carpere non dubitavit, quod non satis Isidori utriusque, ut debuit, distinxerit varietatem, cum contraria dicant. Ex qua re una facile cognoscitur, quam hæere eos misere oporteat, qui ab historia, & ceteris præsidii imparati, quæ boni necessaria ad Jus Pontificum probe intelligendum omnino esse affirmant, omnia illa probant, delectu nullo habito, quæ in Collectione Gratiani, aliorum etiam, inveniant. Quod ante me etiam non pauci docuerunt, Antonius præsertim Augustinus, & Emendatores ipsi exemplo suo, qui, cum summam diligentiam adhibuissent in illo repurgando, labes tamen omnes abstergere non potuerunt. Hæc cum acuti quidam homines, ac lyncei, ut se volunt appellari, qui superioribus annis fuere; utinam non hac memoria quoque; non satis in libris Juris exponendis attenderint diligenter, nolite quærere, quæ monstra opinionum pepererint. Sed fortasse hæc satius fuit non commemorare, ne cum jam querar, *ἰσχυρῶς* rursus inclyta alicunde erumpat, quæ styli, ingeniique homines commoneat, ac spem beatam faciat; vel carmen aliquod jam occentet, quod flagitium faxit. Sed ad Isidorum redeamus. Præter eas Epistolas, quas adhuc a nobis commemoratum est, confictas ac suppositas ab homine istiusmodi fuisse, eruditi viri hoc animad-

madverterunt, Collectione eadem non pauca contineri falsa, ac vana, quæ Ivonem Carnotensem, Burchardum Vvormatiensem, & Gratianum deceperunt. De his Schellstratius, Labbæus, Lupus, Baronius & Cusanus Cardinales, alique verba fecerunt, ut nil nunc mihi necesse sit illa ipsa recitare, actumque, ut dici solet, agere. Id monendum est, inter veterum Pontificum, qui etiam ante Siricium floruerunt, Epistolas ab omnibus tamquam apocryphas rejectas, non esse percensendas, quæ apud scriptores ejusdem ætatis memorantur, cujusmodi prior est Epistola Clementis ad Corinthios; Divi Cornelii Litteræ inter opera Cypriani; Julii I. quarum meminit Athanasius; Liberii item apud S. Hilarium in fragmentis; alia. Postremo, ut aliquid etiam de hac re dicam, nihil est, quod tantopere gloriantur, qui Novatores appellantur; ac Pontificibus objectent Collectionis hujus fidem; quasi ea, auctoritas illorum unice nitatur; atque hæc ipsa concidat, illa disturbata. Ego hæc duo afferam, quæ nemo sanus inficietur: alterum erit, nullum adhuc, qui tamen judicii ullius fuerit, inventum esse, qui affirmarit, Collectionem hanc opera Pontificum in lucem prodiisse, ut sibi potestatem ampliorem vindicarent. In summa enim rei divinatione, cum alii de Auctore alia excogitarint, hi ad veritatem proxime accessisse plurimis videntur, qui Riculpho, Archiepiscopo Moguntino, & Isidoro illi Hispano, cujus su-

supra meminimus, tribuerunt. Nemini unquam ex cordatis viris in opinionem venit, ut in eam fraudem Pontifices devocaret. Larva nescio quæ de Hispania attulit: allatam mox vulgavit princeps Moguntinus tota Gallia. Hinc mari sententia adversus Laudensem nota est, quæ legitur in Opusculo in hunc eundem cap. XXIV. *De libro*, inquit, *collectarum Epistolarum ab Isidoro, quem de Hispania allatum Riculphus, Episcopus Moguntinus, in hujusmodi, sicut & in Capitulis Regiis studiosus, obtinuit, & istas regiones ex illo repleri fecit*. Alterum est, quod sæpe alii ante me prudentes viri, nec rabie ulla abrepti, vel nimia benevolentia, tradiderunt, summam aliunde, & egregiam rerum potestatem Pontificibus constare, a Christo traditam; quam cum certum sit illos obtinere, quid opus illis fuit confugere ad hominum commenta? Eorum hæ artes sunt, qui, cum nihil domi inclusum habeant, quærere undequaque, emendicare, æruscare opes alienas jam coguntur. Nolim igitur Gerardo, Blondello, Miræo, Dallæo, aliis istiusmodi viris summis, quorum eruditionem ac doctrinam facio plurimi, graves Pontificibus, acerbisque tot sententias excidisse; eosque Isidori vitia insectando, neque his parcendo, modestiæ ac verecundiæ laudem amisisse. Satis enim erat nebulonis refellere commenta; quod multi ex nostris jam fecere, iudicio illo, ac sapientia adhibita, ut qui deinceps conatu ullo ad opus sint

K

ad-

adgressi, id tantum egerint, ut apertum ostium, quod dicere Sirmundus consuevit, susceperint effringendum. Ac de his satis; ad reliqua pergamus. Sequitur nunc Photius, vir ex omnibus, qui Juri colligendo operam navarunt, prudentiæ, ingeniique summi. Nobili natus est genere, ac Protospatharius fuit dignitate, ut Cedrenus prodidit; divitiis, rerumque omnium scientia facile antecelluit; sub Michaële III. & Ludovico II. Imperatoribus vixit; eumque Zonaras, virum insignem, primarium a secretis, ac celebrem eruditionis nomine, appellat. Patriarcha Constantinopolitanus anno a Christo nato DCCCLVIII. creatus est, eo nempe tempore, quo fraude Bardæ sede sua Ignatius ejectus est. Pontificum Romanorum non admodum studiosus fuit; ab his etiam sæpissime dissensit. Itaque Bellarminus virum eruditionis magnæ vocat, sed majoris nequitiae. Plurima scripsisse fertur, Epistolas, Bibliothecam, librum de Spiritus Sancti processione, Etymologicum, Quæstiones in Amphiloichium, alia, quæ nunc mihi consilium non est, investigare, recte ne, an perperam illi tribuantur. Quod ad rem nostram pertinet, scripsit Nomocanonem, quo codice Græci universi Juris Canonici elementa complexus est. Itaque Conciliorum, Patriarcharum, Episcoporum, ac Patrum Canonibus & sententiis constat; divisusque est in quattuordecim titulos; hi rursus in certa capita. His Imperatoriae

toriae Leges , ad res Ecclesiasticas pertinentes, subjiuntur; & Canones quidem sub titulis dumtaxat citantur, non recitantur; Leges autem & citantur, & breviter recitantur. Opus hoc Photianum æræ Christianæ anno DCCCLXXXIII. prodiisse, idemque animadversionibus Balsamonem illustrasse, apparet. Latinæ duæ exstant ipsius versiones, Gentiani Herveti altera; Henrici autem altera Agylæi. Hæc posterior, quod & locupletior, & vocibus effertur Jurisconsultorum propriis, priori illi antefertur. Id porro arbitror hoc loco animadvertendum, ad hæc tempora Exigui Collectioni, ejusque accessionibus summam auctoritatem tributam esse; quod Leo IV. indicat in Epistola ad Episcopos Britanniae, quæ legitur apud Gratianum Can. I. dist. XX. Non fuerit alienum eam hic commemorare, præsertim cum nonnulli sint, qui Pontificem optimum redarguant. Ejus igitur verba hæc sunt:

De libellis & commentariis aliorum non convenit aliquem judicare, & sanctorum Conciliorum Canones relinquare, vel Decretalium regulas, idest quæ habentur apud nos simul cum Canonibus. Quibus autem in omnibus Ecclesiasticis utimur judiciis, sunt Canones Apostolorum, Nicanorum, Ancyranorum, Neocasariensium, Gangrensiū, Antiochensium, Laodicensium, Ephesinorum, Constantinopolitanorum, Chalcedonensium, Sardicensium, Africanensium, Carthaginensium, & cum illis regula Præfulum Romanorum, Sylvestri, Siricii, Innocentii, Zosimi, Calestini, Leonis, Gelasii, Hilarii,

76 DE JURE PONTIFICUM

Symmachi, Hormisdæ, Simplicii, & Gregorii junioris. Isti omnino sunt, & per quos judicantur Episcopi, & per quos Episcopi judicantur simul & Clerici. Nam si emerferit, vel contigerit inusitatum negotium, quod minime possit per istos definiri; tunc si illorum, quorum meministis, dicta, Hieronymi, Augustini, Isidori, vel ceterorum similiter Sanctorum Doctorum similium reperta fuerint, magnanimiter sunt retinenda, ac promulganda, vel ad Apostolicam Sedem referendum de talibus. Quam ob causam luculentius magna voce pronuntiare non timeo: quia, qui illa, quæ diximus, Sanctorum Patrum Statuta, quæ apud nos Canonum nomine prætitulantur (si ve sit ille Episcopus, si ve Clericus, si ve Laicus) non indifferenter recipere convincitur, nec Catholicam, & Apostolicam fidem, nec sancta quattuor Evangelia utiliter, & efficaciter ad effectum suum retinere, vel credere probatur. Coarguunt Leonem, quod Epistolas Pontificum, quæ aliquando neque satis piæ sint, nec salutæ, ut ipsi ajunt, necessariæ, cum quattuor Evangeliiis compararit. Nolim hæc temere hominibus doctissimis excidisse. De pietate ac salute non est hic locus. Alibi fortasse opportunius. De comparatione id videant, ne fallantur. Neque enim Leo vim eandem tribuit Canonibus & Epistolis, quam quattuor Evangeliiis. Non ita hospes in litteris, ac Sanctorum Scripturarum libris fuit, ut tantidem ac Evangelia, unam aliquam Epistolam fieri oportere existimaret; cum Anastasius, qui de vita, ac moribus illius scripsit,

psit, & hominem sanctissimum fuisse, & *plentus*, ut ipse ait, sacras litteras didicisse memoriae prodiderit. Hoc igitur sapientissimi Pontificis, ut ego arbitror, consilium fuit, ut diceret, in judiciis reddendis, non libellos, & commentarios hominum privatorum attendendos esse, sed Canones Conciliorum, Epistolas Pontificum; sæpe etiam Augustini, Hieronymi, & Patrum ceterorum auctoritates. Quæ si quis spernat, inde apparere, nec fidem Apostolicam, nec Sancta quattuor Evangelia, unde illa expressa sint, probare ac retinere. Apposite ad hanc rem Beatus Cyprianus: *Disciplina*, inquit, *est fundamentum religionis, custos spei, retinaculum fidei, & dux itineris salutaris*. Quæ si vera sunt, nec opus erit, id contendere, Gregorium, Anselmum, Deusdedit Cardinalem, Leonis puduisse, nec novam lectionem comminisci. Sed ad Photii Nomocanone[m] redeamus. Id opus Græci tantum facere consueverunt, ut omnibus præponere soliti sint Collectionibus. Ac Theodorus Balsamon hoc animadvertit, ante legum repurgationem, ut ipse appellat, editum a Photio Nomocanone[m] fuisse; aitque, sese jussu Emmanuelis Comneni Imperatoris, & Michaëlis Anchiali, Patriarchæ Constantinopolitani, eum librum commentariis illustrasse; legesque in eo allatas, hoc est Justinianæas, cum Basilicis (ea enim est legum repurgatio) contulisse. Hujus cum plures editiones memorentur; quæ opera ac labore Chri-
stopho-

stophori Justelli, Henricique filii, ac doctissimi Voëlli prodire, omnibus anteferuntur. Atque hæc quidem de Photio, ejusque Nomocanone. Litteras deinceps, ac disciplinas omnes occupavit ignoratio ac tæterrima barbaries; nec vox ulla diu exaudita est docti hominis. Basilicis & Photio contenti Orientales: Codice Canonum, ac Regiis Capitularibus Occidentales usque ad seculum XI. fuere; quo tempore studia hominum Juris colligendi rursus exarsere; de qua re nunc brevi videamus. Princeps sese offert Burchardus Episcopus Vvormatiensis. Patria is Hassus fuit, ac primum monasterii Lobienfis Monachus, ordinis D. Benedicti; deinde Abbas Gemblacensis; Episcopus postremo Vvormatiensis. Olberti opera, Abbatis Gemblacensis, litteris, ac disciplinis, ut ætas illa tulit ferrea & obscura, excultus est; Brunichonis hortatu, Præpositi Vvormatiensis, Canonum Collectionem adornavit, quod Decretum appellatur. Præceptoris operam in colligendo adjutricem habuisse, Sigebertus auctor est; ipseque Burchardus in operis præfatione causas commemorat, cur jam accesserit ad scribendum, & eam scriptionem Brunicho flagitarit. *Et id quidem, inquit, vel ea ratione maxime flagitare videbaris, quod Canonum jura, atque Penitentium forme, in nostra quidem diœcesi adeo confusa sunt, atque inter se discrepantia, ut aut ex toto neglecta, aut omni pene auctoritate destituta, vel modice in Ecclesiastica disciplina institutis apparere possint.*
 Qua

Qua de caussa saepe accidit, ut ad penitentiae remedium confugientibus, cum ob Canonum descriptionem confusam, tum ob Presbyterorum nostrorum ignorantiam, non facile subveniatur; quod an ideo potissimum fieret, non imprudenter ex me rogasti Et quia hac res ita habet, eo me dilectio tua rogavit, ut opellam hanc congestam junioribus nostris legendam proponerem, quo ipsi nimirum in idonea aetate, ea discant, quae vel serior aequalium nostrorum aetas modo assequi non possit, vel antecessorum negligentia non attigit. Ut pote decentissimum fore existimans, ut quis cum omni probitate se discipulum prius exhibeat, quam Doctoris auctoritatem apud vulgum temere praesumat, & in scholis discat, quod suae fidei commissos doceat. Opus suum Burchardus in XX. libros tribuit, quorum quilibet sua habet capita; singula autem capita unius sunt tantum Canonis; singulis denique Canonibus titulus praepositus; ac librorum summam operis initio paucis recitat. Anonymus est quidam, qui de vita illius & moribus libellum edidit. Is narrat, Vvalterium, Episcopum Spirensen, plurimum industria ac diligentia sua Burchardo profuisse in Decreto colligendo. Atque Antonius Augustinus non mediocriter hunc laudat in opusculo de Collectoribus Canonum cap. XXVII. Ejus haec sunt verba. Laudanda, inquit, est Burchardi maxima diligentia in colligendis variis sententiis ex Conciliis & Decretis Pontificum Romanorum, & aliis scriptis SS. Virorum; item ex Imperatorum & Regum sanctionibus, aliisque libris.

80 DE JURE PONTIFICUM

*libris. Laudo etiam ejus prudentiam in discernendis & separandis rebus, de quibus agitur. quamvis alius fortassis ordo aptior inveniri potuisset, tamen hic ipse ab eo excogitatus non est inutilis. Sed tamen ingenue dicendum, quod res ipsa poscit, plurima in Collectione hac reperiri, quæ Burchardum ostendunt, non admodum ingenio valuisse, & sæpius dormitasse; id quod non gravate admodum concessurum arbitror, qui Decretum ejus leget, atque expendet. Plura enim affert, in quibus ipse egregie deceptus est, & alios decipit, qui fidem ejus, delectu rerum nullo habito, misere sequuntur. Sed ne in omnibus Burchardum reprehendam, multa tribuenda sunt sæci illi temporum, quibus vixit; quibus temporibus homines & luce litterarum pæne omni caruere, & certum atque authenticum id omne arbitrabantur, quod in Canonum Collectionibus, aut aliorum monumentorum inveniebant. Quod optime animadvertit Antonius Augustinus; qui cum Burchardum, & illius diligentiam, ut supra demonstratum est, in rebus discernendis, atque separandis commendasset, deinde addit: *In librorum delectu, & in inscriptione singulorum capitum minus certa, notari potest. Est enim Burchardus, ut ceteri, qui postea scripserunt, reprehendendus, quod non ex fontibus ipsis hausit singula, sed ex rivulis, & stagnis aliorum.* scilicet Isidori Mercatoris Collectioni, Reginonis, aliisque monumentis fidem omnem habuit, quam minime oportuit. Itaque
in*

in eodiem suum falsas Decretales veterum Pontificum coniecit; & ex Rheginone, quod Stephanus Baluzius observavit, ad capita DCLXX. eo transtulit, quo facto errata Rheginonis sua etiam fecit; auxit deinde, cum pluribus in locis sententiam Rheginonis non adeptus est. Quae de re, quoniam alii tradiderunt, nulla ego exempla nunc apponam. Sed an Burchardus ulla ediderit alia opera, neque scio, neque, ut sciam, multum anxius ero. De obitu illius id Miræus prodidit, anno MXXV. decessisse; Baronius autem, MXXVI. Pauca postremo, Auditores optimi, de Hidelbrandi Collectione jam adjiciam, hoc est Gregorii VII. Pontificis Romani; qui eo animo, eaque sapientia fuit, ut Ecclesiae libertatem e manibus Imperatorum, duraque servitute potuerit liberare, qua antea premebatur; atque ad id culmen ac fastigium evehere, quod deinceps tenuit. Tuscus natione is fuit, & Monachus Cluniacensis; litterarum, artiumque multiplicium cognitione, pro temporibus illis, cum primis floruit. Pontificatum Maximum anno MLXXIII. obtinuit. Quo facto Romanae Ecclesiae jura forti animo defendit; Imperatori restitit; eumque, multa molientem, diris devovit, Imperioque privavit. De virtute hujus Onuphrius multa. hæc pauca nunc non prætermittam. *Huic uni, inquit, cum omnes Latinae Ecclesiae, tum præcipue Romana acceptum referre debet, quod libera sit, & ab Imperatorum manu eruta; quod tot*

L divi-

82 DE JURE PONTIFICUM

diuitiis, opibus, & prophana ditione locupletata; quod Regibus, Imperatoribus, Christianis Principibus sit perfecta; a quo postremo, ut omnia verbo uno completar, maximus iste, eximiusque status, in quo Ecclesia Romana est omnium Christianorum domina; cum antea tamquam vilis ancilla non ab Imperatoribus modo, sed a quo-vis Principe, Romani Imperatoris praesidiis fulto, premeretur. Ab hoc maxima illius, & omni seculo tremenda, venerandaque Romani Pontificis, & infinita pene potestatis ius manavit. Quod pertinet ad Collectionem, a Baronio, ac Panvinio Dictatus memorantur, quos ediderit Romæ, cum in Basilica Lateranensi, quæ etiam Constantiniana appellatur, Synodum haberet. Hos Baronius idem in Annalibus ad annum MLXXXVI. num. XXXI. & qui sequuntur, veluti privilegia quædam Sedis Apostolicæ commemorat; aitque Onuphrius in Vita hujus Pontificis, Ecclesiam istiusmodi Dictatibus obtinuisse, ut statu firmiori esset. Sed tamen viros video eruditissimos, vehementer dubitare, veri ne germanique Dictatus illi sint, an suppositi. Johannes Launojus in Epistola ad Antonium Faurum, Theologum Parisiensem, pluribus contendit, nequaquam a Gregorio esse editos; non quod in eis multa non sint, quæ indoli, ingenioque illius non sint accommodata, sed quod insint plurima, quæ ab eo vehementer dissentiant. Hæc eadem Historiæ Ecclesiasticæ tomo VI. sentit Natalis ab Alexandro, Disput. de Gregorii Dictat. quo-

quorum sententia eo argumento vel maxime confirmatur , quod Gregorius ipse Dictatum illorum nusquam meminit ; non Benno , homo ille maledicentissimus ; non denique eorum ullus unus , qui temporibus Gregorii floruerunt , vel etiam paullo post . Qui plura de hac re cupit , Launojum , & Natalem perlegat . Nos nil pronuntiare ausi , rem tantam in medio relinquimus . Hæc de Collectione Gregoriana ; deinceps ad cetera pergemus .

D I X I.



L 1

DE



DE JURE PONTIFICUM UNIVERSO ACROASIS IV.



NNO a Christo nato MLXXIII.
 vel, ut putat Doviacius, anno
 MLXXI. Anselmus Mantua-
 nus, qui Gregorio VII. fami-
 liarissime est usus, Alexandri
 II. jussu Lucensi Ecclesiæ præ-
 sectus est; quam deinde abdi-
 cavit, ac sese in Cluniacense Monasterium ab-
 didit. Id factum Gregorio vehementer displicuit,
 quod hominem strenuum, moribusque ac
 litteris facile præstantem, in primis autem Pon-
 tificum Romanorum studiosum norat. Precibus
 itaque & imperio hunc coëgit, ut rediret ad
 Ecclesiam. Scripta plurima reliquisse dicitur,
 quæ Baronius ad annum MLXVIII. ex Ano-
 nymo quodam, qui libellum scripserat de vita
 ac moribus illius, commemorat. In his Cano-
 num Collectio percensetur, cujus titulus in co-
 dice Romano sic concipitur: *Authentica & compen-
 diosa*

DE JURE PONTIF. ACROASIS IV. 85

diſſa Colleſtio regularum & ſententiarum SS. Patrum, & auctorabilium Conciliorum. Sunt tamen viri eruditiffimi, quorum eſt Antonius Auguſtinus, qui dubitent, an revera Colleſtionis hujus Anſelmus auctor fuerit; cum cauſſæ plures, ab his commemoratæ, adimere videantur; & ſint non pauci, qui tribuant Hildeberto, Archiepiſcopo Turonenſi. ſed de hac re alibi diligentius. Hunc deinde excepit Ivo Gallus, qui in numerum cooptatus Canonorum, quos appellant, Regularium ordinis Divi Auguſtini, præfuit deinde Monafterio Bellovacenſi Sancti Quintini. Inde Urbani II. Pontificis Maximi beneficio, Carnutenſis Epicoſopus creatus. vir vitæ diſciplina, ac ſapientiæ laudibus memorabilis; quod facile ex libris, quos reliquit, intelligitur, ac Veterum teſtimonio. Sed quod pertinet ad rem noſtram, Opera duo ejus nomine circumferuntur, Decretum, & Pannomia. Ac Decretum quidem Ivoni ipſi ab omnibus tribuitur, quod edidiſſe dicitur æmulatione Burchardi Vvormatiensis. Colleſtum autem eſt ex Epistoſis Pontificum Romanorum Decretalibus, Canonibus Conciliorum, Patrum ſententiis, ac Principalibus Conſtitutionibus. Nomine autem Conſtitutionum eas ipſe intelligit, quæ Codice Theodoſiano, ac Juſtiniani libris, & Regiis Capitularibus continentur. Porro de Pannomia, vel Pannormia, ut alii appellant, Bellarminus de Scriptoriſus Eccleſ. in Ivone, & Gratiano, cenſet, nequaquam ad Ivo-

36 DE JURE PONTIFICUM

Ivonem pertinere: *Quia multa, inquit, libro VIII. sunt Decreta ex Innocentio II. Papa, & ex Historia Sigeberti, qui Ivone posteriores fuerunt. Vocari tamen Ivonis, quia ex Decreto Ivonis maxima ex parte sit desumptum; est enim quasi compendium Decreti Ivonis.* Sed tamen Antonius Augustinus lib. II. Dial. V. in ea esse hæresi videtur, ut Ivoni tribuat. Verba ejus hæc sunt. C. *Apud Ivonem extrema Pannormia Innocentii minoris verba referuntur, qui Callisto posterior fuit. A. Negare possum Ivonis eum librum esse; sed malo hoc affirmare, additum esse Concilium Innocentii Pannormie, non esse partem ejus Collectionis. Ostendere possum veterem librum, in quo neque id Concilium, neque nomen Ivonis, neque excerptionum præfatio continetur, & in Epistolis Ivonis, ea præfatio temporibus Paschalis minoris scripta est.* Duæ Decreti Ivonis editiones prodire; altera Lovanii anno MDLXI. industria ac studio Johannis Molinæi; qui opus hoc, ægre id ferente Boëthio Epone, Decreto Gratiani antefert: altera autem Lutetiæ Parisiorum, cum aliis Ivonis operibus, Epistolis nempe, & Sermonibus aliquot, brevique Francorum Chronico, anno MDCXLVII. Johanne Frontono adnitente. Quo vixit Ivo tempore, eodem Deusdedit vixit Presbyter Cardinalis tituli SS. Apostolorum in Eudoxia. Hujus duo Opera exstant. Canonum Collectio, aut liber Canonum alterum appellatur: de privilegiis Romanæ Sedis alterum inscribitur, seu de rebus Ecclesiasticis. Utriusque meminit Baronius

tomo

tomo II. Annalium ad annum MLXXXVII. Scribendi causa a Veteribus hæc commemoratur, ut adversus Henricum IV. Imperatorem Ecclesiæ rationes tueretur, qui vocibus, minis, armorum etiam vi adhibita, in eas ferebatur, Gregorio VII. impigre resistente, ejusque successoribus. Romani emendatores Gratiani hoc nomine utrumque Opus in indice, quem præposuerunt Decreto Gratiani, inscribere: *Deusdedit Cardinalis Collectio Canonum, & libri quattuor de rebus Ecclesiasticis*. Hi libri, quod sciam, typis nondum editi; MSS. in Bibliotheca Vaticana, in aliis etiam adservantur. Baronius ad Ann. MLXXXVII. num. XXIII. Operis etiam meminit ab eodem auctore elucubrati, *adversus invasores, simoniacos, & reliquos schismaticos*; idemque appellat, *nobilem lucubrationem*. est in eadem Bibliotheca. Seculo etiam hoc XI. Bernardi Papiensis Collectio prodisse dicitur, & Tarraconensis, quam etiam Antonius Augustinus, quod auctoris nomen nullum præferret, *Populetum* nuncupavit, a Regio Cisterciensis ordinis Monasterio, diocesis Tarraconensis, cui nomen *Populeto*, ubi illam invenit. Gregorium item Presbyterum Hispanum, Ecclesiæ Compostellanæ Cardinalem, hoc tempore floruisse, plures prodiderunt, qui *Polycarpum* scripsit, hoc est, fructuosum, seu multi proventus librum. Sed jam ad seculum XII. descendamus; quo tempore Græci, Latinique Canonum explicandorum,

rum , colligendorumque studio invicem certarunt . Atque ex Græcis quidem principem sese offert Johannes Zonaras ; qui fama sapientiæ , & honoribus Byzantii inclaruit . Fuit enim Protosecretarius , & Præfectus Drungi , seu Drungarius magnus . Deinde quietis , vitæque sanctioris amore ductus , Monachus factus est ; otiumque nactus , animum ad scribendum appulit . Itaque historiam *καθολικὴν* conscripsit , usque ad Alexii Comneni Imperatoris obitum ; in qua Dionem fere sequitur . Præterea Commentarios in Photii Nomocanonem , & Canones Apostolorum , Conciliorum Generalium , & Provincialium , seu in Codicem Ecclesiæ Orientalis , edidit ; quos deinde plurimi latine verterunt . Alexius Aristinus consecutus est , Ecclesiæ Constantinopolitanæ Diaconus , quemadmodum in libro de Trinitate nuncupat Gilbertus . Canonum Epitomen Johannis Comneni Imperatoris jussu scripsit ; qua Epitome veluti index quidam codicis Canonum Ecclesiæ universæ continetur , ordine retento priorum Conciliorum , Nicæni scilicet , Ancyran , Neocæsariensis , Gangrensis , Antiocheni , Laodicensi , Constantinopolitani , Ephesini , Chalcedonensis ; additisque initio Canonibus Apostolicis , deinde Sardicensibus , Africanis , Trulensibus , tribusque Epistolis Canonicis Sancti Basilii . Sed hæc Collectio artificio nullo constat , videturque Alexius , ut memoriæ , in tantorum cumulo , ordinem ac præsidium aliquod affer-

afferret, eam suscepisse. Seculo hoc medio floruit Constantinus Harmenopolus, Canonici, Civilisque Juris prudentissimus. Nomophylax, Sebastus, ac Protosebastus fuit; inque aula Imperatoris, magni habitus. Plura scripsit; *πρόχειρον νόμων*, seu Legum Promptuarium. eidem tribuuntur Collectiones tres, Legum nempe Militarium, Coloniarum, Navalium. Quod pertinet ad rem nostram, Epitomen divinorum & sacrorum Canonum edidit; quos quemadmodum collegerit, quoque ordine usus fuerit, ipse in præfatione Collectionis suæ persequitur. Matthæus Blastares deinde collocatur, & Simeon Logotheta. Priorem Justellus pater in præfatione ad Codicem Canonum Ecclesiæ universæ, inter scriptores Nomocanonum numerat. Meursius etiam hujus Synopsin Conciliorum memorat in Glossario. Edidit posterior Canonum Epitomen, eodem fere modo, quo Alexius Aristinus. Græce, Latineque Bibliothecæ Juris Canonici Veteris tomo II. Christophorus Justellus edidit. ac mirum est, Leonem Allatium, hominem eruditissimum, in Diatriba de Simeonibus, & eorum scriptis, nostri hujus mentionem nullam fecisse. Sed jam a Græcis ad Latinos transcamus. Primus occurrit scriptor inclytus, Gratianus, qui, ut Antonii Augustini verbis utar, eorum omnium, qui ante se Canones collegere, laudes obruit. Sed ab initio est ordiendum. Is natione Etruscus, patria Clusinus fuit; ac prorsus errant, qui Classensem

M

faci-

faciunt. Incerto natum patre nonnulli prodiderunt; eademque matre adultera progenitum, qua Petrus Lombardus, Antistes Parisiensis, qui Magister Sententiarum appellatur, & Petrus Comestor. quæ tamen fabulis putidissimis alii at-
 texuerunt. Hunc Monachum Benedictinum Clafsensis Monasterii factum, sacrarum litterarum studio vehementer delectatum, in Chronico Martinus, & Albericus in Dictionario docuerunt. Conradi III. Imperatoris temporibus Bononiæ vixit, cum ibidem Alexander, qui deinde Pontificatum Maximum adeptus est, Theologiam publice profiteretur. In Monasterio Divi Proculi cum esset, quemadmodum Præpositus in proœmio Decret. tradit; vel ut ex Epitaphio, eaque Inscriptione, quam refert Pancirollus, intelligitur, in Cœnobio Divi Felicis, volumen Decretorum, quæ nunc pars prima Juris nostri Pontificii est, collegit; idemque Eugenio III. Pontifici Maximo misit. Sunt, qui contendunt, id operis ab Eugenio publice probatum fuisse; vimque Legis illi additam; sed Sanctio istiusmodi nondum apparuit. Magnæ auctoritatis semper fuit; deque ea hæc habet Pancirollus. *Tanta, inquit, auctoritatis fuit, ut vulgo Magister vocatus, maximum in decidendis causis pondus habuerit; etsi, veluti privati hominis, ejus dicta vim legis non obtinent. Itaque qui ejus Opus ita edidicisset, ut aliis praelegere posse videretur, baculo, veluti pro arrha doctrina, more Longobardorum, accepto, Doctoris titulo honestaba-*

statur; & a bacillo Bacillarius vocabatur; qui mos-
tum demum Bononia institutus, a Parisiensibus, ubi
tum Decreta & formula docebantur, fluxisse fertur; in
quorum vetustis Constitutionibus Bacillarii nominantur.
Porro Gratianus Opus suum, Concordiam discor-
dantium Canonum inscripsit; factumque perpe-
ram Antonius Augustinus de Emendatione Gra-
tiani lib. I. Dial. I. ab his ait, qui deinceps Decre-
tum appellarunt. Antonius Demochares Decreto-
rum Collectanea appellari vult: Decretorum Ca-
nonicorum Collectanea, Antonius Contius. Gra-
tianum autem ad scribendum accessisse, Romani
emendatores in admonitione ad Lectorem arbi-
trantur, ex facto Ivonis, qui in præfatione Col-
lectionis suæ nonnulla de pugnantibus invicem
Canonibus conciliandis tradit, ipse autem negli-
git. Illorum verba hæc sunt: *Novissimus istorum
omnium, præter Auctorem Pannormia (nam is recentior
fortasse est) Gratianus, Monachus Benedictinus, non
tantum Decretis colligendis (quod superiores fecerunt)
operam dedit; sed Ivonis fortasse præfatione excitatus,
eo potissimum incubuit, ut, certis questionibus propo-
sitis, quid in utramque partem ex Canonibus, qui in-
ter se nonnumquam pugnare videbantur, dici posset,
ipse & afferret, & explicaret; omninoque eorum va-
rietatem, qua speciem diffensionis habebat, ad concor-
diam revocaret. Ceterum in longo ac perdifficili opere,
multa a parum aqvis hominibus exagitabantur; non-
nulla pii etiam, & verecundi interdum desiderabant.*
Sed quoniam Concordia hæc Gratiani pluribus ex

M 2

por-

92 DE JURE PONTIFICUM

portionibus confecta est, ne mentes studiosorum variis hominum sententiis jactentur; de his paucis videamus. Quattuor igitur ejus fontes sunt: Jus Civile, Patres, Paleæ, Verba ipsa Gratiani. De Jure Civili si sermo sit, omnino apud nos certum est, quemadmodum Barbosa animadvertit, nullam vim Canonici Juris Civiles Leges obtinere ex facto Gratiani; nisi præterea aut Pontificis, aut Concilii alicujus Oecumenici auctoritas accesserit, eas Leges comprobantis; etsi hi aliter omnino sentiant, qui Pontifices, & Pontificios odere. Quod pertinet ad Patres; hi vel Pontifices sunt Maximi, vel viri quidam in conventibus coacti, vel alii denique, qui libris suis Codices Sacros, alia dogmata Ecclesiæ, ac disciplinam illustrarunt. Si de Pontificibus agatur, & Patribus secundi generis, quorum auctoritate Canones in Conciliis editi fuerunt, constat, quæ ab his decernantur, pro Legibus haberi; eaque peculiari nomine Epistolæ Decretales, aut Canones appellantur. De reliquis, qui scriptis suis Sacra Volumina interpretati sunt, Suarezii, & hominum doctissimorum sententia hæc est, quam lib. IV. de Legibus cap. V. n. VI. & VII. legimus. *Dicendum est, inquit, sententias, seu dicta Sanctorum per se, & quatenus nituntur auctoritate eorum, non habere vim legis. & ratio est, quia lex non est actus doctrina tantum, sed potestatis. Sancti autem Patres non habebant potestatem hanc, neque etiam hac intentione talia scripta tradebant. Dixi autem per se, & quatenus eorum auctoritate nituntur, quia interdum ipsi*
testi-

testificantur de precepto, vel a Christo, vel ab Apostolis tradito, vel Ecclesie traditione introducto, & tunc ex illis colligitur preceptum, tamquam ex testibus, non tamquam ab auctoribus. Unde juxta modum, quo de re aliqua seu obligatione testificantur, & juxta majorem, vel minorem consensum Sanctorum inter se, eo majorem, vel minorem fidem efficiunt. Addo præterea, sententias Patrum non accipere vim legis, eo quod a Gratiano in suo Decreto insertæ sunt, nisi ab aliquo Pontifice fuerint canonizata, ut inter Decretales aliquando inveniuntur. Ratio est, quia nec Gratianus habuit potestatem dandi vim legum; neque Pontifex aliquis præ legibus approbavit omnia, quæ in illo Decreto continentur. Quod attinet ad Verba Gratiani, quibus nimirum a Gratiano Canones & capita invicem conjunguntur; aut quibus distinctiones, & quæstiones exorditur; easque in partes quasdam tribuit, vel Canones conciliat dissentientes; Barbosa, vir eruditissimus, omnino existimat, nullam legum vim obtinere. Verba ejus hæc sunt: *Auctoritas Gratiani compilatoris hujus voluminis a nullo Pontifice reperitur approbata, nec est authentica*. Paleæ nunc sequuntur, de quibus pauca prius investigemus, cur *Paleæ* dictæ sint. Porro de hac re sunt variæ hominum sententiæ. Pancirollus lib. III. de Claris Interpretibus cap. II. non paucis de hac re disputat. Jacobus Cujacius ad cap. I. X. de desponsatione impub. hæc habet: *Paleæ nomine quidam significari putant, quod cassum est, & irritum, ut, caussa palearum dixit Solinus in India*. Itaque *Paleam* dici,

dici, per contemptum, Canonem nullius fidei, vel au-
 thoritatis, ut apud Johannem Cremonensem ad Abba-
 tem Uspergensensem Imperator Fridericus, qui Alexan-
 dro III. valde infensus erat post Alexandriam condi-
 tam in Liguria de nomine Alexandri III. eam Paleam
 vocat, quasi factam ex cassis palearum, ex stramine.
 Equidem verius puto, hoc nomen praponi antiquiori-
 bus Canonibus, & Decretis, & scribi debere cum di-
 phthongo Palea, quia & in Basilicis saepe video παλαιὸν
 nominari simpliciter antiquum Interpretem, & ita hanc
 Constitutionem, cum sit Hormisdæ, qui ex antiquiori-
 bus Pontificibus est, recte Palaam appellari. Anto-
 nius autem Contius, cum ad cap. II. dist. V. sen-
 tentiam Cujacii commemorasset, hæc subjicit.
 Cur hoc, inquit, & pleraque sic inscribantur, saepe
 etiam inter doctos dubitari animadverti. Qui rectius
 sentire, & sapere existimantur, quasi παλαιὸν, idest,
 antiqua nuncupata volunt. Ego autem Paleam inscribi
 hoc caput existimo, & cetera similia, quia addititia
 sunt, nec a Gratiano primitus huic libro inserta, sed
 ab Interpretibus, prout cuique commodum videbatur,
 ad marginem Gratiani adscripta, & plerumque in emen-
 dationibus, & antiquioribus exemplaribus prorsus omissa.
 Cui rei fidem facit antiquum Gratiani exemplar, quo
 in hoc emendando usus sum, in quo pleraque ejusdem
 Paleæ desunt. Afferam postremo loco, quæ Ro-
 mani emendatores memorant in præfatione Gra-
 tiani ad Lectorem. De nomine, inquiunt, Paleæ,
 sunt varia doctorum hominum sententia. Multi capi-
 ta, in quibus res inanes, ac leves continerentur, hoc
 nomi-

nomine appellari consuerunt; alii quasi τὰ παλαιά, idest antiqua; alii quasi additiones quasdam, derivata, aut potius depravata voce ab adverbio πάλιν, idest, rursum, quo scriptores etiam Latini tempore Gratiani uterentur. Verum Johannes Andrea in additionibus ad Speculatorem, titulo de Disputationibus & Allegationibus, prope finem (quem Imola in rubrica de Verborum obligationibus, Alexandrinus in proœmio Decretalium, Jason in rubrica tit. de Actionibus, & alii sunt secuti) præstat, quemdam Protopaleam, quem Jason addit Cardinalem fuisse, Collectioni Gratiani capita hæc adjunxisse. Atque, ut in re tam incerta aliquid elici conjectura possit, exponetur, quid in collatis exemplaribus observatum fuerit. In tribus, quæ sunt antiquissima, & videntur scripta paullo post Gratiani ætatem, paucissima ex hujusmodi capitibus habentur. In uno valde emendato sunt apposita in margine, sine ulla nota, sed non omnia quæ in impressis; quamvis vicissim in illo additiones aliquæ sint, quæ in his non habentur. In alio litteris perantiquis descripto Paleæ ipsa recentiori scriptura toti volumini præponuntur. In ceteris habentur aut omnes, aut pleraque; & partim quidem tum Paleæ nomine, partim vero sine ullo a ceteris capitibus discrimine. Ex qua observatione illud videtur posse colligi, has Paleas esse additiones non eodem tempore factas, ad primam Collectionem Gratiani, in margine primum adscriptas, ac nonnullas fortasse ab ipsomet Gratiano (ut sit) inter componendum, aut relegendum; quas deinde librariorum quidam omiserint; quidam in contextu posuerint, interdum conjuncte cum

prio-

prioribus capitibus , interdum cum aliquo discrimine . Falsam vero esse illorum opinionem , qui eas contemnendas putant , ex eo constat , quod multe & in Decretalibus , & apud vetustiores Gratiano Collectores habentur ; quod suis locis indicabitur . Aliæ ab aliis de hac re sententiæ dictæ sunt . Quæ verissima sit , Deus viderit . Ego neque diutius nunc vaticinari volo , neque ex his sum , qui cibum & somnum amittere velim ob hanc rem . Quod pertinet ad auctoritatem earundem Palearum , Romani emendatores , ut supra demonstratum est , non contemnendas esse ajunt , eademque fere doctores gravissimi tradiderunt . Id valde displicet , in Collectionem hanc Gratiani conficta , ac supposita multa irrepsisse , cujusmodi plures sunt Isidori Mercatoris falsæ Epistolæ , aliaque non pauca . Tres autem partes sunt Decreti Gratiani . Prima continet CI. Distinctiones : secunda habet Causas XXXVI. , & quælibet Causa suas Quæstiones . Post Quæstionis XXXIII. tractationem disputatio de Pœnitentia attexitur , quæ distinctionibus continetur VII. Tertia denique pars de Consecratione est , & tribuitur in V. distinctiones . Nonnulli , Gratianum tradiderunt fuisse Cardinalem , sed id plurimi inter fabulas rejecerunt . Verius esse puto id , quod tradit Pancirollus , titulo Magistri a veteribus donatum fuisse Gratianum ; non a Pontificibus dignitate Cardinalis . Quo tempore diem suum obierit Gratianus , omnino latet . Epitaphium , quod ei mortuo positum est Bononiæ , recitat Pan-

Pancirollus lib. III. de Claris Interpretibus cap. II.; est autem istiusmodi:

GRATIANI CLVSINI. CAESAREI IVRIS ET PONTIFICII ENVCLEATORIS PROPE DIVINI. QVI MONACHVS IN MARTYRVN FELICIS ET NABORIS AEDE. ABSOLVTISSIMVM IBIDEM OPVS DECRETORVM ANNO GRATIAE MCLI. COMPILAVIT. SEPVLCRVM QVOD IL-
LIC CARIE ET RVDERIBVS ABSORPTVM. HIC MAGNIFICENTIVS RENOVATVM. IOANNES FRANCISCVS ALDROVANDVS BONON. IV. DICTATOR AERE PVBLICO RESTAVRAVIT ANNO SALVTIS MCCXCXVIII. IDIB. IVNII IOANNE BENTIVOLO II. P. P. REMP. FELICITER GVBERNANTE.

A Decreto Gratiani ad reliquas Collectiones descendamus, nempe Decretalium, quæ cum plures sint, brevi tamen persequar. Princeps qui privato studio collegit Decretales Epistolas, Bernardus Circa fuit, primum Præpositus Papiensis, deinde Antistes Faventinus. Is Pontificum Decretales Epistolas, & Constitutiones usque ad Cælestinum III. hujus nominis collegit, & titulis iisdem fere disposuit, quibus Gregoriana Collectio constat, qua nunc utimur. Henricus Ostiensis, & Ægidius Bellamera Compilationem primam vo-

N

cant:

98 DE JURE PONTIFICUM

cant: ipse autem, Breviarium Extravagantium. Antequam ad secundam Decretalium Collectionem descendendo, de Theodoro Balsamone hoc loco pauca quædam dicam, qui iisdem fere temporibus, quibus Circa, floruit. Diaconus is primum fuit Constantinopolitanus, Nomophylax, Chartophylax, Primus Blachernorum, ac postremo Patriarcha Antiochenus. Plura scripsit, quæ alii commemorarunt; in his Emmanuelis Comneni Imperatoris, & Michaëlis Anchiali, Patriarchæ Constantinopolitani, hortatu, *Expositionem sacrarum, & divinarum Canonum; sanctorum & celebratissimorum Apostolorum; & sanctarum Oecumenicarum Synodorum, ac etiam localium, ac particularium, & reliquorum Sanctorum Patrum; præterea earum Legum, quæ sitæ sunt in XIV. titulis positæ in principio Canonum, ut sciatur, quæ in usu sint, & quæ non sint.* Id operis Græce, Latineque, Lutetiæ Parisiorum anno a Christo nato MDCXX. ex interpretatione Herветi editum est.

Seculo XIII. facta est Collectio secunda Decretalium, cujus tres memorantur auctores, Gilbertus nimirum, Alanus, & Johannes Gallensis, seu Vallensis. Tertiam Collectionem adornavit Bernardus Compstellanus, quæ Romana dicta est. Quarta quinquennio post tertiam sub Innocentio III. Pontifice Maximo anno a Christo nato MCCXV. facta est, cui causam dedit Concilium Lateranense IV. Duplex hujus Collectionis editio exstat, altera, quæ habet Canones Concilii Late-

Lateranensis LXXI. dumtaxat; altera, cui alia etiam Rescripta sunt adjecta. Tancredus Bononiensis Archidiaconus quintam adornavit, in quam conjectæ sunt Honorii III. Constitutiones. Hanc primus edidit multis post annis Innocentius Cironius, Academia Tholosanæ Cancellarius, & animadversionibus illustravit.

Hanc excepit sexta Collectio, quæ Gregorii IX. jussu, a D. Raymundo Pennafortio anno MC-CXXX. adornata est. Expressa illa fuit ex Collectionibus superioribus; ea præterea adjecta, quæ in his fuerant prætermissa; postremo insertæ Gregorii ipsius Constitutiones, quas ille ex Jure Civili Romanorum fere hausit, ut sæpius Cujacius animadvertit; id quod diligenter eos velim animadvertere, qui Juri Pontificum operam dant. Porro hæc Collectio Gregoriana libris V. continetur, quorum summam indicat Versiculus ille: *Judex I. Judicium II. Clerus III. Sponsalia IV. Crimen V.* Eosque plures commentariis & glossis illustrarunt, quos nil necesse est nunc commemorare. Hoc loco pauca quædam de Arsenio Monacho interferam. Fuit is Patriarcha Constantinopolitanus, ac sub Theodoro Lascare Juniore Canonum Synopsin ex Conciliis & Patribus in Concilio Trullano approbatis collegit, anno a Christo nato MCCLV.; qua diligentissime Canonicae disciplinæ scientiam CXXXI. titulis complexus est. Quod capita quædam Legum concordantia in ea collocarit, nonnulli Nomocano-

nem hanc Collectionem Arsenianam appellarunt. Vetitæ deinde in Occidente fuere Collectiones privatorum hominum ; quamobrem usque ad Bonifacium VIII. qui ordine ab obitu Gregorii Pontifex XV. fuit, industria Collectorum siluit. Pontificatum igitur obtinente Bonifacio, liber VI. Decretalium adornatus est, sic appellatus, quod quasi liber VI. aliis quinque Gregorianis additus sit. Seculo XIV. Clemens V., qui Benedicto XI. successit, libris V. Concilii Viennensis Constitutiones, & suas complexus est, quas tamen morte præventus vulgare non potuit; vulgavit tamen, ediditque Johannes XXII. Hic ipse Johannes Pontifex edidit deinde Extravagantes XX., quæ ita appellantur, quod extra corpus ceterarum Collectionum vagantur. Sunt qui tradant, eas nequaquam prodiisse jussu, & auctoritate Johannis XXII., sed fato nescio quo. Eidem Johanni XXII. tribuuntur Regulæ Cancellariæ, quas Ludovicus Gomefius commentariis illustravit. Sub finem XV. sec. prodiit Collectio illa Extravagantium, quæ nomine Communium appellantur, quia non sunt Pontificis unius. Seculo XVI. opera & industria Paulli Lancellotti, Juris Pontificii Institutiones adornatæ sunt ; eodemque fere tempore Marcus Antonius Cuccus, J.C. Ticinensis, privato studio Institutiones ejusdem Juris Pontificii scripsit. Bullaria, quæ appellantur, sunt deinde consecuta, quæ Pontificum Constitutiones integras continent ex regestis;

stis; qualia anno MDLXXXVIII. Romæ edidit Laërtius Cherubinus. Sub finem seculi XVI. anno nimirum MDXC. Petrus Matthæus J. C. Lugdunensis privata auctoritate collegit VII. Decretalium librum, quem Cajetano Cardinali misit, & in eum, eodem librorum numero, & titulorum serie retenta, quæ in Gregoriana Collectione, Constitutiones Pontificum post Sextum, Clementinas, & Extravagantes, coniecit.

Atque hæc hæctenus de Collectionibus certis, earumque auctoribus, & tempore. Aliæ etiam sunt incertæ, de quibus alibi dicam. Sic seculorum XVI. historiam complexi sumus. Seculo etiam XVII. Collectiones quædam factæ memorantur, de quibus fortasse aliquando.

Perendie ad libros exponendos Decretalium Gregorii IX. initio ducto a titulo de Constitutionibus aggrediar. Faciam more, institutoque majorum, ut Canones ipsos, & Epistolas Decretales, quæ Collectione hac Gregoriana continentur, diligentissime expendam; adhibitis nimirum, pro virili, tenuique parte mea, iis præfidiis, & instrumentis, quæ patrum nostrorum memoria, majorumque, certo scio adhibita fuisse; quæque ipse, vestigiis illorum insistent, Oratione prima populari, pollicitus sum, me adhibiturum.



P A T A V I I. C I D I O C C X X V I I I.

Excudebat JOSEPHUS COMINUS.

SUPERIORUM PERMISSU.

11.2.171

413

ANTONII ARRIGHII

PUBLICI JURIS PONTIFICII
PROFESSORIS
PRO JURISDICTIONE
PONTIFICUM

ORATIO,
HABITA IN GYMNASIO PATAVINO,
ANNO MDCCXXVIII.
MENSE NOVEMBRI.



PATAVII. CIOIOCCXXI.
EXCUDERAT JOSEPHUS COMINUS
Superiorum Permissu.

THE
JOURNAL OF THE
ROYAL ANTHROPOLOGICAL INSTITUTE
OF GREAT BRITAIN AND IRELAND
VOLUME 34
PART 1
1904

PUBLISHED BY
THE LONDON AND WINDSOR
PRINTING CO. LTD.
1, ABINGDON STREET, LONDON, W.C.2.
AND BY THE
PUBLISHERS OF THE JOURNAL OF THE
ROYAL ANTHROPOLOGICAL INSTITUTE
OF GREAT BRITAIN AND IRELAND

PRINTED BY
THE LONDON AND WINDSOR
PRINTING CO. LTD.
1, ABINGDON STREET, LONDON, W.C.2.

ANTONIUS ARRIGHIUS
VIRO AMPLISSIMO
JOHANNI FRANCISCO
MAUROCENO
EQUITI
S. P. D.



UM mihi superioribus annis, in Gymnasio hoc Patavino Jus Pontificum publice tradenti, Illviri Litterarv Judiciorum munus, ac Jurisdictionis persequenda, quae pertinet ad Pontifices, lege ac more detulissent, visus sum, veluti in secundo pacatoque navis cursu, flatu abripi ventorum quodam, inque syrtis scopulosque provehi atque inferri. Probe enim scis, Amplissi-

me Senator, pro tua sapientia, cultuque doctrinarum, inesse multa illi disciplinæ & aspera & difficilia; quæque omni ævo iras inter homines, & turbas excitarint. Sed quæ de Jurisdictione atque Imperio Pontificum disputantur, sunt ejusmodi, ut dissidia non modo pepererint animorum, sed cædes etiam, fugam, vastitatem, & siquid his deterius, fortuna sæva, a mortalibus iratis mortalibus contingit. Quæ enim non fuere in terra Italia de hac re contentiones, majorum nostrorum memoria? Quæ non probra objecta litteris? quæ non minæ? quæ non sic intentæ truculentæ? Res sunt in medio; nec sine ingenti animi dolore, aut reminisci licet, aut retractare.' Quæ utinam intra alpes, & ostium Oceani constitissent; nec ultra ad populos ac nationes excultissimas calamitas manasset. Sed quæ non facta sæva ac misera Germaniam, Bataviam, Angliam, Gallias, Hispaniasque binas divexarunt? quæ non Africam, natam ad certandum? atque, ut dicam paucis; quæ non plagam ac gentem omnem Orientalium & Occidentalium? Hæc igitur cum mihi menti animoque jamdiu obversarentur, non manus inde modo, industriamque, sed etiam oculos, si id fieri per litteras liceret, abstinere cupiebam; omninoque declinare rerum genus, quas studio ac factione partium scriptores quidam truces & virulenti odore ac tætu quodam venenato corrupissent. Nota tibi nomina Guillelmi Occami, Marsilii Menandrini, Jobannis Sandei, Leopoldi Bambergensis, Arnoldi Villanovani, Radulphi Columnæ, Jobannis Parisiensis, qui commentariis editis in banc rem, turbarum plus fecere, quam necesse esset. Quid gloriæ Etruscæ lux, Dantes Aligherius, qui instar sexcentorum mihi est? libris illis tribus, quos De Monarchia inscripsit, quæ non pronuntiavit? quæ non alii docuere scriptores innumerabiles? Sed quæ dicis caussa provincia data esset, cum aut negare, aut deserere minime liceret; id

mibi

mibi agendum omnino existimavi, ut, cum illorum disputationes omnino declinarem, illa non negligerem, quæ hominis non inerediti tueri famam possent; quæque ad veritatem pertinere mihi viderentur. Judicia itaque Pontificum, ac Jurisdictionem, seu potius ejus rei simplicem historiam, ex libris hauriam Juris Civilis, asserre in medium sum conatus; adhibitis in loco Patrium auctoritatibus, veterumque Historicorum testimoniis. Visus mihi sum in omni oratione modum habuisse; stetisse etiam intra modum; inque vetere proposito hominum sapientissimorum permansisse, qui tradere non dubitarunt; teneri Jus Pontificum baudquaquam posse, nisi illud ad fontes, summasque origines Juris Civilis traducatur. Quæcumque fuerit industria mea, Amplissime Senator, quam sane sentio, quam tenuis & misera illa sit, eam ego fidei, ac tutelæ tuæ, tuæ, inquam; hoc est, primum Sexviri, tum Triumviri, denique, quod caput est, JOHANNIS FRANCISCI MAUROCENI, volui commendatam; inque tuo nomine, cum latere jam in pluteis ac palimpsesto, ephemeride præcepta, amplius non posset, publice apparere; ut virtute tua ac præsidio honestata, a morsu & impetu hominum malevolorum tuta sit. Tua enim dignitas hoc tibi tribuit, & fortuna, ut posses; mores & natura, ut etiam velles, litteras ac disciplinas, eosque, qui illas profitentur, in tuto esse; sequi præmia; nascosque otium & nobilitatem, perpetua quadam felicitate vitæ consensescere. Idque ipsum est, quo nunc boni capiuntur; quo te cuncti prædicant, in luce ista civitatis clarius exsplendescere, quo te cuncti diligunt, colunt, venerantur; hi præsertim, qui excellenti quadam ingenii magnitudine, & litteris ornantur; seque pulcbros beatosque putant, qui hospitium; qui clientelam; quique benivolentiam tuam egregie ullis factis fuerint aliquando consecuti. Atque hæc quidem magna laus, atque ampla, ex uberiore tua bonitate, ac benefi-

cen-

centia orta, cujus nomine nulla de te etas, aut gens umquam conticeſcet; ſed major illa proſeſſo vicit, qua te agente Veneta Reſpublica ſepe ſenſit, maxima pericula, graviffimis temporibus, virtute pulſa, judicio, diligentia, ac ſapientia tua; naſſamque ſe ſe tuo labore id boni, quo nullum majus in civitate eſt bonum, incolumitatem. Teſtis in hanc rem Legatio illa ſit, quæ Vindobonæ ſuperioribus annis magnificentiffime obita per te eſt apud Cæſarem; teſtes binæ illæ, quæ Romæ apud Pontificem; quo tempore, cum terroris ac formidinis plena eſſent omnia; cum non modo Venetorum urbes, ac provinciæ, maria ac littora, omnesque oræ pertimeſcerent; ſed Italia etiam univerſa; fuiſti tu, qui Reipublicæ opera, conſiliisque tuis opitularere; pericula propulſares; illa denique ad ſalutem, providendo, agendo, orando, exorandoque aſſerres, quæ homo poteſt. Idque tibi bonum præſtans eſt de te ipſo; quamquam aliunde mutuari potuiſti; ubi magna ac præclara ingenia domi provenere, virique prudentiffimi, ad litteras, ad honores, ad Rempublicam, denique ad omnia ſumma nati. Hinc Pater tuus eſt; hinc Majores omnes, Senatorii, Procuratorii, Principes, Imperatoresque, quorum ſtudiis ac diligentia factum eſt, ut Venetiæ iſtæ tuæ, juſtitie ac fortitudinis admiratione quadam, mortalibus occurrant, & quaſi luceant. Hos cernit atque ediſcit; hosque, ut ille inquit:

- - - arcto ſtipata theatro

Speſtat Roma potens;

Teque maxime, qui numquam recte feciſti ut facere videreris; ſed quia aliter facere non poteſ. Vale.

Patavio, poſtridie Kal. Majas MDCCXXXI.



PRO JURISDICTIONE
PONTIFICUM
ORATIO.



REDO ego, neminem ex
vobis exspectare, ut nunc
pronuntiem, qua de re
verba hoc anno ex hoc lo-
co sim facturus. Ita enim
hominibus nostri ordinis
Illviri Litterarii partes Ju-
ris Pontificii, ac munera
pararunt, ut Legum ferun-

darum obita provincia, agant de Judiciis. Hæc
vel ipsis nostris nota apparitoribus, nil neces-
se arbitror, longa oratione, & pluribus exagge-
rata, vobis indicare. Id quidem video, fieri a
me prorsus oportere, ut, Judiciis ipsis, ac for-
mulis Judiciorum, eo, quo dixi, jussu, ad nos
delatis, rem arcessam ipsam a suis originibus, &

to-

totum hoc purgem criminis & probri, quod *ἐπιπρόβου*, utinam ne etiam aliquot ex nostris, Pontificibus objectant. Nimirum in Judicia, & tam nitidam possessionem lege & jure eos non venisse, sed irrupisse; ac de sede sua veteres sessorum deturbasse, vel cum his una in illa esse. Nisi hoc diluo, ac planum facio per tabulas ac testes, Judicia, & actiones, illarumque formulas ad Pontifices nullo scelere, aut fraude pervenisse, id ipse agere omnino videar, Judicia persequendo, quod illi agunt, qui ingentem sumunt operam in re futili ac nugaci. Omnino sic intelligo, rem me suscipere, alæ, molestiæ, laborisque plenam, & hominum consiliis iratorum, fluctibusque objici opinionum, quos viri prudentissimi non sine causa declinarunt. Sed jure illi ea causarentur, quibus maxime permoti, dicta ac voces hominum timere potuerunt. Mihi veritatem unam adamanti, nec tanti facienti aut asperum sermonem, aut laudem mollem, facile fuit, venire in regionem, quam plurimi desertam; vastam alii; studio veritatis ac virtutis ducti pauci, excultam voluere. Utinam me homines de hac re aliqua dicentem tantisper ferre velint; eaque patienter audire, quæ ex bonis sumsi. Faciam bonis actionibus; ut parumper mihi in re versari liceat, bona illorum venia; his saluum jus sit, re utrimque disceptata, libere dicendi; si malint etiam, male. Neque enim meum est consilium, demere nonnullis eam voluptatem, quæ tantopere titillat, cum jure, vel inju-

injuria bonis detrahunt. Detrahant pro libidine; per me licet. Sed obsecro, hoc finant, si id tamen fieri ulla ratione potest, me ab ipsis impetrare, ut, postquam fabulam partiti, has sumere partes ipsi sibi, ut nihil agerent; desinant, si agant, bonis maledicere, & miseram particulam probitatis iisdem invidere. Igitur ut appareat, ad Pontifices æquo & bono forum & Judicia pertinere, historiam Jurisdictionis quasi quamdam, viam muniturus, brevi attingam, a temporibus antiquissimis ad hanc diem usque ductam, qua die tam libere & impudenter optimis Pontificibus homines conviciantur. Spero, me ex lacu hoc tam turbido, præsidio tabularum, & hominum sapientissimorum opera & conatu facile emerfurum; atque eo rem adductum iri, ut, qui Pontificibus bellum de Judiciis indixerunt, manus illis victas ultro dent. Alii fortasse nullo modo dabunt, qui ita existimant, Pontificum Judicia Maximorum, & totam illam de hac re ab ipsis constitutam disciplinam, mentemque interiorem etiam ab his cognosci posse, & optime teneri, qui prorsus sunt expertes earum rerum, quæ res a veteribus Romanis de Judiciis, eorumque natura traditæ ac præceptæ, Juris Civilis libris continentur. Alterum hoc certamen est, de quo id dicere majores nostri consueverunt; hoc est, boni illi, ac docti viri, qui XV. & XVI. seculo artium optimarum studia Italiæ reddiderunt; qui sic contenderent, fureri & ineptire; inque ea pugna non gladiis o-

pus esse, sed fuste. Quid enim stultius excogitari a quoquam umquam potest, ne dicam turpius, quam ut artes duæ distraherentur, omnium nobilissimæ, quarum altera magnam partem alteram peperit? quæque inter se natura ac diligentia ita aptæ & conjunctæ sunt, ut non vinculum dissolvi, si quis eo manum afferat, sed diffringi videatur? Recte igitur Cujacius, quem accepimus, eos solitum execrari, qui veterum scriptorum lectionem, legum litiumque actionibus implicitam; eaque Judicia, quæ Pontifices, Dei & hominum concessu, compararunt, docendo, commentando, consulendo distraxissent. Atque is quidem Jurisperitorum formulas, veluti quemdam sanguinem, e legum Romanarum corpore, latius influere, omnino existimavit; nec Romanam ullam esse disciplinam, cujus non pars aliqua; sæpe etiam tota, Romani fori specie, earumque rerum quæ eo adducerentur, notitie illustraretur. Loca ergo plura esse Plautina, ac Terentiana, ut alios omittam; loca plura historicorum, quibus eæ formulæ maxime latebant; illarumque ope ea noscerentur; oratorum autem non loca modo, sed libros esse integros, qui per omnem causam positam naturam in formulis iisdem & legibus haberent. Jus igitur Civile, ac legitima Judicia, ut sæpius inculcemus, semen esse quoddam & elementum artium plurimarum, præsertim hujus nostræ, quæ cum sit aucta & locupletata plurium disciplinarum opibus & ornamentis, legum vi ac robore maxime hone-

honestatur. Hæc mira his fortasse videbuntur, qui in nostra disciplina vehementer occupati, ac magnas rationes persecuti, multa quæsierunt, hæc non quæsierunt. Sed optimis ingeniis jam parcamus; deque Jurisdictione, quod suscepimus; dicere aggrediamur.

Ut igitur ortus & progressus ejus Jurisdictionis, quæ pertinet ad Pontifices, investigetur, principio id constituendum arbitror, esse omnino legitimum principatum in Ecclesia; qui primo quidem fuit penes Petrum; deinceps penes eos, qui, salvis majorum legibus, nec comitiis perturbatis Pontificatum Maximum post Petrum tenuere. Puto hoc mihi a vobis ultro dari, nec a me contendere, ut in re hæream, operamque sumam. Id bonos omnes, utpote sententia Codicum Sacrorum sanctiore definitum, accipere & probare prorsus video; eosque, quibus est unum studium non veri investigandi, sed de quaque re libere dissentendi, dumtaxat dissentire. Porro principatu, quem diximus constituto, eodemque aucto, Principum benignitate, iusta dominatione, facile id fiet, ut huic adjungamus legum ferundarum potestatem; quodque ex latione manat, juris reddendi dicundique. Hæc enim singula invicem cohærent, nec possunt separari. Quod qui non vident, nihil vident; earumque rerum, quæ legum Romanarum libris continentur, sese imperitos & ignaros profitentur. Ratio est enim quædam principatus, ut si vis ei imperii & potestatis ab

aliquo dematur, ne sit quidem principatus; concidat deinde imperium & potestas, dilapsa latitudo; porro quæ sit latitudo ulla in civitate, sublata facultate cognoscendi? est enim consecutio ejus juris, quod positum in rogando ferundoque, principatui adhærescit. Hæc vera sunt, nec possunt ratione ulla hominum opinionibus labefactari; satisque esse possent homini non pervicaci, ut fateretur, justam potestatem atque Jurisdictionem ex more & jure, rectaque ratione, & optimis oraculis expressam, Pontifices tenere. Sed amabo vos, Auditores, agamus liberaliter; ostendamusque per temporum memoriam, & incorrupta monumenta, quæ hæc ipsa Jurisdictio, primordiis caussarum involuta, ac veluti vagina inclusa, oblatiis rebus, perque annorum spatia, educi explicarique cœperit a Pontificibus; quæque in nudo jure ac simplici versata primum sit sanctissimæ animadversionis; mox rebus auctis, libere traducta ad indolem imperii atque potestatis; quæ vis est una ac propria Jurisdictionis; easque res, quibus rebus actio, accusatio, petitio, coercitio, forum denique, ac Judicia continentur; quibus opibus ac præsiidiis destituta, nec stare ullo modo potest Jurisdictio, neque mente concipi, neque intelligi. Igitur initio eo fere genere potestatis, quod in animis curandis, alendaque officiorum ac virtutum, mutæ præsertim Christianæ caritatis, rectissima communione, positum est, usi sunt Pontifices. Hanc vulgo appel-

pellant spirituales Jurisdictionem, quæ manare dicitur ex ea potestate, qua Christus primum auxit Apostolos, his verbis: *Data est mihi omnis potestas in celo & in terra. Euntes ergo docete omnes gentes, baptizantes eos in nomine Patris, & Filii, & Spiritus Sancti; docentes, eos servare omnia, quaecumque mandavi vobis, & ecce vobiscum sum omnibus diebus usque ad consummationem seculi.* Qui hæc altera cohæsit, quæ his verbis continetur: *Accipite Spiritum Sanctum. Quorum remiseritis peccata, remittuntur eis; & quorum retinueritis, retenta sunt.* Et illis: *Si peccaverit in te frater tuus, vade & corripe eum inter te, & ipsum solum. Si autem te non audierit, adhibe tecum adhuc unum, vel duos testes. Si non audierit eos, dic Ecclesia. si Ecclesiam non audierit, sit tibi, sicut ethnicus, & publicanus. Amen dico vobis, quaecumque alligaveritis super terram, erunt ligata & in celo; & quaecumque solveritis super terram, erunt soluta & in celo.* Huic potestati hæc inesse omnia, nostri affirmant: docere, interpretari, sacra facere, orare ad populum, solvere flagitio, rursus carpere, coetum pellere, vel excipere, legitimos conventus agitare, alia pleraque, quæ vix sunt propria Jurisdictionis, ne vix quidem; si quidem hanc ipsam intelligimus, quod supra demonstratum est, longe ac late vim manantem, cumque imperio, ac sanctissimis Judiciis cohærentem, & justa quæstione. Sed cito tamen, quæ sancta illa, atque interiore potestate contineri diximus, ad arbitria pervenere. Namque Divus Paullus
vehe-

vehementer reprehendit, siquidem illorum, qui religioni Christianæ nomina dedissent, ad hos, qui non dedissent, eorumque magistratus, controversiæ deferrentur. Sic enim existimavit, veluti iniquo loco, initum istiusmodi certamen. Verba ejus hæc sunt, quæ in Epistola I. ad Corinth. cap. VI. inveniuntur : *Audet aliquis vestrum, habens negotium adversus alterum, judicari apud iniquos, et non apud Sanctos? An nescitis, quoniam Sancti de hoc mundo judicabunt? secularia igitur judicia si habueritis, contemptibiles, qui sunt in Ecclesia, illos constituite ad judicandum.* Huc illa pertinent, quæ tradit Augustinus Psal. CXVIII. Serm. XXIV. *Constituit enim, inquit, talibus causis Ecclesiasticos Apostolus cognitores, in foro prohibens iurare Christianos, & in Homil. L. Hoc ipsum habere inter se judicia, et lites de secularibus rebus, delictum esse dicit: quod tamen ferendum esse admonet, si vel Ecclesiastico judicio lites istiusmodi finiantur.* Antiquissimi igitur Pontifices, quemadmodum ex locis pluribus apparet, eorum memores, quæ Apostolus præceperat, ita compararunt, ut in litibus dijudicandis arbitros Episcopos Christiani sumerent. Inde factum est, ut Gregorius, Episcopus Neocæsariensis, qui Decii Imperatoris ævo floruit, in causis disceptandis, crebro adhiberetur; deque eo in Oratione de ejus vita prodidit memoriæ Gregorius Nyssenus, de lacu cognovisse, cujus rei causa erat inter fratres duos acerbissima contentio. Ejus verba hæc sunt, ex Græco sic Latine versa: *Li-*

tis

*is fit dominus Magister; qui, cum ad locum, de quo controversia erat, venisset, suis ipsius legibus utebatur ad iudicium. Ejus etiam exstat Epistola, quam Græci Canonicam vocant, ex qua intelligitur, non solum Gregorium ipsum fecisse arbitria, sed sæpe etiam cum fratre Euphrosyno communicasse. Fecisse Ambrosium lib. VI. Confessionum cap. III. scriptum reliquit Augustinus his verbis: Secludentibus me, inquit, ab ejus aure, atque ore catervis negotiosorum hominum; quorum infirmitatibus serveiebat. Postremo Augustinum ipsum, virum omnium sanctissimum, sapientissimumque fecisse sæpius certum est. Quam multa enim de eo Possidius, testis idoneus, in hanc rem memoriæ prodidit! quam multa de se idem ipse Augustinus pluribus locis! quam multa denique Auctor libri de opere Monachorum, qui Augustino tribuitur, cap. XIX. ! quo loco quasi querens & dolens, se rebus illiusmodi a rerum divinarum contemplatione abstrahi, cogique inter jurgia ac turbas totos dies sumere, sæpissime jejunum: *His nos molestiis*, exclamat, *idem affixit Apostolus, non utique suo, sed ejus, qui in eo loquebatur, arbitrio.* Hæc viam quamdam ad Judicia munierunt, easque res, quibus fori species, ac judicis majestas continetur. Sed quod fit fere in rebus humanis cæteris, ut non continuo, sed datis intervallis, ac veluti per gradus quosdam perfectionem suam adipiscantur; contigit id ipsum ei Jurisdictioni, quam obtinent Pontifices; Judiciis item, quæ ex Jurisdictione*

Etione manant . Etenim principio Imperatores cum animadverterent, caste ac sancte a sanctissimis Episcopis arbitria administrari, sic constituerunt, ut, sella posita, iudicis personam sumerent, sententiasque pro tribunali ferrent. Sed res tamen ita distinxerunt, ut, cum potestatem cognoscendi facerent, cogendi denegarent; sibi ac magistratibus creatis Imperium, ceteraque omnia, quæ Imperium ac Jurisdictionem comitantur, reservarent. Hinc voces illæ imperatoriaræ, *notionis & audientie*, quæ passim in libris Codicis Justinianæi inveniuntur: quibus vocibus non plenam Jurisdictionem, aut libera Judicia ad Episcopos delata, nostri docuerunt, sed rem divisam; ita ut quæ noscendo & audiendo Episcopi inchoarent, dati iudices cogendo, & imperando ad exitum perducerent, & consummarent. Huc litteræ illæ, Basso & Philippo Coss. datæ Idib. Decembr. ab Arcadio, Honorio, & Theodosio Imperatoribus ad Theodorum Præfectum prætorio, pertinent, quarum hæc sunt postrema verba: *Per iudicum quoque officia ne sit cassa Episcopalis cognitio; definitioni exsecutio tribuatur*. Huc etiam spectat Constitutio illa inelyta Constantini, quæ a veteribus memoratur; quæque quavis hominum ac temporum injuria non intercidit. Exstat illa integra in lib. XVI. Codicis Theodosiani sub titulo, *de Episcopali iudicio*; quamque post paullo totam omnino cum fide recitabo. Ejus fit etiam mentio apud Sozomenum & Nicephorum. Operæ pretium erit, scriptoris utrius-

utriusque testimonia commemorare. Verba Sozomeni, quæ lib. I. cap. IX. inveniuntur, hæc sunt, ex Græco sic Latine versa: *Illud porro, inquit, est plane maximum reverentia Imperatoris erga religionem argumentum, quod clericos ubique per legem immunes præstitit; quodque illis, qui erant in iudicium vocati, dedit potestatem, si vellent magistratus civiles rejicere, ad Episcoporum iudicium provocandi, atque eorum sententiam ratam esse, & aliorum iudicum sententiis plus habere auctoritatis, tamquam ab ipso Imperatore prolata statuit; quin etiam iussit, ut magistratus res iudicatas exsequerentur; militesque eorum voluntati infererent.* Nicephori testimonium legimus lib. VII. cap. XLVI. his verbis, sic Latine redditis. *Qua vero, inquit, Imperator erga fidem observantia fuerit, abunde illud quoque testatur, quod clericos omnes, lege lata, liberos esse permisit, iudiciumque in eos Episcopis, siquidem civilium iudicum cognitionem declinare vellent, mandavit; & quod Episcopi iudicassent, id vim sententia omnem obtinere decrevit; & qua ab Episcopis iudicata essent, ut ea a magistratibus RP. administrantibus, militarique, qua sub eis esset, manu, executioni mandarentur, constituit.* Hæc cum ita sint de Constantino, & illius Constitutione; fuere tamen Patrum nostrorum memoria, qui multis ac magnis verbis contenderent, nequaquam ab eodem esse editam. Eam homines ociosos excogitasse ac supposuisse; quique Pontificibus cuperent; eorumque potestatem auctam vellent, florentemque. Itaque una opéra & legis vires conati sunt infringere,

C

& So-

& Sozomeni ac Nicephori, quasi turpiter e-
 mentirentur, auctoritatem. In his Caroli duo
 fuerunt, Feuretrus alter, alter Loyseus; quodque
 pudet, Jacobus Gotthofredus, cui ego homini
 tantum tribuo, ut, cum Cujacio parem faciam,
 cæteris anteferam; sicque omnino existimem,
 tunc dumtaxat Romanas leges, illarumque vim
 ac sententiam ignorasse, cum voluit. Libet
 paucis commemorare, quæ contra allata sunt.
 Legem Constantinianam carere die & Consu-
 le; in Codice Justiniani non exstare; Innocenti-
 um deinde, tertium hujus nominis, optimum
 Pontificem, prudentissimumque; quique undi-
 que arriperet & aucuparetur, quæ sibi ratione
 aliqua commoda & utilia arbitraretur, uti po-
 testatem suam augeret & confirmaret, ejus Con-
 stitutionis nihil meminisse. Si qua putet de ea
 re commemoranda, non Constantino, sed Theo-
 dosio tribuere. Postremo quod lege hac id con-
 cedatur, ut laicorum causæ ad Episcopos de-
 ferantur, sive uterque litigantium libere assen-
 tiatur, sive alteruter. Obsecro, numnam ho-
 mines istiusmodi nunc nugantur? Nullæ ne cer-
 tæ ac justæ literæ; nulla vera Constitutio; nul-
 la rata lex, lata ab Imperatoribus; sancta deni-
 que, ac legitima erunt rescripta nulla, nisi qui-
 bus dies & Consul appositi inveniantur? Vi-
 deant, ne fallantur. Cedo mihi Codicem Ju-
 stiniani. Liber est primus pluribus inscriptioni-
 bus conclusus. Sunt libri reliqui copia rescri-
 ptorum ac legum refertissimi. Putasne Constitutio-

tionem, aut legem ullam inveniri posse sine die & Consule? O Dii boni! ubinam gentium sumus? Loca sunt, & ea quidem ampla, quæ inscribuntur, *De Sacrosanctis Ecclesiis, de Episcopis & Clericis, de Episcopali audientia*. Mitto reliqua, ne multa afferre videar, quæ non sint necessaria. Sic invenio, Zenonis, Anastasii, Justiniani ad Demosthenem Præfectum prætorio, Leonis ad Julianum, ejusdem ad Eurychium, Leonis & Anthemii ad Nicostratum, ad Dioscorum, ad Eutropium P.P., Leonis ad populum, rescripta alia, sine die & Consule locis iis contineri. Caste ac sancte affirmare posse mihi videor, longe in volumine illo edictorum Justiniani, Novellarumque Constitutionum Leonis Augusti, Heraclii, Leonis Iconomachi, aliorumque leges plures inveniri, quæ sine appositione Consulis & diei perlegantur, quam cum appositione. An ne propterea legis vim iisdem detrahemus? Detrahatur; una eademque opera opus inclytum concidet ac dilabatur. Cedo mihi etiam Codicem Theodosii. Liber est XVI. *De Episcopali Judicio*. Rescriptum hic reperio Valentiniani, Theodosii, & Arcadii Imperatorum ad Optatum sine die & Consule. Plura de volumine ne quæramus. Ne loco moveatur; jaceat jam misere in sordibus ac situ; cum carie ac mure colluctetur; ne, si in lucem proferam, aut aliqui mortales, qui inscitia atque ignavia sua librum perdidierunt, mihi ipsi, aut ego illis contra maledicam. Consul igitur, ac dies nihil vitii afferent,

ut ego quidem arbitror; cum præsertim neminem esse putem, qui incuriam fortasse, ac negligentiam librarii, legibus sanctissimis vitio vertat. Recte Augustinus, qui tanto ante hæc animadvertit. Sic enim habet in Collat. tertiæ diei cum Donatistis: *Cognitor etiam interlocutus est, evidentissime legibus definitum, Imperialia Constituta, etiamsi Consules non legantur, in dubium non revocari.* At nullum vestigium in Codice Justiniani. Quot etiam exstant in Codice Theodosiano Constantini Constitutiones, aliorumque Imperatorum leges, quæ in Justinianæo non inveniuntur? Quid ergo ad hæc dicemus? non esse eas leges, quæ in Codice Theodosiano inveniuntur, Justinianæo non inveniuntur? Non puto hoc esse, aut hominis eruditi, aut Jurisconsulti. At Innocentius Pontifex non tribuit Constantino, sed Theodosio. Si hoc dicunt, non re, sed nomine erratum ab Innocentio; res salva est; convenit de lege, non convenit de auctore. Si id contendunt, oblato vitio ipsi nomini, continuo offerri rei etiam; faciunt næ intelligendo, ut nihil intelligant; re enim posita ab uno aliquo, incitia alterius nihil obest; & vel in magno nominis errore res ipsa stare potest. Sed factum probe ab Innocentio, paucis ostendam. Datis litteris ad Gallos Præsules, de Philippo Gallorum rege, multis disputabat de Judicio & Jurisdictione; id quod apparet ex Cap. *Noſcit de Judic.* Sententiam in rem suam Valentiniani Imperatoris injiciebat, Caroli Capitularia, ac legem Con-

Constantini, quæ in Codice Theodosii erat. Quod cerneret, per hæc tempora, ante etiam, id moribus comparatum, ut quæ essent leges in Codice Theodosiano, etsi non omnes latæ a Theodosio, tamen Theodosianæ appellarentur, consuetudinem retinuit, scenæque & populo voluit inservire. Itaque Theodosianam appellavit, quamquam recte nosset ad Constantinum pertinere. Fecit idipsum Gratianus in Can. *Quicumque* II. qu. I. Sidonius etiam, & Gregorius Turonensis, quorum alter lib. II. Epist. I. hæc habet: *Leges Theodosianas calcans, & Theodoricianas proponens*. Alter autem lib. IV. cap. XLV. hæc scribit de quodam, cui nomen fuit Ardarcho: *Nam de operibus Vergilii, legis Theodosianæ libris, & arte calculi ad plenum eruditus est*. Non erravit itaque Innocentius, cum, re retenta, nomen Constantini cum Theodosiano commutavit. Id nunc est reliqui, ut respondeam Gotthofredo, qui legem ipsam falsi infimulavit; cuique nimium visum est, si lege permittatur, ut causæ laicorum ad Episcopos perferantur, sive uterque velit, sive alter nolit litigantium. Agam modestissime, quemadmodum discipulum decet cum magistro; cumque eo homine, cujus industria, ac sapientia factum est, ut Jus Civile bonas artes omnes, ac disciplinas in laudis, & gloriæ certamen devocarit. Ajo ego latam, Gotthofrede, ferendique causas fuisse Constantino & justas & veras; quod si ostendero, frustra contendetur, potestatem nimiam lege traditam. Porro tulisse, Sozomenus, & Nice-

Nicephorus, quod supra demonstratum est, memorie prodiderunt; nec possunt sine scelere & injuria mendacii redargui. Indicat idipsum Eusebius de Vita Constantini lib. IV. cap. XXVII. Deinde ejus legis Ivo, Gratianus, Innocentius, Carolus Magnus, cæterique Francorum reges sæpius in Capitularibus sub nomine Theodosii meminere. Ac si testimonia & judicia hominum sapientissimorum accipienda sunt, Tillemontius agnoscit, & Baronius; virque omnium prudentissimus Jacobus Cujacius in *l. XIV. digest. tit. de dote prælegata*. Jam ferendi causæ continuo intelliguntur, si lex ipsa integra recitetur. Verba igitur hæc sunt:

Imperator Constantinus A. Ablavio PF. P.

Religionis est, clementiam nostram sciscitari voluisse, quid de sententiis Episcoporum vel ante moderatio nostra censuerit, vel nunc servari cupiamus, Ablavi, parens carissime. Itaque quia a nobis instrui voluisti, olim prærogata legis ordinem salubri rursus imperio propagamus. Sanximus namque, sicut edicti nostri forma declarat, sententias Episcoporum quolibet genere prolatas, sine aliqua ætatis discretionem inviolatas semper, incorruptasque servari, scilicet ut pro sanctis semper, ac venerabilibus habeatur quicquid Episcoporum fuerit sententia terminatum. Sive itaque inter minores, sive inter majores ab Episcopis fuerit judicatum, apud vos, qui judiciorum summam tenetis, & apud ceteros omnes judices ad executionem volumus pervenire. Quicumque itaque litem habens, sive possessor, sive petitor erit, inter initia litis, vel decursis temporum curriculum,

lis, siue cum negotium peroratur, siue cum jam cæperit promi sententia, iudicium eligit sacrosanctæ legis Antistitis, illico sine aliqua dubitatione, etiamsi alia pars refragatur, ad Episcopum cum sermone litigantium dirigatur. Multa enim quæ in iudicio captiosa præscriptionis vincula promi non patiuntur, investigat & promit sacrosanctæ religionis auctoritas. Omnes itaque causæ, quæ vel pratorio iure, vel civili tractantur, Episcoporum sententiis terminata, perpetuo stabilitatis iure firmentur; nec liceat ulterius retractari negotium, quod Episcoporum sententia deciderit; testimonium etiam ab uno licet Episcopo perhibitum omnes iudices indubitanter accipiant, nec alius audiat; cum testimonium Episcopi a qualibet parte fuerit repromissum. Illud est enim veritatis auctoritate firmatum; illud incorruptum, quod a sacrosancto homine, conscientia mentis inlibata protulerit. Hoc nos edicto salubri aliquando censuimus; hoc perpetua lege firmamus, malitiosa litium semina comprimentes, ut miseri homines, longis ac pene perpetuis actionum laqueis implicati, ab improbis petitionibus, vel a cupiditate præpropera maturo fine discedant. Quidquid itaque de sententiis Episcoporum clementia nostra censuerat, & jam hac sumus lege complexi, gravitatem tuam, & ceteros pro utilitate omnium latam in perpetuum observare conveniet. Dat. III. Non. Maji Constantinopoli.

Cum itaque animadverteret Constantinus, Episcopos præcellenti quadam, atque eximia morum ac sapientiæ laude publice commendari; jamdiu etiam, & usu rerum, & Paulli sententia, in arbitriorum possessione sanctissime verfari;

fari; velletque jam RP. maxime pacatam, non a bellis solum, & calamitate externa, sed a malis etiam intestinis; jurgiis præsertim, ac litibus privatorum; animum ad eos præcipua quadam cura & benivolentia adjecit; quod scilicet intel- ligeret, Præsulum sanctissimorum operam ad contentiones extinguendas, quæ foro progignun- tur; quæque facultates opesque civium, præter- quamquod deterunt atque absumunt, concor- diam animorum distrahunt ac divellunt, maxi- me valere. Judicia igitur ad eos dimidiata de- tulit, constituitque amplissime, ut laicis litigan- tibus, sive uterque assentiretur, sive alteruter; vel ipsa cœpta coram magistratu, vel nondum cœpta litis disceptatione, libere liceret Episco- pos adire, Judiciaque opperiri hominum illo- rum, qui optimæ religionis, verarumque legum & custodes essent, & magistri. Una itaque, ea- demque lege & commoda privatorum, & RP. salutem, & Pontificum potestatem auctam vo- luit; nec satis jam dijudicare possum, plus ne sibi eo modo, imperioque suo consuluerit, an Episcopis. Recte igitur par. III. tit. I. *de Jurisdi- ctione Ecclesiastica in civil.* cap. I. art. XXXI. Zege- rus Bernardus Van-Espen legem Constantinia- nam laudat, omnemque potestatem laicorum causas cognoscendi ea, qua lege traditur, ratione, ad Episcopos traductam; *nimirum*, inquit, *ea in- dubie mens erat, ut populo pax & vera concordia procuraretur; litesque ac contentiones inter fideles a- mice componerentur per Episcopum, communem ipsorum*
pa-

patrem; atque Episcopi ministerio e cordibus eradicaretur litium, & dissensionum super rebus temporalibus ordinaria radix, cupiditas; & plantaretur pacis & concordie mater, caritas. Addit deinde hæc art. XXXII. Tota ergo Episcoporum Jurisdictio & auctoritas in laicorum causis, ad concordiam pacemque inter litigantes conciliandam, miserosque homines e litium, & actionum laqueis ac tricus tendebat; ut proinde mirum videri haud debeat, si laicis libertas daretur ad ipsos, tamquam communes pacificatores, & patres recurrendi. Hæc si vera sunt, lex constabit, eaque quæ lege constituta sunt; neque dies, quæ non deest, neque Consul jure objicientur, cum caveat de his nominatim Justinianus Const. de nov. cod. fac. §. II. & de Justin. cod. confir. §. III. nihil iis opus esse in iis legibus, quæ legitimo probatoque Juris corpore continentur; nec recte reliqua commemorabuntur. Optime igitur hæc intelligens Carolus Magnus, multis post sæculis eam Constitutionem nova latrone curavit promulgandam. Placet ejus verba recitare. *Volumus*, inquit, *atque præcipimus*, ut omnes ditioni nostræ, Deo auxiliante, subiecti, tam Romani, quam Franci, Alamanni, Bajuvarii, Saxones, Turingii, Fresones, Galli, Burgundiones, Britones, Longobardi, Vascones, Beneventani, Gothi, & Hispani, ceterique nobis subiecti omnes, licet quocumque videantur legis vinculo constrikti, vel consuetudinario more connexi, hanc sententiam, quam ex sextodecimo Theodosii Imperatoris libro, capitulo videlicet I, ad interrogata Ablavii Ducis, illi & omnibus rescriptam, sumsimus, & inter nostra Capitula

D
pro

pro lege tenendam, consultu omnium fidelium nostrorum, tam clericorum, quam & laicorum posuimus lege cunctis perpetuo tenendam. Hisque adductus Sanctus Leo, Rustico, Narbonensi Episcopo, Epist. II. respondit, via ac ratione sibi facere videri, qui habeat controversiam, si deferat ad Episcopos, neglectis magistratibus; quod nimirum Judicio Sacerdotum animos pacari, ac semina turbarum litiumque ab stirpe evelli posse existimaret; at ferente magistratu, decidi quidem malorum ramos, radicem non tentari. Crebro itaque hoc monet, ut poenitens, quemadmodum ipse appellat, adeat Episcopos. *Si poenitens, inquit, habet causam, quam negligere forte non debeat, melius expetit Ecclesiasticum, quam forense Judicium.* Sed de his satis; ad cætera pergamus. Deinceps igitur ea tempora consecuta sunt, quibus temporibus Jurisdictio Ecclesiastica vix vestigium tenuit, quod antea nata erat; vixque eo pervenit, quo gratia Imperatoris, favorisque aura provexerat. Constantino enim diem functo, Constantius filius Imperium Orientis adeptus est. Qui cum Ario & Arianis, hominibus impuris, vehementer cuperet, studeretque, omnia turbare, ac permiscere cœpit. Igitur magistratus ac iudices constituti, facile impetrarunt sub iniquo Principe, ut, legibus sublati, Episcopis Judicia adimerentur, sibi redderentur. Neque hoc sol vidit indignius, quam ut Episcopi ad eos in forum traherentur. Hinc voces illæ acerbissimæ & querelæ Patrum. Hinc Hilarii litteræ, Episcopi

Pi-

Pictaviensis, ad Constantium ipsum, ne dati iudices de causis clericorum cognoscere auderent. Libet Hilarii verba commemorare: *Provideat*, inquit, & decernat clementia tua, ut omnes se ubique iudices, quibus provinciarum administrationes credita sunt, ad quos sola cura, & sollicitudo publicorum negotiorum pertinere debet, a religiosa se observantia abstineant; neque posthac presumant, atque usurpent, & putent, se causas cognoscere clericorum, & innocentes homines variis afflictationibus, minis, violentia, terroribus frangere, atque vexare. Intelligit singularis & admirabilis sapientia tua, non decere, non oportere cogi, & compelli invitos & repugnantes, ut se his subjiciant, & addicant, vi oppressi, qui non cessant adulterina doctрина corrupta semina spargere. Quibus Constantius ipse nonnihil motus, hoc tulit, ut causas Episcoporum Episcopi cognoscerent; magistratus abstinere; quod facile intelligitur ex *l. XII. Cod. Theod. de Episcopis & clericis*. De clericis, si quæ illorum essent controversiæ, aut quippiam deliquissent, Præsides cognovere. Quæ fere valuerunt usque ad Valentem, Gratianum, & Valentinianum Imperatores, quo tempore, lege ab his lata, criminum distinctio inducta est, cautumque, ut crimina gravissima ad Præsides, atque illustres Potestates deferrentur, ad Præsules levissima, quæ ad religionem pertinerent. Si quid porro peterent, vel ab iis peteretur, vetus est mos retentus receptus sub Constantio, quæ fere continentur *l. XXIII. Cod. Theod. de Episcopis & clericis*. Theodosius major cum deinde cerneret, leges an-

tea latas, Episcoporum gratia, & clericorum, judicum ac magistratuum invidia frequentius convulsas, sic constituit, ne Episcopi quoquam ad ullos judices pertraherentur, cum suos obtinerent in causis Ecclesiasticis. Itaque Pontificium, ut ipse appellat, sacrae disceptationis, earum nempe causarum, quæ essent Ecclesiasticæ, summam potestatem Episcopis reliquit; rerum controversiarum, ac civilium negotiorum, quod antea obtinuerat, apud Præsides hædere. Placet Constitutionem Theodosianam integram recitare; quæ sine die & Consule legitur extremo lib. Cod. Theod. XVI. Verba igitur hæc sunt:

Imppp. Valentinianus, Theodosius, & Arcadius AAA. ad Optatum P. F. Augustal.

Graviter admodum mota est nostra clementia, quædam ab his, qui Episcoporum sibi nomina vindicant, perpetrata, & contra leges non minus divinas, quam humanas improba temeritate commissa; vexatos etiam nonnullos orthodoxorum clericos, quorum ætas huic injuria a sacerdotio repugnabat; flagitatos itineribus questionariis deditos; atque hæc omnia per eos commissa, qui ad tegumenta frontis, sacerdotii nominis titulos præferbant. Denique lectis in consistorio precibus, quibus Episcopalis pietas, aliquid postulans, refragatur denegatque, iccirco continua lege sancimus, nomen Episcoporum, vel eorum, qui Ecclesiæ necessitatibus serviunt, ne ad judicia, sive ordinariorum, sive extraordinariorum judicum pertrahatur. Habent illi judices suos, nec quicquam his publicis commune cum legibus; quantum ad causas tamen Ecclesiasticas pertinet, quas decet Episcopo-

scopali auctoritate decidi. Quibuscumque igitur mota fuerit quaestio, quae ad Christianam pertineat sanctitatem, eos decebit sub eo iudice litigare, qui Praesul est in suis partibus omnium sacerdotum, idest per Aegypti diocesim, Optate carissime, ac jucundissime. Quare laudabilis auctoritas tua arbitrio temperato quicquid negotiorum aliunde incidet, terminabit, habituro Pontificium sacra disceptationis Timotheo Episcopo, quem sibi omnes etiam suo iudicio praeferre. Est enim vir cum omnium sacerdotum susceptione venerandus, tum etiam nostro iudicio approbatus. Ejus est mentio Pontificii apud Arnobium ad Psalm. LXVIII. his verbis: In portis ergo hi arripiunt Pontificium iudicandi et corripiendi; legisque Theodosianae portionem legimus apud Gratianum in Can. continua XI. qu. I. Haec deinde Valentinianus junior paullulum commovit; quod in causa fuit, cur Ambrosius, vir sanctissimus, gravem illam Epistolam, quae ordine est XXXII. ad Imperatorem daret. Itaque Arcadius & Honorius, Imperium nati, aequiores in Ecclesiam & Pontifices fuisse; paternae scilicet pietatis aemuli, ac benignitatis Constantinianae memores. Liberum enim fuit illorum lege cuicumque ad Iudicia Episcoporum confugere; quaeque ab his decernerentur, rata omnino esse voluere; ita ut nemini liceret a sententia, quam tulissent, appellationem instituere, quod jus unis Praefectis Praetorio tributum fuerat, idque apparet ex leg. Episcopale Cod. de Episcopali audientia. Libet hoc etiam loco legem ipsam omnino commemorare. Sunt autem haec verba ejus:

Imppp.

*Imppp. Arcadius, Honorius, & Theodosius AAA.
Theodoro PP.*

Episcopale Judicium ratum sit omnibus, qui se audiri a sacerdotibus elegerint; eamque illorum judicationi adhibendam esse reverentiam jubemus, quam vestris deferri necesse est potestatibus, a quibus non licet provocare. Per judicium quoque officia ne sit cassa Episcopalis cognitio; definitioni executio tribuatur.

Dat. Idib. Decembr. Basso. & Philippo Coss. CDVIII.
Quibus est tamen modus impositus lege illa, quæ prima est libri XVI. Codicis Theodosiani sub titulo *de Religione*. Porro hæc omnia ab optimis Imperatoribus constituta sustulit prope modum Valentinianus III. edita in eam rem Constitutione, quæ exstat lib. II. Novellarum legum Codicis Theodosiani, sub titulo *de Episcopali Judicio*; deinceps tamen Majorianus, & Marrianus, Concilium item Andegavense aliud constituerunt. Sed Leo, & Anthemius Augusti, quod Theodorus, & Nicephorus tradunt, & intelligitur *ex l. omnes qui, & l. jubemus Cod. de Episcopis, & clericis*, cum omnia Pontificibus admissent, ad magistratus retulissent, id etiam adjecerunt, ut clerici, ipsi etiam Episcopi, criminis alicujus rei facti, ad Præsides venirent, causam dicturi, non domi audirentur; quod more & lege antea comparatum erat; cujus rei meminit Johannes Chrysostomus Homil. XIII. ad Antiochenos. Ejus verba hæc sunt ex Græco sic Latine reddita: *Vidi, inquit, nuper in judicio viñctos, & per medium forum abductos, illos illustres*

*stres viros. Ubi enim capitis devotio, dignitas nihil prodest. Plurima mittamus, ne longius, quam par est, oratio proferatur. In uno Imperatore Justiniano subsistamus; cui hanc gratiam æquo animo habeamus, & quod Romani Juris possessionem aliquam illius diligentia teneamus, & quod de Pontificibus optime sit meritis. Igitur sic constituit, ut lites clericorum ab Episcopis cognoscerentur; crimina item Ecclesiastica, ut ipse appellat; delicta reliqua Præsidibus, Præfective Urbis reservavit; quod ex Novella LXXXIII. & CXXIII. facile cognoscitur. Episcopis etiam hunc honorem haberi voluit, ut si quis quid ab illis peteret, vel de iis quæreretur, trahi ad magistratus nullo modo possent. Itaque hoc reliquum fuit, ut Episcoporum judices Episcopi ipsi essent; quod jam Constantius jampridem imperarat. Quibus omnibus illud etiam addidit, ut monachi eodem Jure, quo clerici censerentur; nempe illorum causæ ad Episcopos deferrentur; delicta etiam Ecclesiastica, neque eo nomine a quoquam evocari extra provinciam possent. Ne quis sit igitur, qui jam miretur, si Nicolaus Pontifex anno a Christo nato DCCCLXVI. Bulgaris rescripsit, laicos nullo modo clericorum judices esse posse; designatque Claudius Fleury Pontifici sanctissimo id objicere, *haustam doctrinam ex falsis decretalibus, quas habeat Gratianus, et ex falsis legibus, quæ Codici Theodosiano adjectæ sint. Legem Justiniani, & aliorum Imperatorum habuit ob oculos; quodque*
 omni*

omni lege potentius est, divinas voces. Id ipsum etiam plurima Concilia decreverunt, sanxeruntque, in quibus est Lateranense III. Atra illa tempora hominibus deinceps contigerunt, quibus Romanum concidit Imperium; ac nova regna, novæque ditiones sunt inductæ. Quo loco steterit Jurisdictio Ecclesiastica; quæ ceperit incrementa apud nationes singulas, non ferunt jam temporis angustia, ut nunc ostendam. Sed tamen, quemadmodum res gesta sit in Gallia, in Anglia, in Italia, paucis persequar. Et quidem Galli Reges ita Jurisdictioni favere Ecclesiasticæ, ut in excolenda ea, augendaque non Reges mihi, sed Sacerdotes fuisse videantur. Nam præterquamquod Episcopi retinuerunt, quæ legibus Imperatorum jampridem obtinebant, de perduellione, de homicidio, de cæteris criminibus gravissimis, Regibus probantibus, ac libere assentientibus, cognovere. De Rege Chilperico plurima narrantur; in his Prætextatum, Episcopum Rothomagensem cum Meroveo Regis ipsius filio, in Regem conjurasse. Jam Gregorius Turo-nensis lib. V. cap. XIX. & Aymoin. lib. III. cap. XXI. & XXVI. auctores sunt, non alios Chilpericum judices tulisse, quam Synodum Parisiensem. Verba Chilperici ipsa afferam, quæ leguntur apud Aymoin. *Quamvis, inquit, venerandi Pontifices, regia potestas reum majestatis legibus condemnare possit, ego tamen hunc, qui falsum sibi Pastoris nomen usurpat, conjurationis contra me factæ auctorem, sacris non contradicens Canonibus, vestre audien-*

dientia represento. Plurima Concilia per hæc tempora in Gallia coacta, Regum voluntate, ex temporum memoriis omnino constat. Sic ego video, & caussas, & crimina, & facta omnia clericorum, Patrum jussu, ad Episcopos delata; eaque Reges Gallos & probasse, & in Legum Codicem ac Capitularium retulisse. Hinc Synodus Agathensis, quæ sic constituit Can. XXXII. *Clericum nullus presumat apud sacularem judicem, Episcopo non permittente, pulsare; & si pulsatus fuerit, non respondeat, vel proponat, nec audeat criminale negotium in saculari judicio proponere.* Inde a Gratiano sumtus est Can. *Clericum nullus* II. qu. I. Pertinent eodem Synodi Aurelianensis III. & IV. Antissiodorensis, Matisconensis, aliæ, quarum fit mentio locis pluribus a Gratiano. Quæ Carolus Magnus de Pontificibus constituerit; quam auctam voluerit illorum Jurisdictionem, ex illius Capitularibus apparet, ex lib. præsertim V. VI. & VII. quibus libris ea attexuit, quæ jamdiu Constantinus, Theodosius, Justinianus, aliique Imperatores legibus ediderant; illa etiam, quæ Synodis compluribus constituta. Nil igitur mirum, si per hæc tempora Canones & Leges, veluti juncto fœdere, opem sibi mutuam præbuere. Recte itaque Hincmarus, Archiepiscopus Rhemensis, Epist. IV. cap. VI. editionis Moguntinæ. *Qualiter autem, inquit, ordinati ministros sibi suppositos regere debeant, sacri Canones, & decreta Sedis Romana Pontificum, sed & sextusdecimus liber legum, quibus una cum Sacris Canonibus mo-*

E

dera-

deratur Ecclesia patenter ostendunt. Libri legum nomine Codicem Theodosianum Hincmarum intelligere, omnino certum est. Mitto illa, quæ Ludovicus Crassus, quæ Ludovicus junior optime in rem nostram pronunciarunt; non mitam quæ Philippus Augustus: qui a quodam olim id commonitus, regiam jurisdictionem in dies magis a clericis occupari, respondit, se ita quidem existimare, sed Christi memorem, unde beneficia maxima accepisset, Ecclesiæ illius omnia condonare; ac malle prorsus jurium suorum jacturam facere, quam cum Pontificibus ciere lites. Hinc sumsit ansam somnii Vergerii auctor, ut cap. CC. hæc scriberet. *Multi, inquit, magis eligunt vinculum Ecclesiæ, quam vinculum temporale; & ante aliquando mitterent, contractus facere sine quibus non possent vivere, quam se submittere curia temporali.* Nempe his temporibus non modo clerici clericis subiciebantur, sed laici etiam ipsi de pluribus controversiis. Inde Mornacius quoque, frugalissimus interpret, ut eum Gravina appellat, ut nobis hæc relinqueret ad l. VIII. Cod. *de Episcopali audientia.* Inde, inquit, *eminuit per longas ætates unum pane, ac solum in universa Gallia forum Ecclesiasticum; evuluitque toto illo tempore, quasque emarcuit, jurisdictio regia.* Postremo quæ non egere Carolus VI. & Carolus VIII. ut Pontificum Jurisdictionem & augerent, & tuerentur? Quæ sub Philippo Valesio, Rege optimo ac prudentissimo contigerunt, ostendunt, quo animo fuerint Gallorum Principes erga Pontifi-

tificum Jurisdictionem. Nota pugna est illa inclyta coram Rege habita in conventu hominum nobilissimorum, inter Petrum Cugnerium, regium Procuratorem, & Bertrandum, Episcopum Eduensem; contendente altero pro Jurisdictione Ecclesiastica, contra altero. Quæ adhibita argumenta ac rationes ab utroque sint, non est hujus loci, ac temporis, ut commemorem. Exitum concertationis fuisse hunc video, quem tradit Nangius in Chronic. & Paullus Æmilius in vita illius; nempe Regem sic pronunciasse: *Velle omnino auctam Pontificum Jurisdictionem; non minuatam quicquam.*

Ad Anglos veniamus. Multis sæculis in Anglia is mos fuit, ut summo in honore clerici haberentur; tantaque reverentia adhibita erga illos fuit, ut cum obviam hominibus aliquando fierent, veluti Dii quidam cælo delapsi, colerentur; quod Beda, sanctus vir, prodidit memoriæ Histor. Anglic. lib. III. cap. XXVI. cujus verba afferam, ut, quod proposui, confirmem, & quam discefferit terra illa a vetere honestate, cognoscere possitis. *Tota enim, inquit, tum fuit sollicitudo doctoribus illis Deo serviendi, non saculo; tota cura cordis excolendi, non ventris; unde & in magna erat veneratione tempore illo religionis habitus, ita ut ubicumque clericus aliquis, aut monachus adveniret, gaudenter ab omnibus, tamquam Dei famulus, exciperetur; etiamsi in itinere pergens inveniretur, accurrebant, & flexa cervice, vel manu signari, vel ore illius se benedici gaudebant.* Cum igitur hic hominum or-

do apud Anglos floreret, mirari nullus debet, si Judiciorum Ecclesiasticorum possessionem usque ad Henricum II. Episcopi tenuerunt. Quo tempore procellæ sævioris vis coorta cuncta fere obruit. Regii enim magistratus apud Regem ipsum crebro questi, non sese, aut Regem Jurisdictionem obtinere, sed Episcopos, eundem impulere, ut de ea re Clarendonæ comitia haberet. Omnia itaque Episcopis fere adempta, Regi reddita, ac magistratibus. Inde turbæ illæ inter Henricum, ac Thomam, Archiepiscopum Cantuariensem, cujus rei Radulphus, Neubrigensis, & Hovodenus meminerunt. Thomas solum vertere coactus est; cumque in Gallia, ab Ludovico juniore benigne exceptus, moraretur, Capitula illa Clarendonensia devovit, ac Regem ipsum. Modo ac ratione gesta actaque omnia a Cantuariensi, ex Epist. CLIX. Johannis Sarisberienfis apparet. Neque enim Rex tantum sua recipere, ac tenere voluit, sed etiam aliena. Verba Sarisberienfis hæc sunt. *Hæc Capitula, inquit, in primis damnata sunt, quod non liceat Episcopo, excommunicare aliquem, qui de Rege teneat, sine licentia ipsius; quod non valeat Episcopus coercere aliquem parochianorum suorum pro perjurio, vel fide laesa; quod ad secularia judicia trahantur clerici; quod laici, sive Rex, sive alius causas de Ecclesiis, & decimis tractent; quod non appellaretur pro causa aliqua ad sedem Apostolicam, nisi Regis, & officialium suorum venia impetrata; quod non liceat Archiepiscopo, vel Episcopo, & aliis personis ad vocationem domini Papæ venire, absque*

que licentia Regis. Thomas deinde jussu Regis obtruncatus est; cujus facti celerius Henricum poenituit. Neque ita multo post Capitula illa Clarendonensia, cum præsertim Legati duo Pontificis Maximi, Theodinus & Albertus, eam rem ab Rege postularent, sublata; Judiciaque Episcopis reddita; quod Parisius tradit.

Reliqui id est, ut de Italia, sede olim libertatis & Imperii, litterarum etiam, nunc religionis, pauca attingam. Quamdiu Longobardi, Gothi quoque Reges eidem imperitarunt, Pontificum Jurisdictionem sanctam habuerunt. Augustini Episcopi accusatores ad Eustorgium, Mediolanensem Metropolitanum, remissos a Theodorico apud Cassiodorum legimus I. Var. Epist. IX. Idemque causam Symmachi Pontificis, non sui judicii esse ostendit, sed Synodi, quæ tum Romæ cogeatur; voce hac usus crebro memorabili: *de Ecclesiasticis negotiis nihil ad se, præter reverentiam pertinere.* Regem Athalaricum eodem fuisse animo ac voluntate erga Pontifices Cassiodorus idem III. Var. Epist. XXIV. auctor est. Libet illius testimonium hoc loco apponere. Itaque, inquit, *flebili aditione causamini, hoc fuisse longa consuetudinis institutum, ut si quis Sacrosanctæ Romanæ Ecclesiæ servientem aliqua crederet actione pulsandum, ad supradictæ civitatis Antistitem negotium suum dicturus occurreret, ne clerus vester forensibus litibus profanatus, negotiis potius secularibus occupetur.* & paullo post: *Atque ideo considerantes Apostolica Sedis honorem, & consulentes desideriis supplicantium,*
præ-

*presenti auctoritate, moderato ordine definimus, ut si quispiam ad Romanum clerum aliquem pertinentem in qualibet causa probabili crediderit actione pulsandum, ad Beatissimi Papa Judicium prius conveniat audiendus, ut aut ipse inter utrosque more sua sanctitatis cognoscat, aut causam deleget, equitatis studio terminandam. Nempe eo studio atque obsequio erga Pontifices eos fuisse apparet, quo Fridericum II. qui, lege lata, quam legimus in Auth. Statuimus, Cod. de Episcopis & clericis, causas clericorum ad Pontifices, & crimina quaecumque libere traduxit. Nunc quæ jam est aut inscitia, aut audacia, optimis Pontificibus Jurisdictionem denegare, cum majores causæ, ut nostri appellant, bonorum omnium concessu, iisdem reserventur? Non video, qua ratione expediri, atque ad exitum perducì illæ possint, nisi Jurisdictio, ac Judicia tribuantur. Deinde recta ad Pontificem Romanum appellationem instituere licere constat ex Canonibus Sardicensibus; quam rem Carolus Magnus probavit, quemadmodum intelligitur ex lib. VII. Capitular. cap. CCXXXV. & CCCXXIII. Tanto etiam ante probarat Constantinus, quem Optatus Millevitanus iratum exclamasse, cum Donatistæ in causa Cæciliani eum appellarent, memoriæ prodidit. *O rabida, inquit, furoris audacia! sicut in causis Gentilium fieri solet, appellationem instituerunt.* ac statim ad Melchiam Pontificem rem remisit. Optime igitur Divus Bernardus lib. IV. de Considerat. cap. III. ex eo Evangelii loco: *Duo gladii sunt hic; & ex illo:**

illo: *Conde gladium tuum in vaginam tuam*, colligit, gladium Pontifici esse; additque gladium utrumque & materiale, ut appellant, & spirituale, ad Ecclesiam pertinere. Quod Pontifices intelligentes, sæpius eduxerunt. Inde ictus ille Gregorii Pontificis in Leonem Imperatorem; quod Theophanes, Cedrenus, Zeno, Nicephorus, aliique tradiderunt. Inde ille alter Gregorii VII. in Henricum IV. ut alios mittam. Postremo Regum & Imperatorum liberalitate urbes & provincias ad Pontifices delatas, omnino apparet. Porro postulo, an nacti Principatum ea, quam dixi, Principum benignitate, carere jam nunc debeant legum ferendarum potestate? Non puto, Pontificibus posse denegari, in ditione collocatis, quæ Turca, quæ Barbari reliqui, gentium latrones, dicuntur obtinere. Id si est, Judicia ac Jurisdictio, quæ sunt a latione, ad illos pertinebunt. Sed homines fateri tandem video, si pauca demantur acuta ingenia, quibus erui non potest, non turpia fuisse, ac mala initia dominationis, nec die perpurgata, nec cleptam usucapere. Sed hæc hæctenus. Satis ego arbitror ostendisse, Jurisdictionem Pontifices obtinere. Jure igitur Judicia & actiones, earumque formulas, quas nobis reliquerunt, expendemus; eaque non temere congesta, aut prodita, sed sumpta ex lege media demonstrabimus.

D I X I.



PATAVII. MDCCCXXI.
EXCŪDEBAT JOSEPHUS COMINUS.

ANTONII
ARRIGHI

PUBLICI JURIS PONTIFICII
PROFESSORIS

D E

ECCLESIIIS SUBURBICARIIS
ORATIO,


HABITA IN GYMNASIO PATAVINO,

ANNO MDCCXXIX.

MENSE NOVEMBRI.



PATAVII. CIOIOCCXXXI.
EXCUDERAT JOSEPHUS COMINUS
Superiorum Permissu.



ANTONIUS ARRIGHIUS
 VIRO AMPLISSIMO
 PETRO GRIMANO
 EQUITI, ÆDISQUE
 DIVI MARCI PROCURATORI

S. P. D.



Uⁿe controversia est de Ecclesijs Sub-
 urbicariis, Amplissime Senator, ea &
 antiquissima est, & maximis difficul-
 tatibus implicita, & adhuc sub iudice. Ubi enim primum inje-
 ctum est vocabulum, hominis cupiditate, vel novandæ rei, vel
 etiam angustandæ, quasi data dictione, ætates consecutæ, non va-
 ticinari modo, & argutari; quod passim fit in rebus plurimis; sed
 invicem configere cœpere, & animis obstinatis decertare; cum se
 quisque veritatem nactum; quod non ita est facile in humanis re-
 bus; arbitraretur. Porro in ea disceptatione hominum ingenia

A 2

non-

nonnullorum mirari licet, acumen summum, doctrinam, sapientiam; quodque facio plurimi; eximiam in dicendo moderationem. Contra nonnullorum, ut inscitiam mittam, ac superbiam, & seivum quoddam, atque atrox disputandi genus; perpetuum insanumque studium obtestandi laudibus Pontificum, ac dignitati; quasi Suburbicaria res esset Pontifex; aut is, in quem tam gravi, atque acerba oratione liceret deservire. Atque hoc quidem de his fortasse ferri posset, qui a nobis in pluribus articulis religionis discessere; quamquam non potest; cum non calumniis de trivio arreptis, aut probro & contumelia pugnandum sit, sed jure & bono, ac robore argumentorum: in his porro, qui stare una, ac se se nostros profitentur; qui tertio quoque verbo pietatem, probitatem, sancta jura ac fœdera; qui Pontificum Maximorum majestatem omni honoris specie vereri ac venerari prædicant, quam ratione perfidia hæc tanta ferri potest? Ego in hac pugna hominum acerbissima viribus aliquibus accessi, non jurgii studio adaugendi, sed, si id posset, tandem modo aliquo aliquando componendi. Non multa admodum de me ipso pollicebor; nec mihi illa tribuam, quæ plerique sibi vanissime tribuerunt, qui Ruffini somnium, ac vocem Pythiam prorsus illustratam existimarunt, ubi ipsi os, ac manus admovissent. Mibi satis erit, hoc est homini non grandia & admiranda molienti, si in loco sic versari hominibus doctissimis videbor, ut illa attingam, quibus Æterni illi pugnacissimi, si pacem nullam, at aliquas inducias possint deprecari. Quæcumque sit industria mea, ejus fructum non exiguum me cepisse existimabo, si probari Tibi, Amplissime Senator, eam intellexero; si loco aliquo, non hominis irati, non asperi, non acerbis; quod pluribus illorum, qui offas urbicarias attigerunt, video usu venisse; sed ejus, qui non indiligenter, quod paucis, in rem investigavit, arbitrare; si denique, quod desit, non tam

nostro vitio deesse judicabis, quam alieno. Sed rerum omnium re hac una maxime letabor, si tale quid hæc mea lucubratio tibi videatur, quæ digna sit, quam cera quadam tua ornes miniatula; quo ego nomine sperare possem, id fore, ut cives tui cæterique hominum plena suffragatione mihi assentirentur. Eam enim ex domestica, publicaque civitatis institutione artium, ac doctrinarum opinionem nactus es, ut rectum id, atque excellens censeatur, si quid ipse ex vi summa ingenii, aut retractando, aut redolando, tamquam anadema, litteris adjicias. Ex quo factum est, ut Arbiter disciplinarum, non bonorum modo omnium consensu existimere, sed Augusti tui Veneti Senatus gravissimo decreto, Patavine Academiæ, quæ reliquarum omnium omni ævo princeps habita, Triumvir, & Curator creareris. In qua procuratione, quæ non est tua; Viri prudentissimi; quæ hætenus non fuit diligentia, in optimis ac sapientissimis quibusque deligendis, ut Athenæ hæc nostræ Patavine industria ac delectu quodam tuo clarius exsplenderent? quæ animi constantia in tuenda eorumdem dignitate? in augendis illorum commodis? in principibus civitatis viris commendandis? quasi res tua illorum res esset; eorumque laude laus tua augetur. Ac mihi quidem sæpenumero sedulo expendenti, unde hæc tibi evenerint tanta bona, libuit attendere, Familiam illam atque Civitatem, amplissimo fortune munere, obtigisse; in qua qui nascerentur, ad præstantem quamdam, inchoatamque litterarum, artiumque, quibus temperatio imperii, ac splendor continetur, possessionem conformarentur; nec verbis dumtaxat, ac præceptis, quæ magna tradere, ac magnifica cuius in promptu, sed exemplis, usuque ipso patrio, ac familiari, & continenti quadam majorum usurpatione, civiumque. Hinc copia illa domi tuæ, visque ingenti hominum fortissimorum, quorum eximia opera, ac summa sapientia per decem, & amplius secu-

secula usa est Respublica in tot gestis bellis terra ac mari, in maximis provinciis administrandis, in tristi sepe, ac difficili procuratione Civitatis, denique in legationibus aut ad Cæsarem, aut ad potentissimos Europæ Reges splendidissime obeundis. Quas ob res præclare gestas, dignitas Equestris, & Procuratoria, Principatus & Imperia sæpissime delata. Hinc series etiam quædam sancta, & admirabilis Episcoporum, quorum litteris ac pietate plurimum splendoris obtigit Ecclesiæ; hinc denique Purpure Romanæ decus & ornamentum, DOMINICUS GRIMANUS, Cardinalis, litterarum Pater, ac litteratorum; in quo uno maxime superioribus annis Venetam prudentiam, veteremque Romanorum eloquentiam Italia suspexit. Hæque artes in Familiam, ac Gentem inchoatam ex iustâ felicique Civitatis temperatione optime traductæ, atque omnino eadem disciplina & institutis illa stetit, quibus Venetiæ tuæ, resque, Imperiumque Venetorum, legitimum, æquabile, fidele, ac temperatum; quod veluti virtutis officinam quamdam, tutamque stationem litterarum ac religionis, in fœda hac clade, æterna fata esse voluerunt. Igitur ab ea iustitiæ ac sapientiæ opinione, populorum fuit, principumque, & nationum, portus & perfugium Senatus aliquando; privatorum autem, quibus cogitatio ulla umquam fuit, rerum possessionem retinendi, aut comparandi, qua recti & boni, ac studia doctrinarum continentur, sacrarium & asyllum. Non præsidium ullum illis defuit ad fortunam, non decora, non ornamenta, nulla denique benignitas. Nihil opus est de munificentia Veneti Senatus lentius disputare, plurimum exemplorum appositione. Verumtamen quamdiu rerum Venetarum memoria permanebit; quamdiu item homines & fari & loqui poterunt, ejus rei nomine, loca undique, cælum, terra, ac maria personabunt. Hinc clarissimæ imperatorie mortes, omni præmiorum, atque ornamentorum genere, in filiis quoque, aut etiam infra, liberalissime

exor-

exornata. Vitæ uberius. Statuas videmus, & signa egregia, atque imagines hominum fortissimorum in foro medio, in curia, in templis; ut sic existimem vel tenui ferentario; aliquando etiam ere diruto, qui R.P. iusto sacramento, ac fide singulari defendisset, mercedem rerum, & suum quoddam quasi præmium virtutis existisse. Non commemorabo litteras nunc quidem, illarumque æra; non Meursum, non Heinsium, non Audebertum, aliosque, quorum magna copia, bonore a scriptione auctos, & præmiis non exiguis honestatos; nequis porro existimet, memet studium meum, vel cupidine, vel insolentia quadam laudando extollere. Verumtamen Actii versiculi ne prætermittantur, magnifici, sinceri, optimi, propemodum divini; quibus jure, eo genere, certare possit cum Græcis cunctis, Latinisque:

Viderat Hadriacis Venetam Neptunus in undis

Stare Urbem; & toto ponere jura Mari.

Nunc mihi Tarpejas quantumvis, Juppiter, arces

Objice, & illa tui mœnia Martis, ait.

Si Pelago Tybrim præfers; Urbem adspice utramque:

Illam homines dices; hanc posuisse Deos.

Atque ex his ille, decreto Patrum, ceram suam in curiam intulit; quam deinde, aliquot præterea hominum clarissimorum, ignis vis absorpsit; domum autem præter beneficii illius memoriam sempiternam, eo quidem nomine H.S. duodeviginti millia. Dignus porro vir, qui in Republica virorum feracissima nasceretur, quando etiam Veneti civem suum Actium appellarent. Tibi id certe obtigit ingens fortune munus, in ea potissimum Urbe nasci, quæ & Domina & Patria esset, & magni imperii domicilium, quæque his virtutibus, quas commemoravi, par summis esset, vel omnino superaret. Unde non maximo negotio optimas, præclarasque res haurire potuisti, & tamquam exprimere de parentis sinu; quas deinde iudicio,

at-

atque usu quodam tuo, & perpetua constantia roborares. Hisque ornatus auctusque, magistratus magnos sanctissime gessisti; crebro operam tuam, atque industriam in Curia commendasti; maximas legationes obiisti; quibus summo ingenio ac prudentia administrandis, Patrie nobilissima, totique Italiae temporibus difficillimis profuisti. Te Angli Legatum ad Regem missum diu suspexerunt; quodque in te fulgentem litterarum speciem animadverterunt, nomen tuum honorificentissime in tabulas Academiae retulere. Te minus idem magnificentissime obeuntem apud Caesarem Germania vidit; quo tempore cum nefarie ille Turcarum sicæ, hostium æternorum, Reipublicæ nostrisque omnium jugulis repente minitarentur; cum Italis incendia, cædes, vastitates undique impenderent; cum Roma, ac sacra ipsa contremiscerent; qua non egisti diligentia, solertia, animi constantia, ut juncto fœdere pestis illa averteretur? ut in sceleratos fœderum violatores, illorumque capita id exitiū referretur, quod in nos parant? Tuis igitur consiliis, quibus Veneti cum Caesare sanctissima amicitia juncti sunt, pugnae illæ binæ ad Temesariam, & Albam Græcam acceptæ referendæ; & fuga Corcyrensis, qua non Corcyraei modo, sed tota Italia recreata.

Quo nomine Respublica tibi redennti gratulata, Equestri Dignitate, ac Procuratoria honestavit. Te nunc Patria inclytæ; te Pater felix prole virum intuentur; teque ego maxime, gratia ac suffragio tuo, in petitione honoris cæteris antelatus. Fixa est mihi animo, semperque erit memoria illius diei sempiterna; cum ad te veni; cum semel petii; cum a te discessi non beneficio modo, sed laudibus etiam cumlatus. Vive diu, spes Litteratorum; vive Tibi; vive Patri, ac Fratribus, hominibus fortissimis; vive Reipublicæ quam splendidissimam in oculis omnium Gentium, splendidiorem tuis virtutibus effecisti. Vale.

Patavio, postridie Non. Jan. MDCCXXXI.

DE



DE AGRO LIMITATO O R A T I O.



UOD diu multumque optavi, ut redire ad Juris Civilis studia aliquando, quæ culta mihi maxime ab ineunte ætate, tempora resque meæ idemtidem distraxissent; inque iis sine offensione ullius persequendis, honestissima con-

ditione, liceret conquiescere; id tandem singulari quodam D. O. M. beneficio, atque eximia Veneti Senatus, ac Triumvirum Rei Litterariæ Amplissimorum liberalitate, videor assecutus. Nam, etsi satis fructus ac dignitatis ex iis disciplinis nactus eram, in quibus tres annos ipsos loco humiliore publice versatus, hominum expectationi aut satisfeci, aut certe conatus sum satisfacere; tamen, quod

B

ar-

artes eæ majorem quamdam vim ingenii, ac doctrinarum postularent, quam ipse præditus auctusque essem; eæque crebro opinionum fluctibus, ac jactatione populari abriperentur; vehementer cupiebam, eo recipi ac traduci, ubi laboris ac periculi minus esset; tutiusque in sede hac, omnium editissima, nempe in luce Italiæ, civiumque oculis agitare. Sed tamen in summa hac loci hujus, veterumque studiorum gratulatione, duæ res me, primum de Civili Jure dicere aggredientem, maxime perturbant; quarum altera hominum illorum querela est, qui trans alpes incolunt; nostrorum altera. Acerbe sane, atque aspere illi criminantur, Italos id agere contentione ingenti in legibus interpretandis, ut actum agant; artesque bonas a viris summis, Grotio ac Leibnitio, legum earundem felicitate quadam, publice adscitas; illorumque exemplis & auctoritate, a Gallis, Germanis, Batavis, Britannis, eos aut negligere, aut ignorare, aut aspernari; quibus artibus, veluti e primis fontibus, Juris Civilis causæ, originesque deriventur; eaque, quæ ad jus publicum, quæ ad philosophiam primam; quæ denique eo spectant, unde si discefferis, nulla juris ars, aut disciplina stare possit. Gravis ac molesta, seu postulatio, seu criminatio hæc est, quæ diu me anxium, sollicitumque habuit; quæque hominum nostrorum judicia ac voluntates maxime permovit. Consilium nostrum est hominibus istiusmodi paucissimis occurrere; cæterum

rum in refellendo ita agam , ut hominem decet & laudis Italicæ , & veritatis studiosum. Quædam igitur non dubitabo , quoniam natura me neque formidolosum , neque assentatorem finxit , libere negare ; quædam autem ingenue fateri. Ac primum quidem id vehementer miror , homines inventos , sive ex Alpibus illi sint , sive ex Transalpinis , qui sibi in animum inducere potuerint , edi terra Italia , progignique nunc ea ingenia , quæ saxa fere , ac stirpes sint ; eoque illam devenisse , ut ær , ut campus , ut solitudo mera omnino sit. Superi , vestram fidem ! Sed non agam ego contra contumeliose. Id in re hac solum dicam , ea Italorum nunc esse ingenia , amisso imperio , quæ olim , cum illud obtinerent ; acria , acuta , ad omnes res bonas apta , atque accommodata. Qui artium optimarum studia , accepta a Græcis aut illustrarunt , aut fecere etiam meliora. Qui barbari a cæteris nationibus , ab ipsis etiam Transalpinis fastidiosissimis , depulere. Qui humanitatem ac disciplinas omnes cum iis communicarunt. Qui præclara multa in rebus ad Mathesim ac Philosophiam pertinentibus , invenere , unde illi ipsi nunc feroces minitantur. Qui denique leges ipsas præclarissimas & primi & soli pepere-
runt ; partas educarunt ; mox jactatas ac prope
mersas obrutasque , temporum injuria , hominumque , vindicarunt principes , atque extulere ; publice nunc tandem , privatimque , temporibus non ita perditis , augent & ornant . Hæc

cum ita sint, Auditores, non puto in hac re esse illis multa, quibus contra Italos possint jure gloriari. Id quidem vereor, ne quæ ad jus publicum, earumque causarum rationem pertinent, quæ jus illud comitantur, jure ac bono Italibus objiciant. Neque enim hoc est negandum, si aliqui demantur homines excultissimi, qui studia illa cum studiis Juris Civilis conjungunt, vel seorsum profitentur, reliquos universe, non dicam ignorare, aut aspernari, sed non magni facere. Et si hoc non temere eo nomine video nonnullos propugnare, quod munera Alpino- rum, artesque inclytæ sint res suspiciosæ; timendumque sit ab hominibus istiusmodi, dona Italiæ ac xeniola ferentibus. Ita enim esse litterarum commoda, ut morum, ut pietatis erga Deum, ut optimæ religionis sint pestis & calamitas. Sed hæc jampridem viri eruditissimi rejecerunt. Cur enim reliquæ ab his excultæ summo ingenio, summaque industria disciplinæ; cur non volumina repudiantur, quibus asperæ atque acerbæ illæ disputationes continentur, quas tamen avidissime Italia persequitur? Sed ne multa. Hominum prudentissimorum consilium est, ut habito delectu, libri illi ad libros Juris Civilis illustrandos traducantur, quos Grotius, Leibnitius, Puffendorfius nobis reliquerunt, cæterique qui de jure publico conscripserunt; ut una opera eademque & legum causæ, & effecta, eaque quæ circumstant, intelligantur; & gentium omnium mores; æquumque
& bo-

& bonum non modo quod in jure est, sed quod esse debet; quodque in ipsis summis juris originibus ac primordiis, nempe in natura ipsa, & illius honestate latius exsplendescit; ut denique acerbissimis adversariis, perpetuo garrientibus, os tandem occludatur; cum præsertim facultas illa digna sit opera ac diligentia hominis Italici, ac luce ingenii ad excolendum, qua præstat cæteris. Querela superest Italogum contra Italos, quam paucis attingam; quamque utinam vitare potuissem, salvo officio, ac loci hujus ratione; ne carpere nostrorum quemquam, vel defendere viderer contra nostros. Sic igitur illi statuunt: artem Jurisperitorum vim esse quamdam, uberem ac dissipatam; quæque plures alat disciplinas, & pluribus alatur. Eo itaque Oratorum libros pertinere; eo Poetarum; eo Historiam omnem; eo Philosophiæ nobiliores partes; eo denique Græcam Latinamque linguam universam. His nobilitatos, qui in solo Italico, aut de jure responderunt, aut jus interpretati sunt. Jam factum opera nonnullorum, ut artes eæ, quæ veluti ministræ erant facultatis principis, illi adimerentur; quæque quodammodo regina foret, potens, magnifica, splendida, excellens satellitio; tamquam detractis regiis ornamentis, ancillula, egena, misera, obscura, detrusa denique ad ima fori, & curiæ ministeria, turpiter obsolesceret. Acris querimonia, sed vera. Qua in re legum fata quædam; tempora nonnulli excusare maluerunt.

Non-

Nonnulli (quod Italo homine est indignum)
istiusmodi jurisprudentiam veterem appellare ,
vietam , veterinosam . Ego , quid nunc re-
spondeam , aut quo me vertam , nescio ; nisi id
ago , quod ii agere solent , qui homines duos
amicissimos in jure vident , manum conferen-
tes , ut communes ipsi amici , arbitrique acce-
dant . Orent principio , atque obsecrent , ut ,
quod nomen est , æquo & bono id solvatur ; sin
minus , diem prodant ; denique quovis modo
transigant , potius quam de sella jus asperere red-
datur ; vitæque & fortunæ alterius illudantur .
Hoc primum itaque , per Deum , perque Italiæ
decora , ac majestatem pristinam , rogo obte-
storque , ut una omnium sit sententia de legi-
bus restituendis , reddendisque his nativis orna-
mentis ; quod fiet facile , siquidem bonorum
Commentarii in usum revocentur , qui jacent
in angulis bibliothecarum . Consulant , consul-
tent , expendant diligenter ; dies proferetur . Si
id fieri non potest ; ut sententia dividatur , &
paucis sine invidia , his nimirum , qui publice
ex hoc loco jura profitentur , ea laus relinqua-
tur , quibus id sit splendidum & gloriosum . Cæ-
teri utilitates suas , & miseram consuetudinem
persequantur . Bona hac spe ego ad rem aggre-
diar ; & , quod sit mihi ac adolescentibus felix
& salutare , librum Digestorum XXIV. & qui
sequuntur , suscipiam exponendos . Ea de con-
nubiis , libris hisce aperiendis , de ritu nuptia-
rum , de dote , de sponsionibus , de legibus ,
fena-

senatusconsultis, ac judiciis in hanc rem commemoranda sunt, quæ neque intelligi sine excellenti quadam doctrinarum supellectile cuiquam possunt, neque expendi intelligentibus sine summa animi volupate. Quæ non rescripta, quæ non edicta, quæ non responsa occurrent, quibus non sit abdita sanctior, ac selectior quædam notitia antiquitatis? Quæ cum interpretarentur Alciatus, Goveanus, Hottomannus, Budæus, Duarenus, Barnabas, Cujacius, aliique, & vehementer proclamarent, nullam esse legem in libris Juris Civilis, cujus percipi sententia ulla possit, nisi eo artium optimarum studia ad illustrandum afferrentur, homines arrexere. Ego, ut arrigam, & meis, & vocibus illorum maxime contendam; ac faciam nunc periculum, ea re proposita, cui minimum eruditionis, quicumque ad eam rem manus admovere, inesse existimarent. Vos, ubi ipse edisseruero, dijudicabitis. Is porro est locus *de Agro limitato*, cujus crebra hoc anno nobis erit mentio. Ejus in lege *Tiberianus*, in lege *Quicumque*, in lege *Agros limitaneos*, titulo Codicis *de Fundis Limitrophis*, terris, & paludibus, & pascuis limitaneis & castellorum; in lege *Idcirco*, titulo Codicis *de liberali causa*, Imperatores meminerunt; Jurisconsulti item in lege *Limenarchæ* Digestorum titulo *de servis fugitivis*; in lege *Divus Adrianus*, de custodia & exhibitione rerum; in lege *Ait Prator*, de *Fluminibus*; in lege *In agris limitatis*, de *acquirendo rerum dominio*.

Vos

Vos nunc ego oro atque obsecro, Auditores, ut, dum pauca commemoro, me benevole attenteque audiat.

Quæ de Agro limitato a Veteribus traduntur, ita cum legibus agrariis conjuncta sunt, & jure Coloniarum, ut, nisi, quæ ad hæc pertinent, prius intelligantur, illa vix intelligi, ne vix quidem possint. Dicam igitur paucis principio de Colonia; pluribus deinde de legibus agrariis; postremo disceptabo de Agro limitato. Colonia Oppidum est, quo Civitatis pars, aut sociorum deducta est ad incolendum. Atque cum morem a Romuli institutis initio manasse, Dionysius Halicarnassius memoriæ prodidit; eundemque, apparet, reges deinceps cæteros tenuisse; pulsos porro regibus, Senatum Populumque Romanum; Senatus postremo, Populique fracta potestate, Imperatores. Causas ac rationes vel novarum deducendi, vel renovandi veterum, fuisse has fere invenio; ut plebs urbana, hominesque tenues ac proletarii, qui nihil fere, præter caput & togam, numerare poterant, specie utilitatis & honoris ab urbe pellerentur; tum deinde ut in finibus imperii contra hostium conatus, priorumque populorum tumultus repentinos, firmissima præsidia ac propugnacula ex civium, aut sociorum robore collocarentur; tum denique ut milites, præliorum diuturnitate fessi, præmium aliquod aliquando caperent laborum suorum. Plebis exhauriendæ causa, sæpe Colonias decretas esse, & Plutarchus in Coriolano,

Iano , & Dionysius lib. VII. literis prodidere ; & Livius lib. III. qui Senatum Antium Coloniam decrevisse narrat , ut sine querelis possessorum plebs in agros iret ; civitas in concordia esset ; & lib. X. qui Romæ quietam plebem & exoneratam , deducta in Colonias multitudine . Idque ipsum est , quod P. Rullus Tribunus plebis , cum in Senatu magnopere contenderet de ferenda lege agraria , innuit his verbis : *Plebem urbanam nimium in R. P. posse ; exhaustiendam esse .* quod M. item Tullius ad T. Pomponium Atticum de Flavia lege agraria , cum promulgaretur , scribit : *Ut emtione agrorum constituta , sentina Urbis exhauriretur , & Italia solitudo frequentaretur .* De tumultu Populorum , hostibusque propulsandis & Flaccus in lib. de conditionibus agrorum meminit non paucis , & Livius , qui Ecetras Volscis , Nequinum Umbris , Sinuessam Samnitibus , Placentiam & Cremonam , veluti claustra quædam , objecta Gallis docuit ; & Cicero secunda agraria verbis hisce : *Hoc in genere , sicut in cateris R. P. partibus , diligentia majorum est spectanda , qui Colonias sic idoneis in locis contra suspicionem periculi collocassent , ut non oppida Italia , sed propugnacula Imperii esse viderentur .* & in Fontejana : *Narbonem Marcium Coloniam civium Romanorum , speculam P. R. & propugnaculum Gallis oppositum esse , atque objectum .* Denique , quod pertinet ad Colonias militares , præmiorum causa , ex veterum Scriptorum testimonio , certum est , eas deductas esse , & ab

.C L. Syl-

L. Sylla, & a C. Cæsare Dictatoribus; ac post
 deinde Syllæ ac Cæsaris exemplo, ab Antonio,
 Lepido, Octaviano, R. P. Triumviris; postre-
 mo etiam ab Augusto ipso, cum imperium uni-
 versum unus obtineret. Ac de Sylla quidem id
 apparet ex Liviana Epitoma LXX. & LXXXIX.
 Ex Græca item Appiani historia, qui centum
 viginti millia hominum ab eodem deducta esse
 memorat; quam rem Lepidus Consul, inimi-
 cus Syllæ apud Sallustium vellicat acerbissime in
 concione: *Maximam mihi fiduciam*, inquit, *pa-*
rit victor exercitus, cui per tot vulnera & labores,
nihil, præter tyrannum, quæsitum est. Egregia scili-
cet mercede, cum relegati in paludes & silvas, con-
tumeliam atque invidiam suam, præmia penes pau-
cos intelligerent. Cæsarem deinde deduxisse, Tul-
lius in Antonium auctor est, qui hæc habet:
Deduxisti Coloniam Casilinum, quo Casar ante dedu-
xerat. Omni auspiciorum jure turbato, Casilinum Co-
loniam deduxisti, quo erat paucis ante annis deducta.
 & Frontinus, cujus hæc sunt verba: *Lanuvium*
muro ductum. Colonia deducta a D. Julio. A Trium-
viris R. P. factas deinceps deductiones, Sueton-
ius, Frontinus, ac Dio Cassius meminerunt;
 Hyginus item ab Augusto, qui in hunc mo-
 dum loquitur: *Divus Augustus in assignata Orbi ter-*
rarum pace; exercitus, qui sub Antonio, aut Lepido
militaverant, pariter & suarum legionum milites co-
lonos fecit, alios in Italia, alios in Provinciis. Qui-
busdam deletis hostium Civitatibus, novas Urbes con-
stituit; quosdam in veteribus Oppidis deduxit, &
 Co-

Colonos nominavit. Illas quoque Urbes, quæ deductæ a regibus, aut dictatoribus fuerant, quas bellorum civilium interventus exhausserat, dato iterum Colonia nomine, numero civium ampliavit, quasdam et finibus. Quicumque autem quavis de causa aliquo deducerentur, his certum agri modum, sive agrum limitatum assignari oportuit; atque id omnino fieri senatusconsulto, aut rogatione aliqua populari, quæ proprio vocabulo lex agraria appellata est. Atque illa quidem multis articulis comprehensa est. Nam & agrum definivit, qui esset dividendus; & qui dividerent, constituit; & quibus divideretur. Omnis porro dividendi ratio bipertita fuit. Aut enim nulla Coloniae mentione facta, Plebs Romana, aut Socii in agro collocati sunt; aut iis ipsis ita ager assignatus est, si ex urbe in Coloniam, cujus erat ager dividendus, proficiscerentur. Genus agri utrumque multiplex fuisse, veteres tradiderunt; nempe aut ex hostibus quidem captum, nondum tamen publicatum; aut sumtu publico, dividendi causa publice coemptum; aut publicum P.R. ac jure & bono a Populo possessum; aut denique publicum, sed furtim potentia paucorum usurpatum. Ac leges eæ, quæ priorum trium generum divisionem imperarunt, facile ac nullo resistente, sunt perlatæ; non ita facile, quibus potentes occupatis possessionibus ejiciebantur. Id quod pluribus memoriæ est proditum. Sp. enim Cassius Consul, cum de ea re ferre summa animi contentione aggressus es-

fet ; Tribunique plebis quotannis , Cassium secuti ; jactati tamen & impediti artibus nobilium ac factione , perferre nullo modo potuerunt . Quæ res quemadmodum acta gesta que sit omnis , ut planius intelligatur , libet nobilissimam quamque legem , agrorum dividendorum causa , latam a veteribus , afferre ordine , ac recitare . Primus igitur rex fuit Romulus , qui lata lege ad Populum , agrum publicum dividi imperavit , ac singulis bina jugera assignari ; quod Varro his verbis tradit lib.I. de RR. : *Antiquus noster ante bellum Punicum pendebat bina jugera ; quod a Romulo primum divisa dicebantur viritim ; quæ , quod heredem sequerentur , heredium appellarunt .* Numa deinde , quod docet Dionysius , ejus agri partem , quem bello ex hostibus Romulus cepisset , civibus divisit ; idque ipsum a Servio factum est ex iis agris , quos Vejentibus , Cæritibus , & Tarquinienis ademuit . Pulsis regibus , satis constat , Tarquinii agrum , cui nomen fuit Superbo , præter Campum , qui Martius a veteribus appellatus est , plebi senatusconsulto concessum fuisse . Bella deinceps perpetua in RP. fuerunt , quibus partem magnam gestis felicissime , vis non exigua hostilis agri adjecta est ; isque aut Colonis tribui , aut publicus relinqui consuevit ; donec Sp. Cassius tertium Consul , anno a Regibus exactis XXIV. legem illam , de qua supra demonstratum est , tulit , ut agri pars , capti ex Hernicis , Latinis tribueretur , plebi Romanæ pars ; atque id quidem Cassio facile ex sen-

ten-

tentia processisset , nisi lege illa Patricios infectatus , contendisset , agri publici aliquantum , quem incuria Magistratuum ii interceptissent , ut illo adjiceretur . Perferre igitur , iis adversantibus , nullo modo potuit . Cassiam agrariam agraria altera tribunitia de septem jugeribus , plebi dividendis , consecuta est , cujus lib. XVIII. Plinius mentionem facit in hunc modum : *M. Curii post triumphos , immensumque terrarum adjectum imperio , nova concio est ; perniciosum intelligit civem , cui septem jugera non essent satis . Hac autem mensura plebi , post exactos reges , assignata est .* Meminit etiam Columella lib. I. his verbis : *Post exactos reges , inquit , Liciniana illa septem jugera , quæ plebis Tribunus viritum dividerat , majores questus antiquis retulere , quam nunc nobis præbent amplissima veruaculæ .* Utraque hæc lex semen quodammodo , ac germen fuit in libera civitate ingentium dissidiorum , ac rixarum . Recte igitur Livius , qui Sp. Cassii agrarias actiones , veluti maiorum fontem quemdam , notat ; additque inde usque ad suam memoriam , numquam sine maximis rerum motibus iis agitatum . Decem enim & septem annos post agrariam alteram tribunitiam , Ti. Æmilio & L. Valerio Coss. de agris dividendis agi per Tribunos coeptum est , qui , desidia magistratuum , quæ Cassii criminatio jamdiu fuerat , detinebantur . Hisque Ap. Claudius se se objecit . qui cum multa in Urbe moliretur adversus Tribunos pl. ad divitem ac nobilium causam undique tuendam , factum est ,
ut

ut ab his illi dies diceretur; qui diem tamen antea obiit, quam caussa agi posset. Qui triennio post fuere Tribuni pl. urgere agrariam rem non desiere; quo tempore atrox procella ac sæva R.P. fortasse perdidisset, nisi Fabius Consul consilio salutari optime occurrisset. Ejus enim talis sententia fuit, quæ neque agentibus, seu potius furentibus Tribunis pl. displiceret, neque etiam divitibus resistentibus. Cum enim multa & in Foro, & in Campo, atque in Curia jactarentur, is censuit: *T. Quintii ductu & auspiciis agri capti priore anno aliquantum a Volscis esse. Antium propinquam, opportunam, & maritimam Coloniam deduci posse. Ita sine querelis possessorum plebem in agros ituram; civitatem in concordia fore.* eaque sententia accepta est. Annis post CCCXXXVI. capti Lavici, L. Sergio, M. Papirio, C. Servilio, Tribunis militum, consulari potestate; quo tempore cum agrarias turbas Tribuni plebis permoveere viderentur, Patres, ut conatus tribunitios occuparent, otiumque in civitate retinerent, frequentes censuere, ut Lavicos Colonia deduceretur. Sed ea re tamen id consequi non potuere, quod maxime concupierant. Namque Mecilius ac Metilius, homines turbulentissimi, biennio post nacti tribunatum, omnia miscuerunt. Rogationem enim ad Populum tulerunt, ut, qui ager ex hostibus captus esset, viritim divideretur; magnæque nobilium partis eo plebiscito fortunæ publicarentur. Cæterum ea lex, ut Tribuni plebis illam magnopere urgerent, Ap.

Ap. Claudio, viro nobili ac factioso, summæque per hæc tempora potentiæ in civitate, parante impedimenta, nequaquam perlata est. Idque ipsum sequenti anno, intercedentibus collegis, L. Sextio, Tribuno plebis contigit, qui id tentarat, ut, quemadmodum paullo ante Lavicos, ita Volas Coloni mitterentur.

XX. deinceps & amplius annis a contentionibus agrariis R. P. fere quæta fuit; cum interea ager Vejentanus captus est. Tum Consules L. Lucretius & Ser. Sulpitius ut plebis, ac Tribunorum studia lenirent, S. C. hac sententia fieri curarunt, ut agri illius jugera septena plebi dividerentur; neque id modo patribus familias, sed singulis de familia liberis capitibus. Eaque res post paullo, accisis Volscorum rebus, agrarios arrexerit, ut Pomptinum agrum dividendum postularent: ac tertio quoque verbo acta Cassiana injicerent seditiose. Donec anno CCCLXXXV. Sextius ac Licinius Tribuni plebis, inimicitiarum cum nobilitate persequentissimi, non sine magnis rerum motibus legem pertulere, ut ne quis plus quingenta jugera agri, centum majoris pecoris capita, quingenta minoris possideret; quod narrat Appianus; Livius etiam id præterea addit, a Tribunis primores Patrum interrogatos: *Auderent ne postulare, ut, cum bina jugera agri plebi dividerentur, ipsis plus quingenta habere liceret? ut singuli prope trecentorum civium possiderent agros, plebeio homini vix ad tectum necessarium, aut locum sepultura pateret ager?*

Eo

Eo igitur lato plebiscito, nobilitas vetere possessione agrorum fusa est, & quies diuturna, ad Gracchos usque, fuit in civitate. Quæ enim interea temporis factæ sunt partitiones, eæ neque ejus agri, quem privati possiderent, fuere, sed illius, qui ex hostibus captus esset, aut foret publicus P.R., neque ullo fere rerum motu contigerunt. Itaque anno CDXIII. & Latinus ager, & Privernas, & Falernus, qui Campanorum fuerat, usque ad Vulturum flumen plebi divisus est; & anno CDLXIII. Sabini pars, quod cap. de abstinentia his verbis Valerius tradit: *M. Curius, inquit, decretis a Senatu septenis jugeribus agri Populo, sibi autem quinquaginta, popularis assignationis modum non excessit; parum idoneum R.P. civem existimans, qui eo, quod reliquis tribueretur, contentus non esset.* Gallicus præterea, ac Picenus anno DXXV., rogationem ad Populum ferente C. Flaminio Trib. pl., quod Polybius memorat, & Cicero in Catone Majore, & Varro lib. 1. R.R. hoc modo: *Ager Gallicus Romanus vocatur, qui viritim cis Ariminum datus est.* Anno denique DLII. & LXXIX. divisiones duæ duobus S.C. imperatæ, quorum alterum Cn. Cornelio, & P. Ælio Consulibus, ad Senatum referentibus, de Samniti agro, Apuloque dividendo factum est; alterum L. Postumio & M. Popillio Consulatum obtinentibus, de Ligustino & Gallico, qui bello captus, vacaret magnam partem. Interim ex longo intervallo turbæ agrariæ redierunt, quæ pacem fere annorum ducentorum

torum perturbarunt, & R.P. florentissimam perfumderunt. Licinia enim lex de CCCC. jugeribus, cujus supra meminimus, nobilium cupiditate, propemodum obsoleverat; ac plebs pulsa suis sedibus, cum diu mussitasset, naeta postremo acrem Trib. pl. cælum omne, terramque permiscuit. Liciniæ obsoletæ, & nobilitatis libidinosisimæ Cato, Cicero, Livius, & Appianus meminere. Verba Catonis hæc sunt in Oratione, quam anno DLXXXVI. in Senatu habuit pro Rhodiensibus. *Quid nunc, inquit, ecquæ tandem lex est tam acerba, quæ dicat: Si quis illud facere voluerit, mille numi dimidium familiæ multa esto. Si quis plus quingenta jugera habere voluerit, tanta pœna esto. Si quis majorem pecudum numerum habere voluerit, tantum damni esto. Atqui nos omnes plura habere volumus, & id nobis impune est.* Porro Cicero docet in Agrariis, P. Lentulum, principem Senatus per hæc tempora, missum in Campaniam ab Senatu, ut privatos agros redimeret publica pecunia, qui agri incurrerent in publicum Campanum. Livius deinde prodidit memoriæ, anno DLXXIX. multis in Senatu disputatum, quod plerique privatorum, finibus exaratis, ingentem agrorum modum obtinerent; Patribus postremo placuisse, L. Posthumium Consulem, ut agrum publicum a privato terminaret, in Campaniam ire. Denique Appianus, qui memorat, nobilitatem, plebe ejecta, omnes fere Italiæ agros, & publicis occupatis, & pauperum coëntis, invasisse. In istæ igitur cum incidisset

D

fet

fet tribunatus Tib. Gracchi, hominis eloquentis-
 simi, potentissimique, plebs proloqui liberius, &
 palam carpere optimatum, & locupletum ava-
 ritiam ac superbiam coepit audacissime. Itaque
 Tib. Gracchus, ut gratam rem plebi faceret, Li-
 ciniam legem de quingentis jugeribus referre
 non dubitavit; eaque perlata, frustra nobilibus
 adversantibus. Idque est, quod Cicero indicat in
 Sextiana: *Tib. Gracchus legem ferebat agrariam; gra-
 ta res erat populo. Nitebantur contra optimates, quod
 ea discordiam excitari videbant; et cum locupletes diu-
 turnis possessionibus morerentur, spoliari R.P. propugna-
 toribus arbitrabantur.* Quo facto iram nobilitatis
 in se, & odium implacabile concitavit; cuncti-
 que ad unum opprimendum consenserunt. Eo
 itaque una cum Cajo fratre, & Ap. Claudio so-
 cetro, agris dividendis & assignandis Illviris crea-
 tis, ferocius adnitente, Patricii vehementius
 commoti, serio de vi inferenda cogitarunt.
 Hunc igitur operam dantem, ut iterum Tribu-
 nus plebis crearetur, obtruncarunt; illoque in-
 terfecto, & Appio mortuo, pax rursus, & tran-
 quillitas in R.P. per decennium fuit; quam fra-
 ter Cajus cum Carbone & Flacco deinde per-
 turbarunt. Sed Cajum Cornelia mater, agrarias
 molitiones permiscentem, fratris nece, ac fami-
 liae clade objecta oculis, gravi oratione, nequic-
 quam tamen, detertere conata est. Placet foe-
 minae eloquentissimae verba recitare, quae ad nos
 usque Nepotis nitidissimis fragmentis salva per-
 venire. *Dicis, inquit, pulchrum esse, inimicos ul-
 cisci,*

cisci. Id neque majus, neque pulchrius cuiquam atque esse mihi videtur: sed si liceat R.P. salva eos persequi. Sed quatenus id fieri non potest, multo tempore, multisque partibus inimici nostri non peribunt, atque uti nunc sunt, erunt, potius quam R.P. profligetur atque pereat.

Hæc deinde. Verbis conceptis dejerare ausim, præterquam qui Tiberium Gracchum necarunt, neminem inimicum tantum molestia, tantumque laboris, quantum te ob has res mihi tradidisse, quem oportebat omnium eorum, quos antehac habui liberos, partes eorum tolerare atque curare, ut quam minimum sollicitudinis in senecta haberem; utique quacumque ageres, ea velles maxime mihi placere; atque uti nefas haberes rerum majorum adversum meam sententiam quidquam facere; præsertim mihi, cui parva pars vitæ superest. Ne id quidem tam breve spatium potest opitulari, quin & mihi adverteris, & R.P. profliges. Denique que pausa erit? & quando desinet familia nostra insanire? & quando modus ei rei haberi poterit? & quando desinemus & habentes & præbentes, molestiis desistere? & quando perpudescet miscenda atque perturbanda R.P.? Sed si omnino id fieri non potest, ubi ego mortua ero, petito tribunatum; post me facito, quod lubebit, cum ego non sentiam. Ubi mortua ero, parentabis mihi, & invocabis deum parentem. In eo tempore non pudet te eorum deum preces expetere, quos vivos atque presentes, relictos atque desertos habueris? Ne ille sinat Jupiter, te ea perseverare, nec tibi tantam dementiae venire in animum. Et, si perseveras, vereor ne in omnem vitam tantum laboris culpa tua recipias, uti in

nullo tempore tute tibi placere possis. Cum dicto matri audire noluiſſet; adeptuſque tribunatum avidius fratris necem ulciſci vellet, ejuſque & ſuas tueri leges, agrariis concitatis, quod Cice-ro, & Plutarchus tradiderunt, ſimilem vitæ invenit exitum. Necatus enim eſt cum Flacco una, anno DCXXXII. ab optimatibus. His itaque ſublatis, celeriter Tiberii leges, & Caji abrogatæ ſunt. Auſtor eſt enim Appianus, lege tribunitia latum eſſe, ut, quod Tiberii lege vetabatur, liceret agros vendi; adhæc ne agri amplius dividerentur, ſed poſſeſſores, ſiquidem de his penderent vectigal P.R., in iis relinquerentur; eaque pecunia plebi divideretur. Quod deinde Sp. Thorio Tribuno plebis diſplicuit. Itaque rogationem aliam tulit, ne vectigal penderetur; cavitque de paſſione pecoris; quod Cice-ro in Bruto indicat his verbis: *Sp. Thorius agrum publicum, inutili lege, vectigali levavit.* & libro II. de Oratore: *Cum in Senatu ageretur de agris publicis, & de lege Thoria, & premeretur Lucilius ab iis, qui a pecore ejus depaſci agros publicos dicerent.* Atque hæc lex eſt Thoria, cujus fragmenta duo, in æs incifa, ampla illa quidem, ſed circa adeſa, Petrus Bembus, Venetæ R.P. & terræ Italiæ decus immortale, neſciò quo factò inventa, poſteris conſervavit; quæ nunc non ſine admiratione Romanorum antiquæ ſapientiæ in manibus litteratorum publice verſantur. Movere rem agrariam deinde Saturninus, & Sex. Titius, Trib. pl., neque ita multo poſt L. Philippus, cujus Cice-

Cicero meminit II. Officiorum his verbis: *In primis videndum erit ei, qui R. P. administrabit, ut suum quisque teneat, neque de bonis privatorum publice diminutio fiat. Perniciose enim Philippus in tribunatu, cum legem agrariam ferret, quam tamen antiquari facile passus est, & in eo vehementer se moderatum prae-
buit; sed cum in agendo multa populariter, tum illud male: non esse in civitate duo millia hominum, qui rem haberent. Capitalis omnino oratio est; ad aequationem bonorum pertinens; qua peste qua potest esse major? Deinceps M. Drusus, & L. Sylla; ac, Cicerone consulatum obtinente, P. Servilius Rullus, cujus ea lex fuisse dicitur: Ut qui agri, qua loca, qua adificia, aliud-ve quid, quod publicum P. R. factum esset, L. Sylla, Q. Pompejo Consulibus, id venderetur; item ut omnia venirent, de quibus vendendis S. C. facta erant, M. Tullio & Cn. Cornelio Coss. & ea pecunia agri in Italia emerentur, in quos Coloniae a Decemviris deducerentur; ut Campanus ager & Stellas publicus P. R. divideretur; Capuam Coloni adscriberentur. Sed ea lex tamen, etsi vehementer popularis, Cicerone acriter dissuadente, summo populi consensu repudiata est. Duæ jam sunt reliquæ agrariæ leges, quarum altera Flavia fuit, cui Cicero restitit, ut apparet ex primo Epistolarum ad T. Pomponium Atticum; altera C. Julii Cæsaris Consulis, quam Dio optimam in primis, & utilem R. P. appellavit. Ita enim pro summa hominis sapientia comparata est, ut omnibus consuleret; neminem læderet; &, quod fuit memorabile, remedium invenit, quo deinceps agrariæ*

riæ seditiones omnino exstinguerentur. Cunctis itaque probantibus, est perlata. Satis mihi videor ostendisse de nobilissimis quibusque legibus agrariis, quæ agrum definiverunt, qui esset dividendus. Nunc paucis, *qui dividerent*. Porro certum est, huic muneri ex S. C. certos homines præfuisse, qui a numero IIviri, IIIviri aut Tresviri, Vviri, Xviri, XXviri, & universe agrarii Curatores, & Auctores divisionis sunt appellati. Ac vehementer fallitur Laurembergius, qui libri I. artis gromaticæ cap. III. hos eosdem putat Agrimensores nominari; turpiter etiam glossa legis III. Codicis titulo finium regundorum, quæ Agrimensores nuncupat exsecutores. Namque Agrimensores, ut Willelmus animadvertit, qui grumam profitentur, quique in eam grumam jus reddere consueverunt, a veteribus sunt appellati. Hinc illa Ennii apud Nonium: *Gruma dirigere, & degrumare ferro*. Huc lege illa Theodosium & Valentinianum respexisse apparet, cujus hæc sunt verba: *Quoniam qui non fuit professus super hac lege, jubemus damnari; si sine professione judicaverit, capitali sententia feriatur*. Horum ordo quidam fuit in Civitate, & gravis & splendidus, unde prodire Longinus, Frontinus, Balbus; Cilicius item Saturninus, centurio, & Vectius Ruffinus, primipilus, ac fortasse Octavianus Musca, cujus mentionem facit Servius ad Eclogam IX. Per agrarios igitur Curatores agrorum divisio fieri consuevit; quod locis pluribus Livius & Cicero tradiderunt. Porro Cu-
ra

ratores aut a Consulibus creati sunt, aut a Præ-
tore urbano, comitiis tributis, & tribubus uni-
versis advocatis. Quare Tullius Rullum asperere
reprehendit, quod Xviros suos per XVII. tri-
bus, sorte educatas creasset. *Toties, inquit, le-
gibus agrariis Curatores constituti sunt IIIViri, Quin-
queviri; Decemviri. Quæso a populari Tribuno plebis
ecquando, nisi per XXXV. tribus creati sint?*

Præterea ex eadem Rulli lege, Xviros eof-
dem pluribus ministris auctos, intelligitur, cum
dicat Cicero, tulisse Rullum, ut Xviri, auspi-
cii Coloniarum deducendarum causa, pullarios
haberent eodem jure, quo Tresviri habuerunt
Sempronia lege. *Deinde ornat, inquit, eos appari-
toribus, scribis, librariis, præconibus, architectis, mu-
lis, tabernaculis, supellectili; janitores ex equestri loco
ducentos in annos singulos, stipatores corporis consti-
tuit.* Reliquum est, ut agrariæ legis tertium ar-
ticulum, brevi attingam, quibus divideretur. Cu-
jus rei facilis erit ratio, & expedita, si duo di-
ligenter attendantur; genus nimirum, & nume-
rus illorum, quibus, jure Coloniarum, atque ex le-
ge agraria, agri divisio facta est. Quod perti-
net ad genus, satis constat, agros, aut populo
viritim, aut plebi, aut patribus liberorum, aut
militibus, vel civibus, vel Latini nominis so-
ciis, divisos esse; id quod apparet ex his, quæ
Livius, Hyginus, & Pædianus in commentario
Pisonianæ, tradiderunt. Illud de genere arbitror
potissimum animadvertendum, in agro dividen-
do, ac limitando, tribuum ordinem veteres
ser-

servasse; nempe ut ab urbanis ordine exorsi, rusticis deinde persequerentur. Quod cum Rullus in animo haberet, ut immutaret, occasionem dedit Ciceroni ejusdem reprehendendi. *Quæsi vi*, inquit, *in concione ex eo Kal. Januariis, quibus hominibus, & quemadmodum illum agrum esset distributurus; respondit, a Romilia tribu se initium esse facturum. Primum quæ est ista superbia, & contumelia, ut populi pars amputetur; ordo tribuum negligatur; ante rusticis detur ager, qui habent, quam urbanis, quibus ista agri spes & jucunditas ostenditur. Hi porro qui agri cupiditate tenebantur, nomina in Coloniam dabant; quod docet Livius lib. I. his verbis: Plures inventi, qui propter ubertatem agri in Crustumini nomina darent. & lib. III. Jussi nomina,* inquit, *dare, qui agrum accipere vellet. quem morem P. R. respiciens Virgilius, hæc dixit in V.*

Transcribunt urbi matres, populumque volentem. Quod vero ad numerum spectat, certum est, eum lege fuisse præfinitum. Verba Livii id ostendunt: *Senatus censuit, Coloniam Larvicos deducendam. Coloni ab Urbe mille & quingenti missi; bina jugera acceperunt.* Nempe Colonorum numerus ad agri limitandi modum & amplitudinem comparabatur, in quem deducerentur. quo factum est, ut modo terna, quina modo, aut septena millia hominum, aut etiam amplius, minusve scriberentur. Quo in genere Rullum quoque Cicero redarguit, cum dixit: *Tu non desinas, quot Colonias, in quæ loca, quo numero Colonorum deduci velis?* Ac si plures, vel pauciores, quam

quam esset lege agraria definitum, nomina professi essent in Coloniam, tum ad sortem confuebat, ut ex omnibus sorte educerentur, qui agro accepto exirent. Quod Plutarchus & Dionysius animadverterunt. Ex his igitur apparet, Colonorum numerum ita ad agrum limitatum, aut limitandum institutum, ut cum illo consentiret, ex Coloniarum jure, atque ex lege agraria; de quibus extremis duobus cum dictum sit, superest, ut disceptem de agro limitato.

Ac primum quidem ager limitatus is appellatur, qui limitibus divisus ac distinctus est. Ea res multis magnisque animadversionibus continetur, ut ex agrariis libris intelligitur Flacci Siculi, veteris J. C., Julii Frontini, Aggeni Urbici, Simplicii, Hygini, Innocentii, Baronis, Latini, Myfrontii, aliorumque, qui de re agraria conscribere; ex quibus non illa omnia sumsi, quæ aut ab illis dicta sunt de agro limitato, aut dici possunt, sed ea dumtaxat, quæ faciunt ad rem præsentem, &, quod diligentissime velim attendatis, ad locos plures Juris Civilis illustrandos. Porro limitum & agrorum, unde ager dictus est limitatus, plura genera fuere. Limitum nomina hæc sunt: Orientalis, Septemtrionalis, maximus, actuarius, intercisivus, quintanus, cultellatus, nonanus, maritimus, gallicus, temporalis, regalis, subruncivus, linearis, sextaneus, tessellatus, diagonalis, montanus, austrinalis, præfecturalis, undecimanus, colonicus, passivus, hypotenuissalis, duodecimanus, egregius,

E

gius,

gius, solitarius, perpetuus, limes denique qui antica, & postica dividit. Placet itidem agrorum genera recitare, ut ordine omnia tradantur. Nomina hæc sunt: assignatus, centuriatus, subcisivus, dextratus, sinistratus, citratus, ultratus, tetragonus, tessellatus, cultellatus, normalis, epipedonicus, triumviralis, solitarius Syllanus, Neronianus podismatus, Cæsarianus assignatus, jugarius in quinquagenis jugeribus, meridianus in XXV. jugeribus, commutatus ex beneficio Augusti. Neque vero hæc nomina temere a veteribus inventa; sed jam educta partem magnam ex spatiis geometrarum cultissimi Agrimensores limitibus Romanis accommodarunt; indeque didicerunt, regiones in loca, loca in territoria, territoria in agros, agros in centurias, centurias in jugera, jugera in climata, climata in actus, actus in perticas, perticas in passus, passus in gradus, gradus in cubitos, cubitos in pedes, pedes in palmos, palmos in uncias, uncias postremo in digitos dividere. Inde etiam, non modo limitum genera tot, agrique limitati, sed terminorum voces propemodum infinitæ, diis sacre Terminalibus, Augustæi, Ciliicii, testacei, faxei, plumbacei, molares, albi, scutanei, tornatiles, cubi, tutulati, reprobi, aut reproba facie, obtuso angulo, alii, quos longum esset enumerare. Hinc Vitalis & Arcadii verba illa: *Terminus reprobus in fine ponitur: in fine autem reprobum non posuimus. Nam obtuso angulo posuimus in trisinio, non reproba acie.* Huc Lucretium

tium lib. IV. de Rerum Natura respexisse apparet. Sic enim inquit:

*Quadratasque procul turres cum cernimus urbis,
Propterea fit, uti videantur sæpe rotunda,
Angulus obtusus longe quia cernitur omnis.*

Fuit enim veteribus Poetis; Poetis autem? imo vero omni scriptorum generi, cum libris Juris Civilis, iisque voluminibus, quæ de agro erant limitato, perpetuum, idemque splendidissimum commercium. Eo pertinent leges tot inclytæ Sempronia, Cornelia, Julia, Peducea, Flavia. Eo Alliena, cujus verba hæc sunt: *Qui limites decumani hac lege deducti erunt; quacumque fossa in eo agro erunt; qui ager hac lege datus, assignatus erit, ne quis eos limites decumanos obsepito.* Eo denique lex Mamilia, quam C. tulit Mamilius Trib. pl. bello Jugurthino, unde dictus est Limitanus. De qua lege Aggenus multa; aliqua etiam Cicero lib. I. de Legibus. *Ex hac autem, inquit, non rerum, sed verborum discordia, controversia nata est de finibus, in qua, quoniam usucapionem XII. tabula inter quinque pedes esse noluerunt, depasci veterem possessionem Academia ab hoc acuto homine non sinemus; nec Mamilia lege singuli, sed ex XII. tres arbitri fines regemus.* Recte igitur Livius modum jugerum, agrique limitati indicat, cum de Satrico hæc habet: *Duo millia deducta; bina jugera, et semisses agri assignati.* Ac si genera & natura limitum & agrorum tantam eruditionis, ac doctrinarum suppellectilem requirunt, quantam hætenus exposui; qualitates, ut Urbicus appellat,

non minorem postulant. Mittam reliquas; unam dumtaxat in medium afferam. Ea agri divisi & assignati est. Hanc Frontinus docet, conditionibus duabus esse præditam; unam, qua plerumque limitibus contineatur; alteram, qua per proximos possessionum rigores assignatus sit. Ii sunt limites, quos antea commemoravi, decumani, cardines, prorsus etiam, & transversus. Porro per rigores agri limitantur, aut per strigas, unde strigatus ager, aut per scamna, unde scamnatus. Hæc summis sunt implicita difficultatibus; quas non expediverunt, sed adauxerunt, qui omnem assignationem fieri docuere aut in jugeribus, aut in lacinis & strigis, aut in præcisuris, aut in centuriis, aut denique in nominibus. Itaque mirum non est, si plurimi cæcutiunt ad illud Lucilii:

Illi præciso atque epulis capiuntur optimis.

Si plurimi ex nostris ad locum Caji J.C. in l. XXX. ff. titulo de verborum significatione. Verba Caji hæc sunt: *Non valis est terra præcisa, quæ anno cessavit.* Quo in loco bis foede erratum est, primum vitio scripturæ; deinde interpretum. Scriptura integra hæc est: *Non valis est terra præcisa; quæque anno cessavit.* Interpretes, cum ex agrariis libris ignorarent præcisuras, unam dumtaxat rem a Cajo designari existimarunt; cum duas indicarit, nempe præcisam terram, seu præcisuram, quæ nihil est aliud, quam lacinia quædam ex silvestri agro, incultoque pinguis & opima, & idonea ad excolendum, & terram illam, quæ an-

no

no interquievit. Quæ res occasionem dedit Pontifici in capite *Quid per normale extra de Verborum significatione*, ut palam fateretur, quid præcisa terra intelligi oporteret, se nescire. Virtus igitur, industria, prudentia veterum Jurisconsultorum vehementer laudanda, qui agrorum commentarios in ditione sua perpetuo habuerunt; eosque ad Juris Civilis scientiam cum summa utilitate traduxerunt. Hinc jus effluxit prædatorium, jura rusticorum & urbanorum prædiorum, finium regundorum tituli, plura capita legum decemviralium, plura denique rescripta Imperatorum. Quæ cum ignorarent, qui ad leges singulas glossas concinnarunt, nolite quærere, quæ monstra opinionum pepererint. Atque hoc illud est, quod Sichardus in Epistola ad Ferdinandum Hungariæ Regem, quæ præposita est Codici Theodosiano, vehementer queritur. *Julium Frontinum*, inquit, *de qualitate agrorum, & limitum controversiis cum Aggeno Urbico adnexuimus, ut simul haberentur, quæ reliqui nobis tot clades, atque redi-virvi quidam Gotha fecere, non tam hominibus, quam ipsis studiis exitiales.* Sed hæc hæcenus de agro limitato. Puto ex his satis intelligi, agri limitati rationes nullo modo cognosci potuisse, nisi illæ ad Coloniæ jura, & agrarias leges transferrentur, satisque ex his constare, teneri Jus Civile, aut tradi sine præfidiis artium optimarum nequaquam posse. Nunc ego vos rogo, atque obsecro, studiosi Adolescentes, ut, qui Juris Civilis studiis operam datis, recte id atque ordine facia-

ciatis; ut bonos Interpretes dumtaxat in manus sumatis, qui XIV. XV. & XVI. seculo floruerunt, Italos externosque; ut in legibus ipsis cognoscendis multam operam locetis; quæ via est una omnium expeditissima; ad quam Muretum, Manutium, Aonium Palcarium, quibus nemo umquam propius accessit ad gloriam Tullianam, veterumque sapientiam, juvenes cohortari solitos accepimus; ut denique eos imitemini, legum optimos Magistros, qui Jus tradunt in hac ipsa Academia, ex hoc ipso præsertim loco, cæterorum principe, quo in loco superioribus annis, veluti fax quædam, publice proposita, omnium bono, omnibus præluxit, PETRUS DE AMATIS, flos, decus, splendor Patavinæ nobilitatis, cujus sine multis lacrimis reminisci non possumus. Senex optimus & venerabilis. Cui neque virtus ulla defuit, ut illa ageret, quæ recta, quæque honesta essent; nec litteræ, ut intelligeret. Summa in illo comitas, facilitas, humanitas; summa diligentia. Ejus benignitatis vir, ut illa sibi crebro adimeret, quibus alteri opitularetur. Jus caste traditum, religiose etiam redditum. Quem cives externique semper suspexerunt. Lumen Patavinæ urbis inclytum, unde sæpe lumina clarissima omnium disciplinarum effulsere. Quem tamdiu Civitas, & Academia desiderabit, quamdiu Civitas, & Academia erit.

D I X I.





PATAVII. CIOIOCCXXI.
EXCUDERAT JOSEPHUS COMINUS.

ANTONII
ARRIGHII

ORATIO

DE

AGRO LIMITATO,

HABITA ANNO MDCCXXX.

III. CAL. DECEMBR.

IN GYMNASIO PATAVINO,

*Cum ad Jus Civile e Sede principis Publice
profutendum aggredereetur.*



PATAVII. CIOIOCCXXXI.
EXCUDERAT JOSEPHUS COMINUS
Superiorum Permissu.



3

ANTONIUS ARRIGHIUS
CAROLO RUZZINO,
EQUITI, ÆDISQUE
DIVI MARCI PROCURATORI

S. P. D.



ULTA me dies noctesque de præstan-
ti virtute tua cogitantem, CAROLE
RUZZINE, deque iis rebus, quas
domi & foris præclarissime gessisti, pudor quidam idemidem com-
monuit, turpe esse, in tanta Civitatis, gentiumque omnium com-
mendatione, unum me, cæteris dicentibus, silere, quem potissi-
mum beneficiorum numero ac magnitudine antea exornasses. Sed

A 2

pro-

profecto id mihi obtigit, laudum tuarum homini cupidissimo, quod iis, quos nimia quedam lux oppressit, Solem medium & exsplendescentem intuentes, ut tum maximo nil perspiciant, cum cernere ac perspicere maxime conantur. Nempe rerum splendor ac majestas, quæ te in Theatro Orbis terræ agentem, altum atque excelsum, & majore quadam fecit gloriæ vi illustriorem, facile deterruit, & tamquam oculorum aciei propemodum subduxit. Ita factum est, ut tu quidem præconio exilis virtutis tuæ, factorumque egregie hæcenus carueris, ego angore non caruerim, atque ingenti quadam molestia animi. Qui enim umquam carere possim, oblata recordatione earum rerum, quæ quasi morsu quodam dolorem efficiunt; nempe admonent imbecillitatis; quod auctus & honestatus summis beneficiis a Proceribus RUZZINIS, nil proloqui, nil agere, nil quicquam gratiæ referre sciam, aut possim? Heret mihi animo, semperque hærebit DOMINICI RUZZINI, fratris tui filii, inclyta memoria; Urbisque Pataviæ splendidissima Prætura, honesta illi, Patavinis salutaris, mihi memorabilis; quo tempore, cum atræ illæ nebule ortæ essent, ac procella atrox in me unum deserviret, quæ jam non fuit hominis fortissimi opera, industria, diligentia, ut sævæ tempestati me eriperet? ut nequissimas calumnias ac tenebras diffunderet? Ut pax, ut orinum, ut denique lux illa iterum rediret, quam mihi fata mea; quid enim dicam? propemodum abstulerant. Inde ex illo genere divina illius fuit animi constantia, qua me tibi, Viro Principi, in petitione honoris; qua me cæteris Venetæ Civitatis Viris summis, honesta suffragatione, commendavit; qua denique & re salva & perditâ semper profuit, & semper prodest pro re nata. Hæc, si ulla est, vera virtus est, eaque nobilitas, quæ, ut boni prædicant, id commune cum diis habet, ut secundis quantumvis rebus, neque cæcutiat, neque tumescat;

mescat ; ut parta illa sit in magnis Civitatibus hominum indigentium , litterarum ac litteratorum commodo , qui invidia , & contumelia , fortunæque iniquitate idemtidem vexantur . Tu deinde , Amplissime Senator , consecutus es , qui ceptum opus altissime proveberes ; provecto fastigium imponeres ; atque , ut nil deesset , tamquam peristromate adornares . Te enim Auspice atque auctore Sella altera Juris Pontificii superioribus annis mihi obtigit in Academia ; post deinde Sella princeps Civilis Juris , ingenti quadam significatione honoris . Quo facto omnia mihi ampla ac splendida contigisse visa sunt ; delatoque munere , mare quidem ingredi , quod ratio profitendi ipsa poscit , sed natura sua immobile ac tranquillum , perito præsertim nautæ . Sed venti & auræ deinceps concitarunt . quæ tum non fuit constantia tua ac robur animi , ut , veluti in salo medio hominem jactatum arriperes , teneres , in portum optatissimum traduceres ? sustentares spe ? verbis solarere ? denique (quæ illorum ratio esse solet , qui clementia ac benignitate accedunt proxime ad deos immortales) novis beneficiis vetera augendo , fortunam , ac dignitatem meam augeres , & confirmares ? Ac si verum est , quod Plato tradit , eo majus esse beneficium , quo is est major , qui benefecit , certe ea res majorem fecit mihi benignitatem tuam . Ea enim decora te circumstant , quæ hominem efficiunt beatum ac florentem in Republica florentissima . Circumstat Familie splendor ac nobilitas ; virorum auctoritates , qui adhaerent lateri ; potestates summæ ad te delatæ ; diætæque & obitæ legationes splendidissimæ ; quæ si minus verbis ornare possum , narrare possum ratione aliqua . Natus Patre magno , majore Avo , maximis Majoribus , qui belli pacisque artibus difficillimis temporibus Patriæ profuerunt . MARCUM inspice , fratris filium , admirabili quadam , ac præpollenti eloquentiæ vi , in Curia præfulgentem ;
qui

qui natus cito vestigia tua, artesque adeptus, quibus ipse incla-
ruisti, in conspectu Civium, ante ora Patrum sic versatur, ut
agendo, dicendoque tonare, fulgurare, permiscere mentes omnium
videatur. Hunc honores crebri, atque magistratus homini delati,
magni antea, nuper maximus, ut, te adhuc Sexviro Senatui re-
gundo, esset Sexvir; tacitisque Civium sententiis eximia ac sum-
ma omnia in loco destinantur. Inspice DOMINICUM, cujus ego
nomine ipso recreor, & frequenti usurpatione; in cujus oculis, cu-
jusque vultu jamdiu acquiesco. qui te complexus, Magistrum
summum regendæ Civitatis, virtutumque illarum, quibus homi-
nes hominibus admirationi sunt, ita adhuc dignitates tenuit, ut
pietas, ut religio, ut prudentia, ut justitia spirare in illo videan-
tur. Illustres prospice adolescentulos, MARCI filios, veluti e
summa specula; de quibus boni omnes sic confidunt, ex ea, quæ
jam fulget indoles virtutis, fore ut lux eadem domi, atque in
Civitate niteat aliquando, maxima, ut decet maximam. Mit-
to reliquos, ut modum faciam, quorum est copia ingens, RUZ-
ZINA Gente digna. Non mittam ALOYSIUM, Episcopum Ber-
gomatium, fratrem tuum, hominem sanctissimum, quem amissi-
mus superioribus annis. Hunc, si dixerò, Senator Amplissime,
fuisse Familiæ tuæ decori & ornamento; si Patriæ clarissimæ,
nobilissimæque, in qua altus educatusque est ad insignem pieta-
tem; si Italiam addidero, litterarum ac religionis domicilium,
minus profecto dicam, quam omnino debeam. Ecclesia illum sibi
vendicat jure suo: dignumque habet, quem cæteris mortalibus
ostendet; quem gavisa sit, temporibus hisce perditissimis, singulari
quadam Dei bonitate sibi oblatum, quem præficeret; quem in
urbe illa ornatissima collocaret, veluti perfecti Episcopi exemplar
quoddam, signumque pietatis & religionis, quod cuncti intue-
rentur. famaue & opinione earum rerum omnes, qui bene sen-
tiunt

tiunt, in cælum sustulere. Hæc tibi, CAROLE RUZZINE, domus obtigit, virorum feracissima, quam tuis ipse virtutibus illatis & bonoribus, cum esset nobilissima, nobiliorem effecisti. Tibi namque initio urbani Magistratus traditi adolescenti; tibi deinde viro, annaria lege, fuere hominibus documento, qui capi illos, quique geri oporteat; ita virtus omnis in optima perfusione Civibus enituit, fides, constantia, magnitudo animi, denique prudentia, virtutum caput reliquarum, qua retransimur ad justitiæ ac naturæ fines, ibique perpetuo continemur. Hinc factum est, ut domi cognita vis ingenii, industrieque tuæ, rerum externarum oblata perturbatione, continuo ad te Curia, ad te Civitas, ad te Italia tota oculos converterit; teque unum omnium dignissimum existimarit, quem in tristi tempestate præfidem deligeret ac retineret; cuius consiliis, atque sapientia, Meandri ac Syrtis rerum molestissimarum expedirentur. Tu bis Byzantium legatus ad Turcarum regem missus, fregisti barbaros patientia tua; prudentia devicisti; splendore vitæ ac virtutum præclarissimarum in tui admirationem pertraxisti. Missus Carolo stadium, mox Passarovitium, denique Hagam Comitum ad Nationum omnium ex omni memoria nobilissimos conventus, pacis componendæ, Patriæ inclytæ, cui Thracæ sævi ac superbissimi minitabantur, præsidio fuisti, & ornamento; atque, ut dicam paucis, eo rem tu letam, aut fessam adduxisti, ut aut leges dares; aut certe ne acciperes. Itaque te Asia talem novit, qualem novit Europa; noruntque & prædicarunt potentissimi Europæ Principes, ad quos Venetæ Reipublicæ majestatem, lumenque animi atque ingenii tui, legationibus magnificentissime obeundis apud Cæsarem; apud Carolum; denique Philippum Hispanorum reges late circumtulisti; idque tibi dedere virtutes tuæ, ac Civitatis tempora, quod nulla fortasse vidit superior ætas, ut non semel, non
bis,

bis, non ter, quod plerisque contigit, sed oëties, inusitato exemplo, legareris. Jure hoc igitur boni omnes de te prædicant; te Patrem, te Decus Gentis Venetæ appellant, lucemque & memoriam omnium seculorum; factumque ajunt felicitate quadam literarum & Academiæ Patavinae, ut ea procuratio ac tutela tibi traderetur; qua, te agente, optimi, doctissimi, ac prudentissimi quique lecti sunt; ornati, & aucti & ere & præmiis non exiguis; gravique objecta tempestate, fortissime defensi. Is tu mihi vir, munere fortune, quam nihil aliud esse puto, quam Dei præpotentis vim & nutum, obtigisti, a quo ornarer; cui porro nullam gratiam (quod incredibili quodam dolore animi, ac prope flens dico) referre possim. Sum ego sane hoc nomine, ut multis aliis, miser. sed si novi eximiam ac præstantem bonitatem tuam, ut certe novi, vel nihil quicquam a me requiris; vel contentus eris munusculo levidensi, ea nempe oratiuncula quam superiore anno habui, cum sedem principem inirem Juris Civilis; in qua nihil omnino præstans est, nihil dignum, præter nomen tuum. Hanc ad te mitto, ut, si forte probes, id fiat judicio tuo, ut recte agrarios libros, & omnem eruditionem Interpreti Juris Civilis commendarim. Tu diu vive in hac tua profecto viridi senectute & Reipublicæ, & tuo, & meo etiam, si dicere hoc licet, bono; quam senectutem, utar hoc loco verbis ac sententia gravissima hominis illius sapientis, citius infantiam æternitatis dixerim, vitæque initium immortalis, quam exitum mortalis. Vale.

Patavio. Idibus ipsi Junius MDCCXXXI.



D E

ECCLESIIS SUBURBICARIIS

O R A T I O.



UM superioribus mensibus ,
studiorum meorum caus-
sa, libros rerum legerem ,
nuper editos , quæ res Ve-
netis , Patrum Majorum-
que nostrorum memoria ,
pace belloque contigissent ,
ita sum animo affectus , ut
vix , aut ne vix quidem his

annis æque meminerim . Ea enim species huma-
nitatis ac sapientiæ inde ex illo corpore mihi ob-
lata est , ut felicitas ingenii Italici , & admiratio
facile in mentem venerit . Casta ac sancta dictio ;
summus sententiarum splendor ; res fuso nullo
illitæ , mirabilique quodam nexu inter se aptæ &
colligatæ ; Latinæ orationis fulgor , & forma in-
clyta , prodita temporibus beatissimis ; incensus

B

ac

ac majestas Patrum Venetorum majestate digna ; artes denique omnes bonæ a bonis repetitæ . Quo ingenii robore , qua luce sapientiæ , boni superi , cum Patribus , cum militibus , cum ducibus copiarum , cum hostibus sævissimis , agentem mihi reddere visus est , Ducum Principem , FRANCISCUM MAUROCENUM , omnium , quotquot urbs , ætasve ulla umquam tulit , rei militaris prudentissimum ! Quo vultu , quibus oculis , qua rerum agendarum eximia prudentia Cornelios , Corra-rios , Ruzzinos , Fuscarenos , Senatores cæteros ; in Foro , in Curia , in Rostreis agitantes ! Qua arte , quibus præfidiis ac luminibus dicendi , Duces , Imperatoresque , ac Tribunos militum , cal-licos , cunctantes , fortes , vehementes , plenos animi , ac vocibus sonantes ! Qua solertia denique ac sagacitate res obscuras illustrare , causas persequi ; pandere consilia ac referare ! Ut non ego solum , cujus fortasse minimum est iudicium , sed boni omnes sic existiment , habere nostra hæc tempora perditissima , quæ superioribus florentis-
simis opponant ; posteris relinquant exempla ad imitandum . R P. Venetorum præclarissimam , quo niteat in oculis omnium gentium , ad ho-minum memoriam sempiternam ; nostram hanc denique Academiam , quo populis ac nationibus in dies magis nobilitetur . Hæc si vera sunt , cum-que loci hujus , civiumque laudibus conjuncta , vobis gratiora fore arbitror ; eaque fortasse tem-perabunt , quæ animo turbatiore de scriptore no-bilissimo necesse est , commemorari , qui nuper ,
quæ

quæ Neapolitanis domi ac foris evenere, prodidit memoriæ. Hunc ego alterum hoc genere esse video, quem terra Italia natum his annis, atque educum viri eruditissimi gloriantur. Altum, magnificum, splendidum, gravem, via eleganterque memorantem; sed quem tamen animus iratus in Pontifices, odium, simulas transferum agant. Haustra opinionum monstra exurgitibus lutulentis, contra ac decuit eum hominem quem aër, quem tellus undique seposita ab alpium turbinibus ad optimam religionem aluisset. Alii alia animadverterunt, ac notarunt; ego quæ non satis ab illo excocta de Ecclesiis Suburbicariis. Ea me res ad Synodum Nicænam revocavit, atque ejus Synodi eum locum, quem Socrates Canonem Ecclesiasticum; Sozomenus Legem Sacerdotalem appellarunt. Sic mihi videor in proposito ac provincia manere legum tradendarum, quam hoc anno Rei Litterariæ Amplissimi IIIviri secundum detulerunt; sicque exemplum, ac bonorum institutum retinere, qui antequam leges interpretarentur, earumque vim, quas Pontifices tulere, de vertice ac fastigio legum earundem, hoc est, de Pontificibus & illorum potestate, contra obtrectatores non pauca disputarunt. Utinam hæc tempora, quibus boni omnes, aut in religionem ac veterem pietatem, aut in Pontifices, eorumque jura, nulla meminere atrociora, nihil postularent istiusmodi contentiones; liceretque nobis, in magno Ecclesiæ otio, ac data cun-

ētis rude , ab opere abstinere ; vel ad animi solatium , cum liberet , tamquam præpiatis , ad pugnam exerceri . Quæ quando optari posse , ne utique sperari , ut nunc sunt res , prorsus intellexi , collegi ipse me , ac fontes ipsos adii , laboresque expendi hominum gravissimorum . Ea mihi , cum superioribus diebus diligenter perscrutarer , cum motum attulere , ut hominum insaniam obluſtantium ac duritiem animorum , vehementer lacrimarim . Tanta enim vis ac rerum auctoritas his inesse visa est , non dico mihi solum , homini doctrinæ ingeniique exigui , sed his qui una aderant , viris sapientissimis , ut omnino existimarim , cæci esse hominis , præfractique , non dare manus victas . Sed , ut arbitror , hæc siquando ad hos sunt perventura , qui nobis adversantur , præ rabie ac libidine , nequaquam dabunt . Negligent fortasse , vel aspernabuntur , ut ea voluptate perfruantur , quam putant maximam , ut Pontificibus eorumque legibus maledicant ; utque eam potestatem atque principatum , quem superi hominesque jamdiu concessere ; viri item summi sævis tempestatibus sæpius vindicarunt , lacerent multimodis , ac nova quadam arte convellere conentur . Sed lacerent , convellant , quantum volunt ; palantesque ac dissipati in insulis & urbibus , obtreſcent Pontificibus ; livore , ocio , opum ac divitiarum vi in illorum contumeliam abundantiores . Ego partes meas , qualescumque erunt , nunc tuebor . Et , quod video expeti ab optimis quibusque , ut sine
atro-

atrocitate ulla orationis res commemorentur; loci interpretationem sic defendam, ut istis san-
nionibus dissimilis, nulla obiectem crimina; nul-
la ipsis probra ultro referam, quæ cupiditas, o-
mnium malorum altrix, alere consuevit. Uti-
nam aliqua utilitas ex labore meo Ecclesiæ oria-
tur; & quod vehementer cupio, his ipsis, quos
interdum pluribus videbor reprehendere.

Age igitur ad rem aggrediamur. Atque, ut
vis Nicæni loci facile eruatur, rerum seriem,
unde ea vis nexa quodammodo, aptaque vide-
tur, arbitror initio proferendam. Apostoli ita-
que principio Ecclesiam condendam ac dilatan-
dam susceperunt. Porro illa condita, ac dila-
tata ut commode administraretur, ordine ac dis-
positione opus illis fuit. Cumque ingentis ope-
ris initia in Romano orbe ponerentur, ita ege-
runt, ut illius regimen ei regimini accommoda-
rent, quod in procurando imperio Romani te-
nuissent. Ab his omnis ditio in provincias distri-
buita; provinciæ in urbes atque municipia. Eo
missi a P. R. iusti magistratus, Proconsules, Præ-
tores, Præsides, qui jus redderent, & civitates
optimis institutis ac legibus temperarent. Crea-
ti exemplo R. P. sapientissime ab Apostolis Epi-
scopi; modoque ac ratione missi in urbes & pro-
vincias, ut Ecclesiis præessent; ita hæc tamen,
ut qui provinciarum urbes principes, Prætorum-
que fedes, & Proconsulum obtinerent, splendi-
diori majorique quadam potestate cæteris Epi-
scopis antistarent; atque in rebus decernendis,
tam-

ramquam principes Senatus , omine prærogati-
vo primam dicerent sententiam . Iique ipsi sunt ,
quos Nicæna Synodus Metropolitanos ; tempo-
ra deinceps consecuta Archiepiscopos appellarunt .
Inde factum est , ut , cum de rebus ad religio-
nem , & Ecclesiæ disciplinam pertinentibus , e-
pistolæ ab Apostolis darentur , mitti ab his ad
urbes principes consueverint , in quibus Eccle-
siæ illæ essent , quas Metropolitanæ administra-
rent . Hinc litteræ illæ Divi Paulli ad Ephesios , ad
Corinthios , ad Thessalonicenses , quod Ephesi ,
quæ Asiæ princeps urbs fuit , & Proconsulum
Romanorum sedes ; quod Corinthi , quæ Achajæ ;
quod Thessalonica , quæ Macedoniæ , Ecclesiæ
eæ forent in quibus Antistites amplissimi , nempe
Metropolitani , religionem procurarent . Inde ad
Titum etiam Paulli epistola , cum Gortynæ ef-
set , ut provinciam Cretam , Episcopis creandis ,
ordinaret . Atque hæc ipsa causa est , cur Pe-
trus , cum Hellenistis Christianam disciplinam
tradi vellet , qui erant Oriente atque Ægypto
dispalati , Alexandriam , quæ hujus caput ; inde
porro proficiscens , Antiochiam , quæ illius , ve-
nerit ; inde autem Babylonem , quod urbem il-
lam principem Hellenistarum , hoc est Judæo-
rum Patriarcha incolet ; quo loco prima ejus
epistola Canonica data est , ut ex his verbis in-
telligitur , quæ litteris extremis perleguntur : *Sal-
utat vos Ecclesia quæ est Babylone* . Quem locum
Scaliger rectissime non de urbe Roma , quod a-
lii docuerunt , sed de Babylone ipsa accipiendum
pu-

putat. Cur Paullus etiam, ut crebrius de eo mentionem faciamus, cum Asiæ proconsulari, de qua supra demonstratum est, quæ ad Populum Romanum Attali, regis Pergameni, tabulis pervenit, abdita mysteria referari cuperet, Ephesi docens ipse, ejus rei ludum quodammodo aperuerit; quod multis verbis conqueritur Demetrius in Actis. Hæc Tertullianum, virum sapientissimum, non latuerunt, qui de hac ipsa re disceptans, deque traditionibus, quæ incorruptæ his Ecclesiis fervarentur, ad quas Apostolorum monumenta pervenissent, in libro de præscriptionibus adversus hæreticos hæc habet cap. XXXVI. *Proxima est tibi Achaja? habes Corinthum. Si non longe es a Macedonia, habes Philippos; habes Thessalonicenses. Si potes in Asiam tendere, habes Ephesum. Si autem Italia adjaces, habes Romam, unde nobis quoque auctoritas præsto est.* Ejus etiam rei meminit Isidorus Mercator in ficta ac pudenda illa Epistolarum collectione, quæ tot secula atque ætates generi mortalium illudit; quamque nos annis superioribus, firmissimis argumentis ac rationibus conquiritis, omnino explosimus; meminit Gratianus in Decreto distinct. LXXX. & XCIX. Johannes item VIII. Epistola XCV. Leo IX. Epist. IV. Gregorius VII. lib. VI. Epist. XXXV. Neque vero hoc temere fecere Apostoli, ut in Ecclesia moderanda R. P. Romanæ temperationem sequerentur, & Ecclesiis, quæ in urbibus principibus Provinciarum ornarentur, cum summa potestate eos præficerent, quos Metropolitanos, & Archiepiscopos

pos appellamus. Alii causas alias commemorarunt. Ego hac una maxime contentus sum, quam invenio Can. IX. Synodi Antiochenæ. Verba hæc sunt : *Propter quod ad Metropolim omnes undique, qui negotia videntur habere, concurrunt.* Nempe Apostolos id animadvertisse, hominum ingentem multitudinem, negotiorum rerumque suarum causa, ad Prætorum sedes atque domicilia, urbes nempe principes Provinciarum, confluere consuevisse. Eo igitur aut venisse ipsos; aut præcellenti quadam potestate ac doctrina auctos Episcopos misisse, ut temporis compendio eam multitudinem, misere cæcurentem, ad legum lucem sanctissimarum felicissime traducerent. Sed quod fit fere in rebus humanis, ut cœpta ab aliis, aliorum opera atque industria subinde augeantur; crebro etiam induant formas novas & ampliores; moribus & consensu Episcoporum id contigit, ut ex Provinciis Ecclesiasticis quædam cernerentur, quæ cæteris majestate & amplitudine antecellerent ac imperitarent; Roma nempe Italiæ, totiusque orbis domina; Alexandria Ægypti; Antiochia item sedes Orientis; quam rem Chrysostomus Oratione XXXII. & Josephus belli Judaici lib. III. cap. III. memoriæ prodiderunt. Eaque, quam dixi, inducta consuetudine, ac moribus retenta diu, Synodus Nicæna, lege edita, Canone nempe sexto, amplissimis suffragiis firmavit probavitque; eademque Præsules, qui Ecclesias illas obtinerent, & Episcopos & Metro-

politanos appellavit; quos deinde Synodus Ephesina Archiepiscopos; Synodus Constantinopolitana, Provinciis cumularis, Exarchos Diœceseon; Chalcedonenſis denique & Archiepiscopos, & Exarchos, & Patriarchas nominavit. Sed ne quis exiſtimet, lege & more rem Eccleſiaſticam ea ratione fuiſſe diſpertitam temporibus antiquiſſimis, quaſi duces tres eſſent Religionis, poteſtate pari imperioque præditi; nec unus eſſet aliquis, cui cæteri ſubjicerentur. Neque enim vel Præſulum conſenſio antiquiſſimorum, vel Patrum Nicænorum ſuffragatio aut voluit, aut potuit, eam tollere regiminis unitatem, quam Chriſtus imperarat; nec ſcita humana tollere divina. Igitur hoc fuit Apoſtolorum inſtitutum ac diſciplina, ut Episcopî Metropolitanis dicto audirent; porro ætatum conſequentium uſus & comparatio, ut Patriarchis Metropolitanis; denique ex Patriarchis tres quidam haberentur, omnium nobiliſſimi; ita tamen, ut ex illis unus, Pontifex ſcilicet Romanus, divino jure & his & cæteris omnibus præeſſet, & principatum obtineret. Illuſtre eſt teſtimonium in hanc rem Leonis Pontificis ſanctiſſimi Epistoła LXXXVIII.

Inter beatiffimos Apoſtolos, inquit, in ſimilitudine honoris fuit quadam diſcretio poteſtatis; & cum omnium par eſſet electio, uni tamen datum eſt, ut cæteris præmineret. De qua forma Episcoporum etiam orta eſt diſtinctio; & magna diſpoſitione proviſum eſt, ne omnes ſibi omnia vindicarent; ſed eſſent in ſingulis provinciis ſinguli, quorum inter fratres haberetur prima

C

ſen-

sententia; et) rursus quidam, in majoribus urbibus constituti, sollicitudinem susciperent ampliore, per quos ad beatam Petri sedem universalis Ecclesiae cura conflueret. Hic vir eruditissimus dicam impingit grandem de Ecclesiis Suburbicariis. Vocat in jus confertum manum. Sic contendit, Constantini ævo, ante etiam, postque ad Valentinianum Imperatorem, tertium hujus nominis, suburbicariis locis Præfecti urbi potestatem fuisse definitam; locorum eorundem Ecclesiis Suburbicariis Episcopi Romani. Jam Canone Nicæno factam contentionem trium potestatum, ut quæ Romani Episcopi ex vetere consuetudine potestas foret in Ecclesiis Suburbicariis, eadem Alexandrini esset Ægypto tota, Libya, ac Pentapoli; eademque Antiocheni per omnem Orientem. Artibus deinceps & cupiditate ac rebus permiscendis Pontifices Romanos suam extulisse atque exaggerasse, cæterorum comminuisse. Quæ fuere prælia, & graves turbæ inter viros sapientissimos de hac re, Baronium, Perronium, Bellarminum, Marcam, Launojum, Dupinum, Sirmondum, Salmasium, Blondellum, Gotthofredum, alios etiam, quos nunc inutile omnino est percensere, ex integro eas ciet. Caute configendum est, Auditores. Res agitur gravissima, cujus omnis vis manat ex sententia, rectaque interpretatione Canonis Nicæni, sexti scilicet, quem usque invocant, atque appellant, qui Pontificibus adversantur. Principio igitur tabula ipsa in medium afferatur, ac recitetur, Græce Latineque, ut via
 omnis

omnis ad fraudem intercludatur. Verba itaque Canonis Græca hæc sunt:

ε΄.

Τὰ ἀρχαῖα ἰδοὺ κρατεῖται, πὲρ τῶν Αἰγύπτου, ἔς Λιβύην, ἔς Πενταπόλιν, ὡς καὶ τῆς Αἰγυπτιακῆς ἐπίσκοποι παῖσι τῶν ἐκ τῆς ὕψους ἐκείνης ἐκ τῶν ἐκ τῆς Ρώμης ἐπισκόπων τῶν σωτηρίας ἐσιν. ὁμοίως δὲ καὶ τὴν Ἀντιόχειαν, ἔς τὰς ἄλλας ἐπαρχίας, πὲρ πρεσβυτέρων σώζειν τὰς ἐκκλησίας, καθόλου δὲ ἀφ' ὧν ἐκείνη, ὅτι ἔστιν χάρις γράμμις τῶν μητροπολίτων γίνονται ἐπίσκοποι, καὶ τοῖσι ἡ μεγάλη σωδοῦν ὡς καὶ μὴ δύνανται ἐπίσκοποι· ἐὰν μὴ τοῖς τῇ κοινῇ παῖσι ὑψὺς ἐκείνη ὕψι, ἔς καὶ κατὰ ἐκκλησιαστικὴν, δὴν ἡ ἑκείνη δι' οὐκίαν φιλοτικίαν ἀντιλήγουσι, κρατεῖται ἡ τῶν ἐκκλησιῶν ὑψὺς.

Hunc locum sic Latine vertit Gentianus Hervetus. *Antiqui mores servantur, qui sunt in Ægypto, Libya, et Pentapoli, ut Alexandrinus Episcopus horum omnium habeat potestatem, quandoquidem et Episcopo Romano hoc est consuetum. Similiter et in Antiochia et in aliis provinciis sua privilegia, ac sua dignitates, et auctoritates Ecclesiis servantur. Illud autem est omnino manifestum, quod si quis absque Metropolitani sententia factus sit Episcopus, cum magna Synodus definiuit non esse Episcopum. Quod si quidem communi omnium electioni, quæ et rationi consentanea, et ex regula Ecclesiastica facta est, duo, vel tres, propter suam, quæ delectantur, contentionem contradicant, vincant plurium suffragia. Eodem fere modo transferunt Dionysius Exiguus, Isidorus Mercator, alique, qui hunc locum attigerunt. Si ex his ego unus essem, qui, tamquam saxo, voci uni alicui adhærescerem, proque verbo, non pro sententia pugnandum putarem, possem fortasse jure sic contendere, nugari egregie adver-*

farios, ac desipere, cum ex Patribus Nicænis nobis commemorant Ecclesias Suburbicarias. Nullo loco memorant. Nihil nominant. Tabula est in medio, Græcis Latinisque litteris confecta. Unus inventus est Ruffinus Aquilejensis, qui, cum expenderet Nicænam scriptionem, & contrahere atque interpretari mallet, quam ex fide reddere, Ecclesias Suburbicarias nominavit; atque hac ratione extulerit Canonis sententiam: *Et ut apud Alexandriam, & in urbe Roma vetusta consuetudo servetur, ut vel ille Ægypti, vel hic Suburbicariarum Ecclesiarum sollicitudinem gerat. Quem non verba reddere voluisse, sed sententiam brevissimam exprimere, manifesto apparet. Multis etiam post seculis Justellus, qui codicem proferret vetustissimum, quo in codice ex Synodo Chalcedonenſi Canon verbis hisce inscriberetur:*

*De primatu Ecclesia Romana, & aliarum
Civitatum Episcopis.*

Deinde hoc modo redderetur:

Antiqui moris est, ut urbis Romæ Episcopus habeat principatum, ut suburbicaria loca, & omnem provinciam sua sollicitudine gubernet. Quæ vero apud Ægyptum sunt, Alexandria Episcopus omnem habeat sollicitudinem. Similiter autem & circa Antiochiam, & in cæteris provinciis privilegia propria servantur Metropolitanis Ecclesiis. Omnimodo autem manifestum est illud, ut si quis sine arbitrio ejus, qui est in Metropoli, constituerit Episcopum, hunc censuit sanctum & magnum Concilium, non cum esse Episcopum. Sed versio hæc, ut ampla nobilisque sit; ut retineat sen-

sententiam; verba tamen verbis omni ex parte minime respondent. Vis enim Canoni prorsus fit, cum suburbicaria loca eidem inferuntur. Si disputatio itaque ad verba referatur, puto nihil habere eos, qui in nos tulere arma, quo vehementer possint gloriari. Videamus nunc de sententia; in qua eruenda quæ non Aleander? quæ non Darthisius? quæ non Valesius? quæ non fæx mortalium miscuit Calvinus? Quæ non excogitata? quæ non collecta ex antiquis monumentis? quæ non tradita ab illis sunt, ut Ecclesiæ Suburbicariæ, quas princeps prodidit Ruffinus, traducerentur ad Canonem Nicænum, inque iis contentionis funis duceretur? Porro traducantur; quod per alios licuit, per me licet; sed hæc hætenus, dum venia mihi detur, libere disceptandi, ac dissentiendi, si necesse sit, ab his, qui ante me locum expenderunt. Atque ut res ordine tradatur, primum demonstrabo, quænam fuerint Ecclesiæ ac Provinciæ Suburbicariæ. Deinde quænam fuerit potestas Pontificis Romani & in eas, quæ Suburbicariæ essent, & quæ non Suburbicariæ. Postremo de comparatione agam trium potestatum ex Canone Nicæno. Hæc tria cum docuero, perorabo. Principio igitur certum est, Ecclesias Suburbicarias eas esse, quæ Provinciis continentur Suburbicariis. Quemadmodum enim Orientales Ecclesiæ, Asianæ, Ægyptiæ, &c appellantur, quæ in Oriente, Asia, atque Ægypto sitæ sunt, ita Ecclesiæ Suburbicariæ aliæ ab iis esse non possunt, quæ Provinciis Suburbicariis

riis

riis concluduntur. Convenit hoc inter omnes. Porro Provinciæ Suburbicariæ eæ sunt, quæ sunt sub urbem, proximeque ad eam pertinent; & procul ab urbe diffitis provinciis P.R. ut Africæ, ut Galliæ, ut Hispaniæ, ut Illyrico, ut Britanniæ, opponuntur. Id locis pluribus post paulo commode demonstrabo, nunc unico dumtaxat, nimirum L. XXXIV. Codicis Theodosiani lib. VIII. tit. V. qua constitutum est, ut lata lex de Africa proconsulari pertineat etiam ad Provincias Suburbicarias. Ex quo intelligitur Provinciam Africam Provinciis Suburbicariis opponi, aliamque omnino ab iis esse. Quod si verum est, apparet, eos decipi insigniter, qui Provincias Suburbicarias eas esse contendunt, quæ plaga Occidentali, vel etiam Romano toto Imperio definiuntur. Cæterum ut negari non possit, Provincias Suburbicarias eas esse, quæ non sunt procul diffitæ ab urbe, non minima est tamen difficultas, in finibus illarum constituendis. Variæ de hac re a viris eruditissimis dictæ sunt sententiæ. Gotthofredus & Salmasius censuere, eas intra centesimum ab urbe milliare fuisse definitas; illasque esse, ut putat Gotthofredus, Tusciam Suburbicariam, Picenum Suburbicarium, Latium vetus, ac Latium novum; seu, ut existimat Salmasius, Tusciam, Picenum, Latium, & Valeriam. Alii hanc dixere, Romani Imperii fines, vel saltem Occidentis, Provinciarum Suburbicariarum fines esse; quod Baronius, Perronius, Bellarminus docuere. Alii iis limitibus

bus concludunt, quibus jurisdictio Præfecti urbi, seu Vicarii conclusa fuit, nempe Provinciis decem, quarum prima Campania est; altera Hetruria, & Umbria; tertia Picenum Suburbicarium; quarta Sicilia; quinta Apulia, & Calabria; sexta Lucania, & Brutia; septima Samnium; octava Sardinia; nona Corsica; decima Valeria. Ejus sententiæ auctor est Sirmondus, quam plurimis firmamenti communivit; eandemque ego semper omnium verissimam existimavi, quod manifeste ex libris Juris Civilis colligatur; sine cujus præsidio, bonorum omnium fuit semper opinio, vix quidquam, aut ne vix quidem, intelligi posse Juris Pontificum; eosque qui contra sentiunt, labi, errare, cæcutire. Atque ut appareat, decem Provinciarum finibus, quas paullo ante commemoravi, Provincias Suburbicarias, seu urbicarias, conclusas a veteribus, & appellatas hoc nomine fuisse, paucis res altius est aperienda. Universum Romanum Imperium in Orientem & Occidentem temporibus vetustissimis tributum fuisse, neminem vestrum ignorare arbitror. Porro Oriens in partes quinque, quas majores nostri diocæses appellarunt, divisus fuit, nempe Ægyptum, Asiam, Pontum, Thraciam, & Orientem peculiariter appellatum. Hæ rursus in Provincias, de quibus non est hic locus. Occidens eadem ratione in portiones suas est distributus, septem scilicet, Africam, Illyricum, Galliam, Hispaniam, Britanniam, atque in binas Italiæ diocæses, quarum altera Italica di-

dicta est, altera urbicaria. Harum singulae in suas provincias. Missis caeteris, in una Italia subsistamus. Igitur Italica dioecesis in Provincias septem divisa fuit; quarum prima Liguria fuit; secunda Aemilia; tertia Flaminia, seu Picenum Annonarium; quarta Venetia, cui deinceps Istria adjecta est; quinta Alpes Cottiae; sexta & septima utraque Rhætia. Harum omnium caput, sedesque fuit Mediolanum; inque ea urbe esse consuevit is magistratus, qui praefuit dioecesi Italicae, quem veteres Italiae Vicarium nominarunt. Altera autem Italiae pars, quae urbicaria ab urbe Roma dicta est, divisa in Provincias decem fuit, de quibus supra demonstratum est. Hae Provinciae ab urbis nomine, & urbicariae dioecesi, urbicariae, vel Suburbicariae appellatae sunt; iisdemque magistratus, quem veteres vocarunt Vicarium Romae, praefuit. Praefecti utrique summo magistratui, Praefecto scilicet Praetorio Italiae, paruerunt. Id constat ex Notitia Imperii, ex Notitia Vaticana, atque ex omni historia. Constat ex Jure Civili, lib. nempe II. Codicis Theodosiani tit. XVI. cap. IX. quo loco haec verba habentur: *Non enim per Italiam tantum, sed etiam per urbicarias regiones, & Siciliam, patrimonialium & emphyteuticorum fundorum vires servandas esse perspeximus.* Aperte hac lege indicantur, Auditores, Vicariatus, seu Praefecturae duae Italiae, Italica nimirum, & urbicaria, neque ullus potest contra haec hincere. Indicantur Codicis ejusdem lib. II. tit. X. quo loco litterae leguntur Gratiani Im-

pc-

peratoris ad Probum Præfectum, ut legem de privilegiis per dolum impetratis confirmet, *per omnem Italiam, tum etiam per Urbicarias, Africanasque regiones, ac per omne Illyricum.* Hæc lege diœceses quattuor Occidentis commemorantur; Illyricum, Africa, binæque Italiæ, Italica nimirum, & Urbicaria. Singillatim diœcesis Urbicariæ provinciæ enumerantur Codicis ejusdem Theodosiani lib. II. tit. XXVIII. cap. VII. his verbis: *Campania, Tuscia, Piceno, Samnio, Apulia, Calabria, Brutiis, & Lucania in omni præstationis modo, quem antiqua solemnitas detinebat, quattuor partes jubemus auferri.* Cap. autem XIV. ejusd. tit. nominatim Urbicariæ appellantur. Verba hæc sunt: *Quod de annonariis functionibus per Urbicarias regiones clementia nostra concessit.* Prætermittuntur superiore enumeratione diœcesis Urbicariæ quattuor provinciæ, Valeria nempe, tresque insulæ, Sicilia, Sardinia, Corsica, ob hanc causam, quod Valeria Samnio commisceretur; porro insulæ proprios haberent magistratus vectigalibus, ac portoriis exigendis. Arbitror ex his liquido apparere, quænam fuerint Ecclesiæ, & Provinciæ Suburbicariæ. Quæ si vera sunt, omnino errarunt, qui docuerunt, eas esse, & appellari oportere, quæ finibus Occidentis, vel totius Romani Imperii concluduntur. Horum sententia vel unis litteris Valentiniani, Valentis, & Gratiani ad Ampetium convellitur, quibus litteris Ursicino in Gallia exsulanti potestatem faciunt inde discedendi; hæc tamen his verbis legem adjiciunt,

D

ne

ne ad urbem Romam, vel Suburbicarias Regiones pedem inferat. Idque se facere beneficio illius profitentur, *natura suae mansuetudine levigatos*. Si Regiones Suburbicariae sunt omnes, quae vel Occidente, vel Romano Imperio universo continentur; easdemque ingredi non licuit Ursicino, postulo, quae gratia illi facta est? quod collatum beneficium? Quae tandem erit mansuetudo illa levigata Imperatorum? videte, Auditores, quam largi, benignique fuerint Imperatores! Ante datas litteras ad Amperium, licuit Ursicino, in Gallia commorari; esse in Occidente, atque intra fines Romani Imperii. Post datas litteras, quibus fit illi gratia, & Gallia, & Occidente, & toto Romano Imperio eidem interdicatur. Intelligitis, quam sint haec ridicula. Errarunt etiam ii, qui animis obstinatis contenderunt, Provincias Suburbicarias intra centesimum ab urbe milliare fuisse definitas. Causae errandi illis plures fuere. Puto in rem fore, brevi illas attingere. Principio eos decepit l. I. Cod. Theod. de calcis coctoribus tit. VI. lib. XII. Constantinus Imperator dat litteras hac sententia ad Praefectum urbi, ut quattuor regionibus ad calcem convehendam boves trecentos imperet. Sic igitur illi ajunt, quattuor eas regiones, alias non esse, quam quae Praefecto parere, Tuscani nimirum, Picenum, Latium, & Valeriam; ideoque hoc nomine ad Praefectum datas litteras. Porro eas regiones intra centesimum ab urbe milliare fuisse conclusas, constare ex Ulpiani lib.

fin.

singulari de officio Præfecti urbi, ex aliis etiam. Dii boni! quam homines aliquando in luce media nihil vident! quam ego doleo, Gothofredum, summum Jurisconsultum, misere inepdire! quam etiam pudet, Dupintum, Marcam, Sirmondum, cæterosque hæsisse; regionibus injectis. Ego sic ajo paucis, regiones, quarum meminit Constantinus suis litteris; quasque nequaquam nominat, quænam sint; non eas esse, quæ sunt sub urbem; quæque inde Suburbicariæ appellantur; sed quæ sunt intra urbem, ut Exquilina, Collina, Palatina, Suburana. Id ita esse, apparet ex eodem Ulpiano eodem libro, quo loco hæc habet: *Et urbe interdici Præfectus urbi, & quæ alia solitarum regionum potest.* Ac ne quis adhuc hæreat de solitis regionibus, præsto est Paullus, qui lib. singulari de officio Præfecti vigilum has interpretatur his verbis: *Cæsar itaque septem cohortes opportunis locis constituit, ut binas regiones urbis unaquaque cohors tueretur.* Deinde quod pronunciant, regiones illas quattuor suas Suburbicarias intra centesimum ab urbe milliære fuisse conclusas, falsum est. Pice-num Suburbicarium extra centesimum ab urbe lapidem ex Notitia Imperii, & ex Itinerario Antonini fuisse; omnino constat. Latium novum inter Provincias numquam habitum fuisse; Valeriam ultimis dumtaxat temporibus, apparet ex notitia Italiæ, & ex Paulli Diaconi historia Longobardorum lib. II. Postremo hoc videant, qui tantopere sibi placent de lapide centesimo ex

Ulpiano, ne contra hic idem sentiat eodem libro; tum de Præfecto urbi, ne idem omnino sit, qui Vicarius Romæ. Fucum etiam fecit Notitia Imperii Salmasio & Gotthofredo; eo enim libro Tuscia & Picenum dumtaxat, Provinciæ Suburbicariæ appellantur. Conficitur hinc, inquiunt, cæteras non fuisse Suburbicarias. Cur ergo, inquam ego, vos Latinam regionem, & Valeriam Suburbicarias appellatis? In Notitia Imperii hoc nomen non appellantur. Sed rem ad patet. Ideo Tuscia & Picenum Suburbicariæ in Notitia appellantur, ut ab annonariis distinguantur. Fuit enim Picenum & Tuscia etiam annonaria. Deinde, cum in Notitia Tuscia dumtaxat, & Picenum nominantur Suburbicariæ, non id conficitur, quod illi volunt, cæteras non esse Suburbicarias. Dupinus homines ad incitas adegit. *Cum tractum*, inquit, *Lutetia vicinum, Franciam appello, non propterea nego alias provincias Gallie ad Franciam pertinere.* Postremo verba decipere, a me supra commemorata, quæ inveniuntur tit. XVI. lib. II. Cod. Theod. cap. IX. Verba hæc sunt: *Non enim per Italiam tantum, sed etiam per Urbicarias regiones, & Siciliam, patrimonialium, & emphyteuticorum fundorum vires servandas esse perspeximus.* Sicilia, inquiunt, si Suburbicaria est, cur seorsum a Suburbicariis enumeratur? Non est igitur Suburbicaria. Sirmondus respondet, id propterea factum, quod illa proprium haberet rationalem, cum cæteræ Suburbicariæ eum haberent, qui esset Romæ, quod

quod intelligitur ex Notitia Imperii sect. XLIII. Placet hoc loco Sirmondi argumentationem de hac re adversus Salmasium commemorare. Si Siciliam, inquit, a Suburbicariis lex illa penitus excludit; de lege altera, quæ unica est in Codice Theodosiano, Si per obreptionem, quid censes? Quæro enim, cum Præfecto Italia, & Illyrici præcipit Imperator, ut per omnem Italiam, tum etiam per Urbicarias, Africanasque regiones, ac per omne Illyricum (hoc est per omnes Præfectura illius diœceses) legem promulget, Siciliam ecquo putes harum partium capite contineri? Exclusam enim, opinor, non dices, cum Italia Præfecto paruisse Siciliam, non dubites. Quæ igitur in parte comprehensam putas? Illyrico ne, an Africa? ridiculum sit suspicari. Nam Italia insulam fuisse Siciliam quis nescit? Sed cum Italia duæ fuerint diœceses, quæ hac in lege distinguuntur, Italica & Urbicaria, ad Italia diœcesim pertinuisse Siciliam, cum Italia Vicario non subesset, absurdum est, affirmare. Restat ergo, ut Urbicariarum numero comprehendatur. Sed jam quænam fuerit potestas Pontificis Romani in Ecclesias Suburbicarias, & non Suburbicarias, paucis ostendamus. Res autem continuo apparebit, si personæ, quæ eidem insunt, expendantur. Est enim & Episcopus urbis Romæ, & Metropolitanus diœcesis Urbicariæ, & Patriarcha Occidentalis, Caput denique & Princeps Ecclesiæ universæ. Ac de eo, quod postremo loco diximus, primum dicamus. Si hoc nomine igitur intelligatur, ut in omnem Ecclesiam obtineat principatum, cuncta ordine illi subsunt, quæ perti-

nent ad Ecclesiam; summaque est illius jurisdictionis. Principatu enim posito, hæc facile consequitur; eaque si tribuatur, jura condere, reddere judicia omnino poterit. Manant hæc omnia ex natura principatus, nec possunt distrahi. Sunt tamen, qui Pontificibus Maximis hanc legum ferendarum potestatem denegent; sunt, qui convellant principatum. Possem prioribus, non dico testimonia aliquot, petita ex Patribus, ex Conciliis petita, commemorare, sed acervos ac volumina, si temporis angustia paterentur; possem Sozomeni, Socratis, Patrum Nicænorum sententias recitare; Julii Epistolam de hac ipsa re ad Orientales; Siricii, Liberii facta, Innocentii primi, Zosimi, Cælestini, Hilarii. Sed ne nimis multa. Sic arbitror, rem confectum iri, si hoc loco ejus hominis auctoritate utar, cujus hominis auctoritatem, potestatem, & imperium venerentur. Constitutio est Valentianini Imperatoris, Codici Theodosiano adjecta. In ea hæc verba habentur in hanc rem: *Cum igitur, inquit, sedis Apostolica primatum, Sancti Petri meritum, qui princeps est sacerdotalis corona, & Romana dignitas civitatis, sacra etiam Synodi firmiter auctoritas.* Deinde primatu constituto, inde potestatem elicit legum ferendarum his verbis: *Verum ne levis saltem inter Ecclesias turba nascatur, vel in aliquo minui religionis disciplina videatur, hoc perenni sanctione decernimus, nequid tam Episcopis Gallicanis, quam aliarum provinciarum contra consuetudinem veterem liceat, sine viri venerabilis Papæ urbis*

urbis aterna, tentare; sed illis omnibusque pro lege sit, quidquid sanxit, vel sanxerit Apostolica sedis auctoritas. Quod pertinet ad posteriores, qui hac re maxime delectantur, ut manu cernant adversus Pontifices de illorum principatu, ea dumtaxat his loca attingam, contra quæ hiscere nullo modo possint; nempe Afrorum Patrum testimonia, Hieronymi, Irenæi, Concilii Aquilejensis, cui præfuit Ambrosius. Cyprianus itaque Epistola LV. sic tradit, Ecclesiam Romanam esse Petri Cathedram, & Ecclesiam principalem, unde unitas sacerdotalis orta est. Optatus Millevitanus lib. II. contra Parmenianum hæc habet: Igitur, inquit, negare non potes, scire te, in urbe Roma Petro primo Episcopalem cathedram esse collocatam, in qua sederit omnium Apostolorum caput Petrus, unde & Cephas appellatus est; in qua una cathedra unitas ab omnibus servaretur, ne ceteri Apostoli, singulas sibi quisque, defenderent; ut jam schismaticus & peccator esset, qui contra singularem cathedram alteram collocaret. Porro Petrum rogatum fuisse a Christo, ut unitas Ecclesiæ demonstraretur, ac Petro ipsi dignitatis ejus principatus tribueretur, qua totius Ecclesiæ repræsenteret figurata generalitate personam & sæpius, & pluribus docuit Augustinus. Docuit Hieronymus lib. I. contra Jovinianum, his verbis etiam in Epist. ad Damasum: Ego, inquit, nullum primum, nisi Christum sequens, beatitudini tuæ, id est Cathedra Petri, communionem confocior. Super illam petram, Ecclesiam edificatam scio. Quicumque, extra hanc domum, agnum comederit, profanus

*fanus est. Docuit Irenæus lib. III. cap. III. cujus hæc sunt verba: Ad Romanam Ecclesiam, propter potentio rem principalitatem, necesse est omnem convenire Ecclesiam. Postremo aperte id intelligitur ex Epist. Concilii Aquilejensis ad Gratianum, cujus verba hæc sunt: Totius orbis Romani caput, Romanam Ecclesiam, atque illam sacrosanctam Apostolorum fidem ne turbari sineret, obsecranda fuit clementia vestra. Inde enim in omnes veneranda communionis jura dimanant. His paucis generi utrique arbitror abunde satisfactum. Est Pontifex Romanus, Patriarcha Occidentalis. Hoc nomine video Leonem compellatum aët. III. Synodi Chalcedonen sis; Hormisdam etiam litteris Justinii Imperatoris. Præterea Justinianus Imperator in Novella CXIX. edita anno DXLI. cum quinque Patriarchas percereret, primo loco meminit Patriarchæ Hesperix & Romæ. Quo loco non Italiam, quod plures docuere, sed omnem Occidentem significari Hesperix nomine vetus Interpretes Novellarum tradit. Eoque sensu Theodoretus Episcopi Occidentales *οἱ τῆς ὑστερίας* dicuntur, & apud Socratem *ὑστερίων*. Basilii Epist. X. Occidentalium Coryphæum nominat; Augustinus lib. I. contra Julian. Ecclesiæ Occidentalis Præsidentem. Hoc consilio existimo Patres Concilii Arelatensis, Epistola Synodica ad Silvestrum Pontificem, palam docuisse, eum majores diœceses tenere; quod nimirum, cum singuli Orientis Patriarchæ singulis diœcesibus præessent, Silvester Pontifex diœceses septem Occidentis obtineret.*

neret. Id si verum est, apparet, Pontificem Romanum, ea potestate ac jurisdictione præditum fuisse per Ecclesias omnes Occidentis, qua auctos ornatosque in sua quemque dioecesi Orientalis Patriarchas viri docti profitentur. Est Metropolitanus dioecesis Urbicariæ. Porro Metropolitanus potestatem his fere rebus contineri, a sapientissimis quibusque didici, ut Episcopos sibi subiectos possit ad Synodum evocare; ut Episcoporum ordinationes persequatur; ut sententiam ferat de causis majoribus. Hæc acta omnia a Pontificibus Romanis, tamquam dioecesis Urbicariæ Metropolitanis, omnino certum est. Hinc Concilia tot Romana, in urbe Roma habita, tamquam sede dioecesis Urbicariæ. Hinc ordinationes Episcoporum sexaginta novem, quorum meminit Notitia Vaticana; quibus fere conflata erat Urbicaria dioecesis. Hinc judicia tot reddita a Pontificibus de rebus gravioribus. Est denique Romanus Pontifex, Episcopus urbis Romæ. De qua re non multa nunc hoc loco dicam; cum videam, omnium consensu, & esse illum, & haberi, finibus contractis, Episcopum urbis Romæ. Exstant in eam rem inscriptiones veteres & Occidentalium Patrum, & Orientalium, Romani-que agri portio quædam etiamnum hoc nomine ab eo administratur. Nunc id est reliqui, ut de comparatione agam trium potestatum ex Canone Nicæno. Meletium in causa fuisse, cur is Canon a Patribus Nicænis ederetur, & censuit Lanojus, & apparet ex historia Concilii Nicæni.

Nem-

Nempe is Meletius Episcopus Ægyptius fuit. Cum foede ac flagitiose viveret, eo nomine accusatus, in frequenti Episcoporum conventu, a Petro Alexandrino Metropolitano sede sua deturbatus est. Id cum animo iniquissimo Meletius tulisset, omnem fere Ægyptum perturbavit. Episcopos, Presbyteros, Diaconos creavit & Ægypto & Palæstina. Ea res Alexandrum, qui post Petrum & Achillam Ecclesiæ Alexandrinæ præfuit, vehementer commovit; cum præsertim acres turbæ Asianorum, & pestis Ariana adjungeretur, quæ longe ac late grassabatur. Hortatu igitur illius, & Silvestri Pontificis Romani auctoritate, Synodus Nicææ indicta est a Constantino Imperatore. Eo convenere ex omni Romano Orbe Episcopi CCCXVIII. vitæ sanctitate, & divinarum scripturarum scientia plane admirabiles. Canones XX. ab his constituuntur. In his IV. est, & VI. in rem nostram. Cautum est IV. ut in singulis Provinciis, suffragio ac præsentia, quoad ejus fieri posset, omnium Episcoporum provincialium Episcopi crearentur; sin minus id liceret, tres saltem adessent; reliqui per litteras consentirent. Cæterum res omnis acta ab his, ut rata firmaque tum demum haberetur, cum auctoritas accederet & confirmatio Metropolitanæ. Cautum est VI. ut duæ diœceses, Ægyptus & Antiochia inde exciperentur. Nempe ut in Ægypto, quæ Provinciis V. conflata erat, Episcoporum ordinationes, non singularum Provinciarum singulis Metropolitanis probarentur, sed

sed iudicio unius Alexandrini Episcopi, quasi is
 esset singularum quinque Provinciarum Metro-
 politanus. Id ipsum tributum est Episcopo An-
 tiocheno, cujus dioecesis, quæ Orientalis dicta
 est, Provinciis decem comprehendebatur. Eaque
 a Patribus eo nomine constituta sunt, quod mo-
 ribus jamdiu ita comparatum esset; quos mo-
 res tamen libidine & cupiditate sua Melerius
 turbaverat; deinde, quod ea etiam esset consue-
 tudo in Urbicaria dioecesi, ut Pontifex Roma-
 nus in singulis quibusque Provinciis decem Sub-
 urbicariis unus ac solus Metropolitanus haberetur;
 cunctaque in his illius auctoritate & consilio age-
 rentur. Atque hoc ipsum illud est, quod litteris
 ad Alexandrum Antiochenum tradit Innocentius
 I. Canonibus Nicænis, *non super unam Provinciam,
 sed super diocesim eum esse constitutum, ut Metropoli-
 tanos auctoritate ordinet singulari, & ceteros non sine
 permissu & conscientia sua sinat Episcopos procreari.*
 Quod Hieronymus etiam in Epistola ad Pam-
 machium, statutum esse a Patribus Nicænis, *ut
 totius Orientis Metropolis esset Antiochia.* Ex quattuor
 igitur personis, quas Pontifici Romano inesse di-
 ximus, persona Metropolitanæ sumpta est. Cum
 hac collatæ potestates duæ; Alexandrina & An-
 tiochena; cæteræ relictæ. Collati Metropolitanæ
 tres; collata, quæ appellant, jura Metropolitana;
 honores habitus singulares tribus urbibus, omni-
 um nobilissimis, Romæ, Alexandriæ, Antiochiæ.
 Ubi nunc igitur sunt, qui audacissime sic con-
 tendunt, Pontificis Romani potestatem, finibus
 Sub-

Suburbicariis initio definitam, libidine deinceps
& cupiditate eo provectam, ut cæteras absume-
ret? Sed modus sit jam aliquis. Recte. Afer in
Eunucho:

*Is ne erret, moneo, et desinat laceffere:
Habeo alia multa, quæ nunc condonabitur;
Quæ proferentur post, si perget ladere
Ita, ut facere instituit.*

D I X I.



MC

